

REMERCIEMENT

A V R O Y.

PAR LOVYS

D'ORLEANS.



A PARIS,

Chez REGNAULD CHAUDIERE,
rue saint Jacques, à l'Escu
de Florence.

1604.

Avec Privilege du Roy.

75.
THE UNIVERSITY

OF CHICAGO

LIBRARY



1913

THE UNIVERSITY OF CHICAGO

CHICAGO, ILL.

1913

THE UNIVERSITY OF CHICAGO



REMERCIMENT

AV ROY.



SIRE,

Quiconque a dit que les Roys estoient enfans de DIEU, (bien que ce soit Homere ce grand estalleur de bagatelles Poëtiques, & ce doux & delicieux menteur) si a-il dit la verité. Car la science nous l'apprend, l'experience nous l'assure, & les demonstrations en sont si claires, que qui en doute, doute du iour, & fait des nuicts en plein midy. Les Hebreux à qui nous devons la composition des lettres saintes, & qui ont eu de grandes familiaritez avecque Dieu,

REMERCIEMENT

nous ont deuât tous enseigné ce secret. Et par ce que c'est le liure de doctrine & de verité, il nous ont laissé ceste doctrine pour l'apprendre, & ceste verité pour la croire. Car discourans de la personne des Rois & des puissances souueraines, ils en parlent ainsi:

*Tous vous estes des Dieux en terre triump-
phans,*

Et du Pere tres-haut vous estes les enfans.

Et certes, ce qu'est l'vmbre au corps, & l'image à la chose, & le rayon au Soleil, les Rois le sont à la Diuinité. Comme vmbre ils la suiuent, comme image ils la representent, comme rayons ils en sortent, & tiennent de sa splendeur, de sa beauté, & de sa subtilité. Leur poinct, est vn poinct de ceste ligne, leur degré, vn degré de ce Méridien, leur cercle, vn cercle de ceste Sphere.

Les hommes Grecs, qui ont Royalement discouru de la Royauté, mais à la Grecque, ont pareillement appelé les Rois enfans des Dieux, leurs amis & confabulateurs, voire les Dieux mesmes, les Dieux humains, les Iupiters du monde, & les ont approchez si près de

la diuine Essence, qu'ils en ont fait vne particule de cest vniuers de sublimité. I'en puis dire autant des Romains, dont vn Sénateur disoit en opinant, *Que les Princes representans les Dieux icy bas, on ne leur deuoit rien requérir qui ne fust iuste, puis qu'il n'estoit loisible de faire aux Dieux vne requeste iniuste.* Nos premiers Chrestiens tresseueres censeurs en leur discipline, de l'honneur qui se doit à Dieu, mais après Dieu tres-affectionnez aux Césars, ne nioient pas que les Rois ne fussent enfans de Dieu, (cōme ils le sont,) mais ils distinguoyēt les bons d'auec les mauuais, & soumettoient l'autorité des enfans à la supreme & redoutable maiesté du pere. Ils euitoient l'adulation, mais ils ne les deprimoyent par abjection. Car les asseruissant à Dieu, ils ne les soumettoient qu'à Dieu, mais apres Dieu, ils les preposoyent sur les hommes, comme sont les enfans sur les seruiteurs chez vn pere de famille. Et certes on recognoist les enfans aux mœurs & aux lineaments du pere. Les fruiets ont la seve des brâches, les branches du tronc, le tronc de la raci-

R E M E R C I M E N T

ne. Les ruisseaux tiennent du goust, de la clarté, de la pureté & fraicheur de leur fontaine. En la fontaine d'Apollon, les poissons mesmes y sont prophetes. Aussi la nature a cest ordre, que tout semblable engendre son semblable. Car en la terre, le genereux Lyon engendre le Lyon, en l'air, l'Esparuiier faiet l'Esparuiier, dans les eaux, le Ton naist du Ton, & ne voit-on point, sans monstruosité, que le Tiercelet d'autour, face des buses. S I R R, Monseigneur le Dauphin vous monstrera vn iour de qui il tient, & vous fera paroistre qu'il vient d'un Aigle qui a volé bien haut, & qui ne s'est espouuenté du tonnerre.

C'a tousiours esté le naturel d'un grand Prince, de ne rien faire & ne rien engendrer que de grand. Aussi disoit-on d'Alexandre, qu'en la grandeur estoit tout son esbat. C'estoit l'air où il voloit, l'Ocean où il se baignoit, & la terre où il faisoit ses courses plus heurensees. C'estoit la campagne où ce coursier genereux prenoit sa carriere, où il se plaisoit de jeter la poudre au vent, & de parue-

nit avec longue haleine, au but de ses Royalles intentions. Son cœur n'estoit qu'un Sacre empenné de grandeur. De voler haut il s'y plaisoit, de fondre à bas, il ne pouuoit. La bassesse luy estoit vne fumee aux yeux, vn fumier au nez, vn absynthe au goust, & vn horreur à sa Royale Nature. Aussi sa composition estoit telle, que tout ce qu'il auoit en luy, voire de plus vil, n'estoit qu'honneur, & que grandeur. Car mesme sa sueur, dit Plutarque, n'estoit que musc & parfû odorant. C'estoit myrrhe, c'estoit cynamome. Et s'il faut ainsi dire, tout Alexandre n'estoit qu'une paste de diuinité, meslee avec vn peu d'humanité, que la Nature auoit effigiee en forme d'homme, qu'on nommoit Alexandre. Son esprit estoit tellement faict aux choses hautes, que si ce n'estoit pour exercer sa vertu, il desdaignoit les choses basses. Car ce qui est bas, est ordinairement vil & de peu de lustre. S'il bastissoit, c'estoit ou la ville d'Aristote son precepteur, ou celle d'Alexandrie, qui retient encor auourd'huy le nom, & le renom, voire l'heur & l'honneur de son auteur. S'il

REMERCEMENT

triumphoit, c'estoit du genre humain, s'il conqueroit, c'estoit le monde entier. Encor en vouloit-il plusieurs pour les vaincre, & son cœur plus grand que la terre, bien qu'il ne fust qu'un point de terre, ne pouvoit estre borné des bornes de la terre. On diët de Demetrius, (qui estoit encor un autre Milan, dont le haut vol trouuoit le ciel trop bas pour s'efforer) que s'il mettoit la main aux mechaniques, où il estoit tres-bien versé, tous ses ouurages sentoient sa Royauté. C'estoit le naturel d'Alexandre. Car ses plus basses actions & conceptions, n'estoient que merueilles. Trouuoit-il l'escrain des parfums de Darius, il y enfermoit son Homere. Prenoit il Thebes, il pardonnoit à la maison & famille de Pindare. Somme qu'il trouuoit partout, où faire paroistre la grandeur de son cœur, & de son esprit. S'il vouloit vne statuë, il la vouloit de la main de Lyfippe, comme sa peinture de la main d'Apelles; & vouloit vne statuë, non de deux ou de trois coudées, mais un Colosse plus grand que le mont Pelion, plus fourcilleux que l'Olympe, plus es-

leué que le plus haut mont de Thrace. Et
 ne la vouloit oisue ou inutile, mais qui
 tint d'une main vne grande ville, & de
 l'autre versast vn grand fleuve, & pour sa
 baze, qu'elle eust vne grande estédue de
 pais. Aussi ne pësoit-il rië auoir de mor-
 tel, ains se disoit fils de Iupiter Ammon;
 n'ayant iamais creu qu'il fut homme, si-
 non lors que blessé, il vit le pourpre de
 son sang qui ruisseloit par la campagne.
 Les Grecs en ont autāt dict de leur Her-
 cule qu'ils on faiët fils de Iupiter. Car
 il ne faisoit, voire ne pensoit rien qui ne
 fust grand & grandemët vtile. Et toutes
 ses actiōs, toutes ses cogitatiōs, n'estoiët
 que grandeur. C'est pourquoy en sou-
 uenance de luy, la Grece a retenu fort
 long tēps en ses mesures le pied d'Her-
 cule, comme le grand pied, & le pied de
 Roy, que nous disons en France. Pour
 monstrer que les grands Roys, se doi-
 uent mesurer non au pied du vice, qui
 n'est qu'un pigmee, & vne vilité, mais
 au grand pied de la vertu, & à la mesure
 de la valeur, grandeur, sagesse, & gene-
 rosité d'Hercules. Et certainemët ils re-
 citent de luy des choses hautes & gene-

R E M E R C I M E N T

reuses, & des actions dignes d'un grand & magnanime Prince. Car il n'est pas si tost nay, qu'ils luy font estouffer deux serpens ennemis de la naissance & subleuation des Rois, la Volupté & la Flat-
terie. Est-il adulte, il ne combat, & n'a-
bat que des Hydres à sept testes, des Ge-
rions à trois corps, des Cerberes à trois
goziers, tous monstres doubles & tri-
ples, voire deux fois triples, iettât le feu
par les yeux, par le nez, & par la gorge,
& qui nous representent les vices, cor-
rupteurs des Princes, & tous monstres
deuorateurs des plus beaux Estats, &
puissantes Republiques. Hors de ces
combats, ils le font infinimēt religieux,
qui ne iura iamais qu'une seule fois; &
luy font un autel cōmun avec les Muses:
representās la douceur & mansuetude de
son esprit. Sōme qu'il nous font cet Her-
cule, qui n'est ni Hercule, ni Roy, ni en-
fant de Iupiter, que pour repurger les
mōstrueuses ordures de la terre: & nō en
un lieu seulemēt, mais par tout. Et pour
monstrer la pureté de ses mœurs, c'est
qu'après sa mort, les Grecs ne vouloient
pas que les mouches & les chiens qui ne

sont qu'impuretez & villenies , entrafsent dans son temple. Ils auoient mesmes attaché sa massuë , en l'vne des colonnes de la porte , pour leur en faire peur.

SIRE , vous estes l'Hercule des François , vous sçauiez les monstres qu'on y voit, vostre esprit les cognoist, vostre volonté les deteste , vostre puissance les peut perdre , donnez vous pour singulier honneur qu'on escriue à la baze de vostre statuë, HENRY IV. DOMPTEUR DES MONSTRES, Vous laisserez vn heritage net & paisible à Monseigneur le Daulphin, & à vous, vne gloire immortelle, d'auoir comme Vaspasian , releué le Temple d'Honneur & de Vertu. Aussi est-ce la propre & peculiere fonction des Roys de deffaire & ruiner les vices. C'est la naturelle action des enfans de Dieu , de dompter les mōstres, & en quoy les enfans doiuent ressembler naturellement au pere. Car il hayt l'impieté, l'iniustice, l'impureté, le mensonge, & la malice, d'vne hayne parfaite. Autant qu'il chérit la Verité & la Vertu, qui sont deux

REMERCEMENT

lampes allumees qui luisent eternellement deuant son throsne. Ce sont-là les opulentes richesses que ses enfans ont en appennage de luy, & en auancement de son eternelle hoirie. Ce sont les dons honorables de la royale magnificence. Ceux qui reuiennent des Indes Orientales sont coustumierement riches en espiceries, & les marchands retournant du Peru, sont volontiers foisonnants en lingots d'or. Les Rois enfans d'un si riche & si noble pere, cōme est Dieu, ne peuuent qu'ils ne soient riches à merueilles. Et comme on ne peut accuser les enfans d'Attalus & de Crœsus de pauvreté, ainsi ne les peut-on blâmer d'indigence. Car naturellement & dès leur naissance, ils foisonnoient en esprit & intelligence, en sens & iugement, en generosité & magnanimité plus que le reste des humains. Les petits aiglons qui sont les Princes de l'air, ne sont si tost éclos qu'ils regardēt assurement le Soleil. A peine leur prunelle est elle defermee, voire formee, que desia elle fait teste, & tient bon sans claigner, contre les rayons de cet astre qui esblouit tous au-

tres regardans. Ils voyent petits , & en leur duuet , ce que les plus braues oyseaux , n'osent aborder en la force de leurs plumes. Aussi disoit-on des yeux de l'Empereur Tibere, qu'ils voyoient de nuit cōme en plein iour. Car les yeux des Princes ne s'esblouissent point à la clarté, & ne s'obscurcissent es tenebres. Le Lyonceau si ieune qu'il soit, ne redoubte rien. Il n'a encor ni griffes, ni dents, qu'il marche assuré, & court à la proye. Et desia le feu luy jallit des yeux, & sent en son cœur les premières pointes de sa vigueur. Tel estoit Achille en sa prime ieunesse, chassant avec les Centaures; tel Cyrus le premier Monarque des Perses, tel ce Cæsar vainqueur de Rome, & Empereur de l'univers. C'est pourquoy les Romains deuant le temps donnoient aux ieunes Princes place es charges de leur Estat. Pource-que deuant le temps ils auoient la prudence & capacité de gouverner vn Estat. L'espine Royale en Babylone, le mesme iour qu'elle est entee, le mesme iour elle germe, contre l'odinaire de la nature. Et

R E M E R C I M E N T

c'est pourquoy en la vieille republique Romaine, Scipion ne demandant que l'Ædilite, fut fait Consul cōtre les loix. Car la loy de Nature auoit deuanté le temps de la loy Politique. Il estoit nay, non tant pour s'assubjectir à la loy, que pour auctoriser & donner vigueur à la Majesté de la Loy. La France a trop d'exemples de cecy en la personne de ses Princes. Car nous lisons du Roy Charles cinquiesme dit le sage, qu'ayant fait mettre sur vn aureiller de veloux en vne salle vne couronne d'or, & vn sceptre, & sur vn autre, vn armet & vne espee, y voyant entrer son fils encor ieune Prince, il luy cōmanda de choisir des deux, ce qui luy seroit le plus agreable. Mais il choisit le heaume & l'espee, sçachāt que c'est peu d'un Royaume, qui n'a l'armet & l'espee pour le garder. L'espee & l'armet acquerent les Royaumes, les Roys sans espee & sans armet, perdent leurs Royaumes. On conte de Monseigneur le Dauphin, que ces iours passez, comme vous luy eussiez mis vn Couronne sur la teste, il demanda où estoit l'autre, n'ignorāt point que vous en auiez deux,

& qu'il seroit heritier de l'une & de l'autre. Ce qui est plus esmerueillable en lui qu'il est encor enfant, & qu'il monstre que le iugement luy paroist deuant les ans. Aussi les Princes ont de Dieu des esprits forts & grands, esprits pleins de viuacité & de subtilité, de prudence & de sapience. Ce que n'a pas le vulgaire des hommes. Car Moyse grand conducteur & general du peuple d'Israël, fâché de la pesanteur de sa charge, & de la dureté de cœur des Iuifs, priant Dieu de le soulager d'un nombre de quelques Conseillers, receut ceste responce. *Ie le feray, mais i'osteray de ton esprit pour le bailler aux autres.* Ce qui nous monstre, que les Rois possèdent de grands esprits avec plenitude, & que leurs subjets ne les ont par maniere de dire, que par subdiuisions & particules. C'est pourquoy la femme Tecuite disoit ainsi à David, *SIR, vous estes sage comme l'Ange de Dieu, vous sçauex tout ce qu'il faut faire sur la terre.* Et certes Dieu faict aux Rois, ce que les grands Princes font à leurs enfans. C'est qu'il leur donne de grands & nobles precepteurs pour les instruire, qui sôt les An-

REMERCEMENT

ges. Plutarque discourant, mais en son paganisme, des grands esprits qui accompagnent les Roys, dit que les dæmons sont au dessus de nous, & qu'ils choisissent entre les hommes ceux qui sont les meilleurs, mais principalement les Princes, comme ayant le naturel grâd & genereux, afin de les instruire à la raison, & les afaiter, comme vn bon faulconnier faiçt son oyseau avec les longes, ou le braue escuyer son cheual avec la baguette. Et adioust, que les Roys participent bien plus du feu que le reste des hommes priuez; c'est à dire de la diuinité, dont le feu est le vray hieroglyfe. Et certes c'est vne chose qui se remarque, que les fleurs de leurs nobles entendements sont plustost en fruiçt, que les esprits de leurs subieçts ne sont en bourre: & plustost sont ils paruenus à l'Aoust de leur prudence, recueillants à pleins bras la moisson de leurs sages conseils, que leurs subieçts ne sont aux boutons de leur prime-verc. Ils ressembtent à ces rosiers de Pestane, qui portent des roses deux fois l'an: car ils sont desia à la seconde portee, que les autres sont encores
aux

aux boutons de leur premiere. Vn esprit Royal est fecond en toutes sortes. Il est comme ces vignes de Smyrne, qui en mesme temps auoient trois sortes de raisins, l'vn qui fleurissoit, l'autre qui grossissoit, l'autre qui estoit en sa pleine maturité. Ou plustost cōme ces arbres, qui greffés de toutes parts, portent toutes sortes de fruiçts pendus à leurs branches. L'entendement des Roys est cōme vn noble iardin, où non seulement il croist des fleurs pleines d'odeur, & de beauté en abondāce, mais des fruits suauēs & excellents au goust, & autāt delicieux à la lāgue, qu'ils sont bōs au cœur, & agreable à la veuë. Et qui a veu en Aoust vn champ de froment fort espais, & qui iaunist d'espics grēnez & crestez, qui resioüissent l'œil des passans, & le cœur du pere de famille: il voit vn esprit Royal & auguste, comme vn champ, où germe l'abondance de conseil en grande quantiré, pour sustanter, nourrir & alimenter le peuple de son estat, & pour dōner vigueur & viuacité à tout le corps de son Royaume. Ce sont les riches vergers du Roy Adonis, & de Semiramis.

R E M E R C I M E N T

Ce sont les iardins delectables que les Poëtes ont autres-fois attribuez aux Roys. C'est la pommeraye du Roy Alcynous, c'est la roseraye de cest autre Roy de Phrygie, tant chanté & tant vanté pour ses richesses: C'est cet Atlantide iardin, où croissoient les pommes de pur or, pour estre le symbole de la Royale sapience.

SIRE, i'ay eu cet heur, d'auoir par vostre main, & par vostre Royale debonnaireté odoré ces fleurs, i'ay eu l'honneur de goustier de ces fruits, nō sans vn plaisir & vne delectation signalee. Et vous confesseray, que comme i'ay miré leur beauté, i'ay admiré leur bonté, que i'ay trouuee excellēte voire singuliere. C'est pourquoy ie me suis resolu non seulement de les aymer, mais de les estimer, & d'en auoir en l'ame vne eternelle souuenance. Et pource que ie suis entré en ce clos & parterre des graces Royales, & que me promenant dans les allees & compartimens des fleurs de la Royauté, i'y ay trouué quelque chose de singulier qui n'appartient qu'à vous; ie supplieray vostre Majesté, SIRE, de me don-

ner congé de choisir en ce iardin quelques boutons de roses espanies à vostre honneur, voire quelques fruiçts que ie voi pendans aux brâches de vostre vertu, afin d'en faire vn present à la France, qui les ayme & qui les reuere. Permettez-moy, s'il vous plaist, d'en façonner vn bouquet que ie luy mette dâs le sein, & qu'elle porte par plaisir en faueur de vostre heureuse souuenance. Car si iamais vne Dame d'honneur fut esprise d'amour & d'affection d'un Prince, la France l'a esté de vous. Je dis qu'elle l'a esté, & best encore, car son desir ne s'assouuit parla iouyssance. C'est vn present que ie luy veux faire de ma main, c'est vn don, dont ie la veux gratifier à mon retour. Non qu'elle ignore la beauté, la grace, & la douceur qui est aux fleurs & aux fruiçts que ie luy veux donner, (car qui est de vos peuples qui ne les sçache, & qui ne les ayt goustées & senties cōme moy?) mais pour louer & recōmander avec elle, ce que i'ay senti & gousté, avec tant de plaisir & d'amœnité. Et certes ie me resiouy, que ma calamité m'ait donné ceste gloire, de seruir de sujet à

R E M E R C I M E N T

vostre bonté & que j'aye esté le cham
où vostre clemence se soit exercee avec
tant de loüanges de vostre Maïesté. Et
si ma voix pouuoit entōner de l'Orient
en l'Occident, & du Septentrion au Mi-
dy, voire si elle pouuoit passer de ce bas
centre de la terre, iusques à la plus haute
circonferencé du ciel empyree, j'appel-
leroït tous les nobles esprits qui y sont,
& tant de hautes intelligences qui y re-
sident, avec tant de diuines ames qui s'y
esgayent, & les prierois de m'assister à ce
que ie diray, non par adulation, dont ie
suis net, non par crainte, dont ma vie in-
nocente me deliure, mais par vne verité
dont le Ciel & la Terre, & dōt les Hom-
mes & les Anges sont tesmoins affi-
dez & irreprochables. Car ie ne suis
point vn Plaisantin mais vn Veronnois,
& ne me feins point quand ie me ioüe
aux Alexandres, Plustost mes paroles
sentent le sel d'vne pure affection, que
l'huile d'vne molle adulation. Ma plu-
me ne sera iamais le poignard de Ioab
qui tua Abner par derriere. Ma langue
est trop Françoisë, mō cœur trop Chre-
stien, & vous, SIRE, trop bon Roy qui

n'aymaistes iamaïs d'estre flatté, mais plustost gracieusement admōnesté. Aussi ie dy de vous ce qu'on disoit de Daud en l'Escripture sainte; *Monseigneur est cōme l'Ange de Dieu qui ne sement ni de benediction ni de malediction.*

I'ay donques recogneu aux bōs Rois, & particulièrement en vostre Maiesté, SIRE, deux choses qui viennent immediatement de Dieu, & que vous tirez de luy, comme vn enfant tire du pere les traiçts & les lineaments de son visage. C'est la puissance, & la douceur. Vos ennemis ont experimenté la premiere: de la derniere, j'en suis l'exemple. La premiere a esté redoutable en l'Europe, la seconde a esté aymable, voire admirable en vos subiects, & en moy particulièrement. Je ne pretends pās en cet endroit discourir de Dieu & de sa puissance, car c'est vn Ocean de trop estrange profondeur. Ceste coste ne m'est aucunement nauigable, pource que son estendüe est trop vaste, trop perilleuse & incognüe à mon petit vaisseau, & ce Nord peu regardé de mon esguille. C'est pourquoy ie laisse ceste sublimité, pour nauiger vn

R E M E R C I M E N T

peu plus bas, & quittant vn trop dange-
 reux voyage, pour trainer mon petit es-
 quif au riuage tranquille & serain de vo-
 stre Serenissime debõnaireté. Sur la quel-
 le quand ie iette l'œil, & que ie voy le
 rayon qui en esclatté, touché de soudain
 esbahissement, ie pense de vostre Maje-
 sté Royale, ce que Seneque disoit de la
 grandeur & autorité Imperialle. *C'est
 moy, dit-il, sous la personne d'un puissant
 Empereur, qui ay esté si agreable aux Dieux,
 qu'ils m'ont choisi pour estre leur Lieutenant
 en terre. C'est moy qui les seconde, c'est par ma
 bouche que se prononcent les arrests immuables
 de la bonne ou mauuaise fortune des humains.*
 Et à la verité SIRE, qui est Roy est
 tout, & qui a ceste qualité, il est riche
 en quantité, & n'a pas plus rien que de-
 sirer en terre: Car les Rois couchent en
 la chambre de la belle Fortune, ce
 sont ses mignõs & ses fauorits. Ils dor-
 ment sous son pauillon, ils sommeillent
 sur son aurreiller, voire ils reposent en-
 tre ses bras, & à pleins voiles, ils iouys-
 sent du vent de la prosperité, & des de-
 lices de la terre. Ce sont les enfans heu-
 reux, & le part glorieux de la riche lu-

non. Aussi le Roy Porus estant prisonnier, comme Alexandre luy demandast en quelle sorte on le traiçteroit, il dict, **B N R O Y**, & adiousta que disant en Roy, il disoit tout; & qu'il n'estoit besoin d'autre chose. C'est pourquoy Euripide escrit ces vers qui sont certes dignes de remarque.

Vn Roy, comme vn grand Dieu, vit en sa Royauté,

Rien ne luy peut māquer fors l'immortalité.
Et certainement c'est vn grand heur d'estre seul homme, qui preside sur tous les hommes: & d'estre chef qui gouuerne tant de chefs. Car ce qu'est l'esprit qui faict mouuoir le corps selon son appetit, tel est le Prince qui fait mouuoir les membres de son estat selon sa volonté. Ce sont les titres des Rois, d'estre appelez les Grands pour leur sublimité, les Heureux pour leur prosperité, les Augustes pour leur diuinité, les Pasteurs des peuples pour leur prudence, les Sacres, & les Aigles pour leur hauteſſe, & leur excellence. C'est, dis-ie, vn grand heur à vn Roy, qu'en quelque endroit qu'il se parque, tout luy obeyt, tout le regarde,

R E M E R C I M E N T

& que si le Soleil se leue, c'est pour le recreer, s'il se couche, c'est pour le soulager, & que par tout où il marche, le ciel l'esclaire, la mer le reuere, quelque grossier élément qu'elle soit, & que la terre qui à mouueusement l'honore, ne luy produise sous les pieds, que des roses, des violettes, & des lys. C'est vne grande felicité, de commander à tant de gens si sublimes en esprits, si opulents en richesses, si grand en forces, & que de son petit doigt, il face mouuoir toutes ces machines, & les applique à ses desseins, comme vn Architecte faict les siennes aux pieces de son bastiment. Car comme Archimede par ses instrumens de Mathematique (qui n'estoient que cuyure, fer & acier, ou autre dure matiere) faisoit iouer ses Authomates : Ainsi les Rois par les hommes qui sont les roües de leur estat, conduisent leurs affaires à leur poinct, & les font virer & tourner comme bon leur semble. l'ay vû de ces noms, cuyure, fer, & acier, & les ay comparez aux hommes, pource que ce sont des plus dures & rebelles parties de la Nature; & pource qu'il n'y a

rien qui ressemble tant à l'homme que la dureté de ces métaux. Car il n'y a animal si fantasque, si dur, & si fâcheux à gouverner qu'est l'homme, & qui marche moins où il luy faut s'il n'y est conduit de son liberal arbitre. Je dis encor, que c'est vne souueraine autorité, non seulement de commander à l'homme, (bien qu'il ne se trouue rien plus doux qu'un iuste commandement) mais d'auoir puissance sur ses biens, sa vie, & son honneur, lequel il repute cent fois plus que la vie. C'est vne riche fortune, de se voir sous les pieds l'estenduë d'un grand Royaume, & d'auoir ce contentement de dire, le veux & il est fait, le desire, & ce desir s'accomplit, & que le seul clin d'œil le face entendre, le moindre remuemēt de lèvres le face executer. C'est un pouuoir tres-grand, que les Rois qui sont mortels, prennent leur pouuoir mesme sur les loix immortelles, & que pour le bien de leur estat ils se donnent la volonté de les changer, contre la volonté de leurs subiects. C'est un noble partage que Dieu leur a fait, de se reseruer le ciel, & leur donner la ter-

REMERCIEMENT

re. Ie dy la terre, qui semble auoir esté comme vne belle maison, entouree d'eaux & de larges fossez, bastie pour eux. Laquelle neantmoins ils n'ont que par preciaire, & tant & si longuement qu'il plaist à ce grand Seigneur, lequel eternellement se reserue le droit de souueraineté sur eux, les chargeant de foy & hommage lige, & de fidelle & perpetuelle recognoissance & obeyssance. Car à autres conditions Dieu ne leur fait ces inuestitures. Et quád ie vous recite tant de grâdes & graues preéminences qu'õt les Rois, ie touche plustost, **SIRE**, les clauses des grâdes obligations des Rois, que les plaisirs de leurs riches possessiõs, & acquisitions souueraines. D'autant que qui beaucoup reçoit, beaucoup s'oblige, & le compte ne peut estre petit, d'vne si grande, si serieuse, & si perilleuse recepte.

MAIS SIRE, toutes ces grandeurs des Rois, & tant d'autoritez & prerogatiues que ie viens de deduire, vous sont communes avec les autres Rois. Dieu toutesfois, qui vous regarde autrement que les autres (car le Soleil voit

d'un autre œil Iupiter que Saturne) & qui vous a mis à part pour vous faire vn miracle de la Nature, vous en a donné de particulieres, qui sont de tres-haute & tres-auguste marque, & dont vous luy estes d'autant estroitement obligé, quil vous en a noblement & glorieusement appennagé. Il a fait enuers vous, ce que faisoient les Rois de Perses à l'endroit de leurs enfans aînez, c'est de vous faire des aduantages, qu'il ne fait point aux puisnez. Moy qui les scay & qui les considere, & qui neantmoins ne les puis si viuement penetrer, ni si graue-ment peser comme vous, qui les sentez & en auez l'aïse, ie m'en esiouys, & m'en esbahis tout ensemble. Et jettant l'œil sur vostre Royale Majesté quād ie vous contemple en vostre thresne comme Roy de France, c'est à dire le Roy des Rois, l'Agamemnon de nostre Grece, l'Auguste de nostre Rome, que ie vous voy autant aymé que redouté de vos sujets, ie demeure comme esperdu, & m'est aduis que ie songe. Car certainement ie ne voy que merueilles, ie ne voy qu'esbahissemens, ie ne sens que rauissemens.

R E M E R C I M E N T

Je vous confeſſeray qu'il m'eſt aduenu
& aduient bien ſouuent, de conſiderer
voſtre felicité. I'en prens les longueurs
& les meſures, i'en ſonde les profondeurs
& les hauteurs, i'en regarde les entrees
& les progresz, mais apres auoir bien
diſcouru, & bien couru par toutes les
parties de voſtre Fortune, & que ie pen-
ſe aux biens que Dieu vous à faiçts, ie
m'exclame avec Claudian, & diſ ainſi,

O bien aymé de Dieu, pour qui le ciel travail-
le,

Pour qui les vents armez ſe dreſſent en ba-
taille.

Je me propoſe ce que vous avez faiçt
eſtant Roy, & lors que vous n'eſtiez pas
Roy, ce que vous avez executé en paix,
ce que vous avez faiçt en guerre, les en-
treprinſes de voſtre ieuneſſe, les cōque-
ſtes de voſtre âge pl⁹ meur, & le tout mis
en abrégé, comme vne carte de voſtre
mōde, & vn crayon de voſtre vniuers:
Il me ſemble voir vn grand fleuue, dont
la ſource noble & profonde, ſortie
du pied de grandes montagnes, pouſſe
au commencement ſes eaux cōtraintes
dedans des vallons, & les roule avec

difficulté: Mais quand il vient à s'estendre, & qu'il se desueloppe, c'est lors que plaissant & gracieux en sa couche argentee, il s'erpende & tournoye les riches campagnes, il arrouse le pied des monts voisins, il refraichit les vertes prairies, il recree les villes, & toutes les places où il se pourmene, & leur depart de sa gracieuse fraicheur & humidité. Mais s'il y a quelques torrents bourbeux & impetueux qui les troublent, & s'opposant aux cours de ses eaux, qui le fachent & emplissent de colere, c'est lors que ronflant, bouillant, & escumant de dueil, il renuerse ses digues, il noye les terres, il arrache les arbres, il esbrâsse les ponts, il effroie les villes, & que nul ne les voit sans estonnement, nul ne le passe sans tremblement. Somme qu'il est autant terrible en son impetuositè, qu'il estoit doux & plaissant en sa tranquillité. C'est, SIRE, l'estat de vos diuerfes actions, qui se sont renduës esmerueillables, non à moy seul, ni à vos subies & seulement, mais à tous vos voisins, & aux plus esloignez des Princes de l'Europe. Et qui considerera les de-

R E M E R C I M E N T

grez ; par lesquels vous estes monté à ce souuerain theatre d'honneur, qui est la royauté, & les aduantages qu'en particulier Dieu vous y a donnez, & qui ne sont communs aux autres Princes, c'est dequoy il s'esmerueillera encore plus.

CAR premierement il vous a donné tiltre de Prince, & non de Prince seulement, mais de Prince de France. Prince non fait d'aventure, mais Prince nay & formé de Nature. Qui n'est pas vne petite puissance, ni vn don de petit moment. D'autant qu'il y a plusieurs Princes, qui ne sont Princes naturellement, mais Princes faits fortuitement. Ainsi disoit-on de Caius, & Lucius Cefars, enfans d'Agripa & de la fille d'Auguste, qu'ils estoient Princes d'adoption, & ne l'estoient d'extraction. Or cest vn honneur singulier de naistre Prince, d'estre à la teste & non aux pieds, d'estre vn mont de Liban, & non vn vallon de Raphain, d'estre vn chesne haut & sourcilieux, & non vne petite bruyere, d'estre vn soleil, & non vne basse estoille, d'estre vn Tibre, & non vn ruisseau, ou plustost d'estre vne mer de grandeur, &

vn Ocean de toute dignité & amplitude. Et certes, il n'y a perſonne des nauigans, qui voyant en l'Archipelago le mont d'Athos, comme vn grand Roy des basses campagnes, s'esleuer si haut sur la superficie de la terre, & ietter son vmbre si auant dedans la mer, qui iustement ne s'en estõne. La dignité de Prince est bien haut esleuee sur le populaire bas, & qui regarde sa sommité, ou seulement qui contemple son vmbre, il a iuste raison de s'en esmerueiller. On diët des Indiens Gymnosophistes, que depuis le matin iusques au soir, ils regardoient continuellement le soleil, & ne regardoient autre chose. Ils auoient raison, puis qu'il a dequoy tousiours s'esmerdeiller en luy, & tousiours dequoy contempler sa lumiere. Or le soleil n'est que l'image viue, des Princes de la terre, pour ce que c'est le Roy de ce monde sensible. C'est le gouuerneur des saisons, c'est le Prince des astres, c'est le monarque des elemens : bref c'est celui sous la puissance duquel, se meut la disposition & composition de la nature elementaire. Je dis celuy qui a chasque

R E M E R C I M E N T

moment opere entre nous des choses merueilleuses, & qui nous taille à chaque iour dequoy admirer ses œuures, & dequoy louer sa beauté. Il en est ainsi des Princes. Car qui iettera l'œil sur les graces qui les accompagnent, il verra vne source de rayons admirables, & vne fecundité de hautes habitudes, dont Dieu les a comblez, & dont le ciel & la terre sont iusteement esmerueillez. Si les hōmes seulement regardent les cieux, & qu'ils contemplent les planettes esleuees si haut sur leurs testes, la veüe bien souuent leur fait mal, & sont en leur contemplation, cōtrains pour la recueil- lit, de la retirer en terre. Aussi ceux qui iettent leur regard sur le comble de la principauté, esblouis de chose si haute, & d'une sommité si grande, sont le plus souuent par debilité de leur veüe, cōtrains de reuenir à terre, & laisser ceste hauteesse sans plus lōgue disquisition. Je Içay bien toutesfois, que la naissance des hommes a sa reigle commune, & qu'elle se fait par moyens communs, autant des grands que des petits, autant des riches que des pauvres. Mais ie sçay bien

bien aussi que comme les fondeurs font des images de plomb & de cuyure, ils en font aussi d'argent & d'or, que celles d'or & d'argent estant de plus excellente matiere, sont aussi de plus grand prix que les autres. Le mode est la boutique commune, où Dieu (ce grand fondeur) fait ses images de tous metaux & de toutes figures : mais où l'or & l'argent de la Principauté est employé, il est bien de plus grande estimation que le plomb ou l'estain de leurs sujets.

Entre les pieces de monnoye, les vnes valent plus, & les autres moins : aussi entre les homes, les vns sôt de plus haute marque & de plus riche alloy, & les autres de moindre valeur & de moindre requeste. Il y a grande difference d'un Vlyse & d'un Tersites, d'un Achilles, & d'un Authomedon, & mesme entre les Princes d'un Menelaus, & d'un Paris Alexandre : comme il y a difference de l'or, à l'or, & de l'argēt à l'argēt. L'estoffe des Princes n'est point vne estoffe vile & commune, c'est vne argile noble & precieuse qui ne reçoit estimation. La seule rareté leur doit concilier l'amour & la re-

R E M E R C I M E N T

uerence des autres hommes, car la Nature ne fait thresor que de choses rares.

On ne fait pas, disoit le prouerbe, les Mercurcs de tout bois, ni le royal vnguent des Perles de toutes espiceries, ni le mitridat de toutes drogues. Aussi peut on dire avec verité, que de tout metal, on ne fait pas la personne des Princes. Il faut bien que Titan ait long temps recuit l'or qui entre en ceste composition, & faut que la matiere soit bien excellente, puis que Dieu l'a preposée sur les hommes, avec autant de hauteur, qu'en a le firmament sur les plus basses contrees de la terre. L'image des Dieux payens se faisoit de bois de Thia, duquel parle Homere: & comme ce bois estoit diuin, aussi en composoient-ils leurs diuinitez, & donnoient la matiere selon la chose. Le bois, dont se forment les Princes, n'est point vn bois commun, c'est quelque chose de rare & de singulier, que la Nature ne produit ni tous les iours, ni tous les ans. Et comme on tient qu'elle est fort lōg temps à la composition de l'or, qui est le Roy de tous les metaux, aussi est-elle long temps à la

composition d'un iuste Prince, qui est le conducteur des hommes, & le pasteur de tant de troupeaux humains, voire l'Ange gardien de tant d'ames raisonnables. On voit ordinairement que les atours des Dames, & principalement ceux dont elles parent leur chef, sont composez & d'esmail & de pierres precieuses. Aussi l'estoffe dont Dieu orne le chef des monarchies, & les souveraines testes des royaumes, ne consiste qu'en choses rares & singulieres. Ce s'ont toutes esmeraudes, rubis & diamants, qui ont les esclats si brillans, qu'ils font des esclairs à nos yeux, & des merueilles à nos ames. Voila la matiere dont Dieu a voulu composer la premiere partie, de la noble puissance qu'il vous a donné, & dont, SIRE, vous luy ferez recepte vn iour en vostre compte.

¶ I'ay adiousté, SIRE, que vous n'estiez pas Prince seulement, mais Prince de France. Ce que i'ay dict pour vne excellence singuliere, & vne remarquable & sureminente qualité. Car tout ainsi qu'il y a des choses desirées pour les lieux où elles croissent, & que la palme

REMERCEMENT

royalle est recommandee des jardins du Roy de Perse, les myrthes du pays d'Ægypte, les oliuiers de l'Atique, & les lauriers plantez aux parterres des Césars: ainsi sont les Princes tirez, & triez du jardin delicieux de la maison de France. Et comme on dict que les Mages estoient en Babylone, les philosophes en Athenes, & les grands senateurs à Rome; aussi les grands Princes se sont trouuez entez, & plâtez au terroir de la France. On admire les cedres du Liban, les chesnes de l'Appennin, les citrons du mont Athlas, les sapins des Alpes, mais on renomme les Princes nez au sol François; pour la hautesse de leur courage. Et certes, ce terroir en a tousjours esté fort peuplé, & dès les siècles plus antiques, la France a esté le delicieux sol, où ont creu, fleury, & boutonné les hautes fustayes de la principauté. Aussi le ciel n'est point si luisant en ses diuerses clartez, comme en diuerses vertus nos Princes ont esclatté par tout le monde. Car qui n'a veu, ou qui n'a leu leur pitié, leur iustice, leur temperance, leur magnanimité? Je puis dire, que tout ce

que les genereux esprits peuuent conceuoir ou perceuoir en vertus, les Princes de France les ont eues, voire en abondance. I'oseray, SIRE, prendre comparaison de vostre Maesté, en chose qui approche ordinairement vostre Maesté. Car tout ainsi qu'ë quelque endroit que vous residez; vous estes tousiours accompagné de tres illustres Princes, de magnifiques Seigneurs, & braues gentils-hommes, pompeusement montez & habillez: tout ainsi nos Princes en quelque part qu'ils se soient parquez, ont esté veus & recognus brillans & esclattans d'un monde de vertus quiles accompagnoient, & qui les ont faict aymer & desirer, de toutes les nations de la Chrestienté. Le ciel a son soleil, & il a ses estoilles, aussi la France a ses Princes, & si elle a son Roy: Et comme entre les estoilles il y a des planettes, dignes chacune de gouuerner vn ciel; ainsi entre les Princes, la terre a iugé qu'il y en auoit de dignes de commander à ses Prouinces, & dignes d'estre aymez & desirez des autres peuples.

Ce qui me faict souuenir de ce qu'es-

R E M E R C I M E N T

criuent les philosophes en discourant de la Nature. Car, disent-ils, il y a des animaux, comme la panthere, dont l'odeur est si suauë, que les autres les suivent & les desirent par plaisir. Et parlant du corps de la terre, ils escriuent, que quelquesfois il exhale par ses pores, principalement apres vne grande pluye, vn parfum si odorant, qu'il n'y a odeur qui luy soit comparable. A ceste occasion, disent ils, naturellement on les desire, naturellement on les approche, & naturellement on les suit en quelque part qu'ils se rencôtrent. On en peut dire autant de nos Princes, qui ont exhalé de si suauës odeurs de vertu, par les pores de leurs diuins esprits que toute la terre a esté esprise comme d'amour, afin de iouyr de leurs personnes. Ainsi les anciennes villes de Grece & d'Asie, cognoissant en Homere quelque chose de diuinité, se sont debattuës du lieu de sa natiuité, & l'ont vendiqué comme leur citoyen. C'est Pourquoy Ptolomee Roy d'Ægypte, luy donnant vn Temple superbe en son pays, le fit assis avec grauité en vne chaire, & tout autour de luy,

les douze villes qui se battoient , pour l'honneur de l'auoir engendré: Et certes les hommes ont de Nature cet appetit, que toutes choses belles & odorantes ils les desirent. Ce desir a espointé toutes les nations de la terre, qui voyant la splendeur & generosité des Princes de France, les ont aiméz & desirez 'pour s'assubjectir à eux, & les seruir & honorer comme leurs Princes. Car tout ainsi que le riche laboureur tire de son grenier le froment le plus beau pour en faire la semence de ses terres; de mesme façon, Dieu qui est le grand pere de famille qui cultiue tout cet vniuers, choisit du grenier de la France, le pur froment de la noblesse Françoisse, pour en semer les champs Chrestiens, & tous les plus riches heritages de l'vniuers. De là sont venus les Foulques d'Anjou, Rois de Hierusalem: de là les Lusignens, Rois de Cypre: de là nos enfans de France, Rois de Naples & de Sicile: de là nos Louys Rois de Hongrie: de là nos Philippes Comtes de Flandres, & infinité d'autres, qui pour la reputation de la maison de France, & pour les excellen-

R E M E R C I M E N T

tes parties dont Dieu les auoit honorez, ont esté appelez aux couronnes estrangeres, & aux gouuernemens des plus insignes empires de la terre. Car on les a tirez de la principauté & noblesse de France, comme on tire d'un magazin plusieurs belles pieces de marchandise, pour les enuoyer en toutes les parties du monde. Cela me faict resouuenir, de ce bel estuy trouué par Alexandre, apres qu'il eust deffait Darius. Car comme il estoit orné de la plus noble & riche pierrierie, qui fut non seulement en Asie, mais en tout l'Orient, ainsi la Frâce a esté le riche estuy, dont on a tiré les plus illustres Princes, & les plus nobles diamants, dont on ait orné le corps de la Chrestienté, voire le chef glorieux de tout l'vniuers. Les Romains estoient, qu'au Capitole de Rome, contre le grand autel de Iupiter Capitolin, il y auoit plusieurs autels dediez à des Dieux particuliers, où de Rome non seulement, mais de toutes les parties d'Italie, on y enuoioit des offrandes, afin d'implorer leur secours, és choses de leur estat. Ainsi outre la souveraine Majesté de nos Rois, infi-

niment & perpetuellement aimable, & respectable, & qui a esté le secours, & l'amour de tous les Roys affligez, on a veu la grandeur de nos Princes François, que les nations ont aymez & recerchez, pour leur dōner leurs sceptres, & les orner de leurs couronnes. Aufquels cōme à des Dieux tutelaires, de toute la rondeur de la terre, on a donné des offrandes. En vn mot, ils ont esté les amours du genre humain, & le desir des enfans des hommes. Dequoy nos histoires en sont si pleines, que si de presēt on les lit, on y trouuera de grands esguillōs, pour courir à la vertu. On peut bien consulter hardiment ces liures, comme les miroüers de la vie humaine. Car on y verra ou de grandes difformitez pour les amēder, ou de grādes beautez pour les re cōmāder. Et certes entre les Romains, qui mal cultivoit son champ, estoit par le Censeur marqué d'ignominie.

Il y a encor vne particuliere faueur, de la puissance que Dieu vous a dōnée, qui est certainement de haut lustre & de grande splendeur, que vous soyez yssa de la maison de Bourbon, voire du

REMERCEMENT

sang de Monseigneur sainct Louys, l'un
 des plus sages & religieux Rois que la
 terre vit oncques. Car on louë, & à bon
 droit l'or qui vient d'une bonne veine,
 & le genereux cheual qui vient d'un bon
 pere, & la vigne qui vient d'un bon com-
 plan. Mais la maison de Bourbon n'a
 dequoy se glorifier d'auantage, que de
 la souche de Monseigneur Sainct Louys.
 Car ç'a esté l'esprit viuifiât qui a animé,
 & fait mouuoir à la vertu toute ceste
 noblerace. On n'ignore pas toutesfois
 qu'elle a de soy des vertus excellentes,
 voire singulieres & singulierement bel-
 les & recommandables. Car qui est des
 humains qui n'ait aymé & estimé la lu-
 miere de ce Soleil? Mais elle les doit im-
 puter à ce chef, comme le bon arbre fait
 ses fruiçts à sa racine, & la racine sa fe-
 condité à la bonne terre qui l'alimente.
 Apres ce rapport, elle peut prendre le
 reste en son partage, d'autant qu'il luy
 est iustement deu. Et à la verité ce qu'est
 le soleil au ciel, & l'œil en la face, voi-
 re ce qu'est la prunelle de l'œil en l'œil, la
 maison de Bourbon l'est sur toutes les
 maisons de France. Les Parthes autres-

fois se sont loüez de leurs Arfacides, & les Grecs de leurs Agiades, & les Latins de leurs Æmilles: mais la France se vante de ses Bourbons, & riē plus que de ses Bourbons. Car cōmme en l'Arabie certaines familles seulemēt, auoiēt ce droit de toucher l'encens qui estoit sacré, ainsi ont-ils ce droit de toucher à la Royauté, laquelle ils approchent de plus pres que tous les autres. On ne peut nier qu'elle n'ait esté l'vne des plus genereuses branches, qu'ait porté iamais le tronc de la couronne de France. Et certainement, ceste maison pleine de fleurs de lys, a eu la vertu en telle abondance, qu'il n'y a eu petit brin fort de ceste branche, qui n'ait porté des fleurs admirables, voire des fruiets incomparables & dignes de rare singularité. Les enfans de Seleucus, auoient tous à la cuisse vne ancre imprimee, pour la marque certaine du tige de leur extraction: & la race de Pithon de Nisibe, auoit l'impression au corps d'vne hache, qui tesmoignoit l'honneur & la generosité de leur lignee. Mais en la race de Bourbon, les anciens ont remarqué, qu'ils nais-

REMERCIEMENT

soient tous la hache en la main, & la prudence en la teste, & la generosité au cœur, qui est l'ancre ferme, pour sifster au port les plus nobles estats, & les tirer des plus perilleux destroits, où les jette la tempeste.

L'antiquité Romaine a obserué en la famille des Fabiens trois Princes du senat, en celle des Curions trois orateurs. Aux vnes tant de censeurs, aux autres tant de dictateurs. Mais en la famille des Bourbons, on ne marque, ni trois, ni quatre, mais force grands & nobles Princes, qui tous ont faict paroistre la grandeur de leur vertu. La terre vniuerselle a obserué en eux vne incroyable pieté, vne incōparable generosité, & vne admirable fecondité. Leur pieté cōtre les Sarrazins, leur generosité contre la fortune, leur fecondité contre le tēps, qui deuore tout, & qui reduit tout à la mortalité. En Leuant parut leur pieté, en l'Europe leur generosité, en France leur heureuse fecōdité. De sorte que l'on dit de ceste maison, que les femelles sont nées pour peupler la Chrestienté, & les masles pour la defendre. Cela me faict

souuenir de ceste vigne de pur or, dont Pithias Bithinien fit present au Roy Darius. Car il semble que Dieu ait fait vn present de ceste lignee, comme d'une vigne d'or à nostre France, pour la multiplier en diuerse fecondité. C'est vne vigne en rapport semblable à celle que Seneque achepta de Palæmon, le grammairien, & qui fut vne merueille de l'Italie. Aussi a-elle estendu ses rameaux & ses branches, voire ses fruiets, & ses prouins en diuerses contrees de la Chrestienté. Et comme les Romains enuoyoient en la Grece, pour auoir *Æsculape*, & *Iupiter l'Olympien*, afin de les emmener & consacrer en leur ville, & en retirer profit, & commodité pour leur estat; ainsi les Princes de ceste maison pleins de vertu, & de vigueur ont esté iustement desirez & demandez pour en auoir du plan, & en gouster les fruits par tout le monde. Ils estoient si genereusement nez, & si religieusement nourris, que leur seconde magnanimité, & leur religieuse generosité cauſoit aux hōmes la cupidité de les voir, & de les auoir pour Princes. Et certes la terre en a

R E M E R C I M E N T

par tout tiré des greffes, comme d'un arbre singulier. Je diray mesmes que les infidelles qui ont senty souuent la main, & la vigueur de ces Princes l'ont crainte, aymee, & recherchee pour leur vertu. Aussi les bōmes de vertu, ne loüent pas seuls la vertu, quand les vicieux l'honorent, & qu'il n'y a personne, qui plus honorablement parle de la lumiere que les aveugles. Ceux qui ont leu les manuscrits de ceste race, confessent qu'ils n'ont jamais leu, ni des Grecs, ni des Latins, chose approchante de leur generosité naturelle. Et quand il n'y auroit autre marque de sa grandeur, sinon le long temps qu'elle dure, c'est assez pour luy donner vne insigne loüange, voire vne insigne place au temple d'Honneur. Car on louë les arbres pour leur aage, & les palais pour leurs ans, & les familles pour le temps.

Or ceste maison de Bourbon est vn Phœnix entre les nobles. Ces Princes sōt des Nestors entre les hommes, pour le long temps que leur race a vescu. Car depuis l'an 959. iusques à present, elle a flory pleine de prosperité, & d'honneur.

Et pour le comble de tout son heur, elle a produit vostre Majesté, comme le plus noble fleuron, & le mieux marqué d'excellence qui vint de ceste branche. C'est où elle a assigné le but de sa grandeur, & où elle a fait la baze de ses plus grâdstrophes: C'est le poinct où son angle finit, c'est l'extremité de sa ligne, c'est le cêtre de sa circonférence. Le meilleur du cynamme, est en la sommité, & en la sommité du pin gist l'ornemēt, & la vie de l'arbre. Et certes ceste famille se resiouit, & à bō droit, que par vne glorieuse rencontre, & par le mariage de Monseigneur Robert de France, elle ait esté celestement vnīe à la maison du Roy saint Louys vostre predecesseur. Car apres auoir amassé beaucoup d'honneur, elle y en a trouuee encore d'auantage. Aussi ce mariage se peut iustement comparer à vne grande riuīere, qui ayant longuement baigné, & tournoyé vn monde de pays, se rencontre de fortune, voire se joinct, & se marie à vn grand fleuve, & tous deux meslans leurs ondes, & les estendans sur le champ où elles passent, recréent tous les lieux d'une plaisante &

REMERCIEMENT

gratieuſe humilité : & puis enſemble ſe vont deſcharger dans les eaux de l'Océan, où dans le ſein profond de quelque mer prochaine.

SIRE, c'eſt ce fleuve abondant qui a conduit le bon heur de voſtre maiſon, dans le large & profond Océan d'honneur, & dans le vaſte fonds de la dignité royale. C'eſt ce fleuve qui a porté la nef des Bourbons, au ſupreme degré de la couronne des François, ſous le vent gratieux de voſtre admirable & nō comparable felicité. Et certes quand ie conſidere cōme la couronne de France, a paſſé legerement, & ſans beaucoup s'arreſter aux maiſons de Valois, d'Orleans, & d'Angoulesme, & que i'ē regarde les entrees & les iſſuës: ie penſe voir vn voyageur, qui ſans ſejourner en beaucoup de beaux lieux, & de belles maiſons qui ſe preſētent en ſon chemin, marche & paſſe touſiours auant pour gagner vn noble manoir où il tend, & n'a ceſſe, ny repos qu'il ne ſe voye où il deſire. Car ie croy que ceſte couronne vous cherchoit, & croy SIRE, qu'elle vous ay-

moit, & deſiroit pour quelques ſecret-

tes

tes vertus qui luy apparoissoient, & que depuis monté sur le theatre de la roiauté, vous luy auez fait paroistre. Je croy dis-je qu'elle vous cherchoit, & qu'elle attédoit vostre natiuité, pour loger en la maisõ de Bourbon, où vous lui auez donné logis tresagréable, & tresdesirable. Et certes, quád ie li que Mõseigneur Louys de Bourbon, fit bastir pres de vostre maison du Louure, l'hostel de Bourbon, avec ce mot **ESPERANCE**, ie pense que c'estoit pour l'esperoir qu'il auoit, que vo⁹ deuez de son estoc naistre en ce monde, & que vous vniriez les deux hostels en vn, cõme vous auez joint & vni les deux maisons ensemble. C'est vous **SIRE**, qui auez osté la bade de leurs armes, pour iouyr du pur escu des fleurs de lis. C'est vous qui auez laissé le nom de Bourbon, pour prendre le nom de France, & pour couvrir vostre chef d'une couronne qui n'a, & qui n'eut onques sa semblable. C'est vous qui le premier luy auez donné cet ornement, d'auoir des Rois de France en sa branche: & comme elle est yssuë de Rois, qu'elle portast encore la couronne & le

REMERCIEMENT

sceptre des Rois, & qu'elle representast à la posterité, les innombrables vertus cachees dedans le tige de Monseigneur saint Louys. Or face la bonté de Dieu qu'elle y demeure longuement, & que Dieu puissant qui distribuë les couronnes, face que Monseigneur le Dauphin, vostre fils, succedant à vostre heur & à vostre honneur, passe Clouis en religion, Dagobert en deuotion, Charlemagne en cœur & en valeur, Capet en bon heur, Robert en equité, saint Louys en sainteté, en sagesse Charles cinquiesme, en bonté Louys douziesme, en clemence & magnanimité vous mesmes.

FA DI O V S T E encor à vos singularitez, que Dieu vous ait fait naistre de Roy & de Royne, qui n'est pas petite faueur, quand la Vertu les accompagne. Et certes on peut dire de vostre Majesté ce que chantoit Homere de son Agamemnon.

*Il n'y eut ouques Roy sur terre couronné,
A qui plus grand honneur Iupiter ait donné.*

La dignité de Roy est vne haute &

rare dignité, qui ne degoute pas si sou-
uent sur le chef des hommes, comme la
pluye fait sur la terre. Car ce qu'est Dieu
au ciel, ce qu'est le soleil icy bas, les Rois
le sont entre les hommes. Dieu ne met
pas tous les iours la main en ses tresors,
pour faire vne largesse de couronnes.
Ce don est trop grād & trop riche pour
estre vulgaire, & vulgairement donné
& public. Aussi la terre est grande
mais elle n'a esté diuisee qu'en peu de
monarchies. Il vous a donques fait ce-
ste faueur de naistre de Roy & de Roy-
ne, & comme vne Pandore, il vous a
comblé d'une infinité de dons. Il vous a
fait cōme nos tēples où chacū apporte,
& que chacun desire d'orner & d'enri-
chir. Et à la verité c'est vne noble extra-
ctiō d'estre venu d'un Roi: mais c'est aus-
si vne honorable generatiō d'estre enfāt
d'une Roynē: & qui vient de tous deux,
il peut dire que l'honneur lui assiste d'un
& d'autre costé. Les fleuves yssus de
deux grādes sources meslees ensemble,
sont ordinairement grāds & plātueux.
Tel est le Iourdain ou le Ior, & le Dan,
deux nobles fontaines, fournissent des

R E M E R C I M E N T

eaux en abondance. Les cordons doubles, comme le cordon Gordian, font leurs chesnes d'une grande force: & fors les Rois yssus de deux grandes puissances. Quand le soleil & Jupiter se joignent à la naissance de quelqu'un, c'est pour en faire quelque chose de grand. Aussi quand deux supremes dignitez se ioignent ensemble, c'est pour engendrer quelque chose de singulier. L'or & la pierrerie placez en vn mesme vaisseau, le font fort honorable, & la rose & l'oeillet ensemble appariez font le bouquet tres beau.

Considérez, S I R E, s'il vous plaist, quand le Soleil est en conionction avec la Lune, les heureux effects qui en ensuiuent. Car non seulement le iour en est plus gay, mais la nuit plus plaisante, qui luit de mille feux brillants, & qui fait honte au plus beau iour. Somme que de ceste gracieuse assemblée il ne sort qu'un heureux part de prosperité. Car le miel s'y amplifie, les poissons y accroissent, & toute la Nature y fait profit. Ou quand ces deux flambeaux sont en eclipse, le ciel est triste, la terre obscure, tout est

menacé de sinistres évenemens. C'est pourquoy la Royauté iointe à la Royauté en vostre naissance, a engendré le sōmet de la Royauté qui luit sur vostre teste. Je me souuiens du liuré des Rois, qui parlant du regne de Salomon, le loué d'auoir esté rempli d'or & de pierres precieuses. C'est à dire, que les deux choses plus estimees entre les hōmes, estāt ensemble, & à foison? elles y engendroient vn siecle plein de grandeur & de prosperité. Et certes vostre origine a esté le fondement de vostre heur. Elle a esté comme le presage d'estre vn iour préposé sur tant de nobles François, & tant de riches Prouinces, & d'estre le Monarque d'un si grand & noble Royaume. Car la grandeur de l'empire, & la multitude des subjects, est la gloire des Rois. Aussi quand les lettres saintes parlent d'Artaxerces, elles le louent, que son sceptre s'estendoit sur cent & vingt sept provinces, qui continuoient depuis l'extrémité de l'Inde, iusques aux derniers bords de l'Égypte. Qui n'estoit pas vn petit pays. Et routesfois, ce grand Tout ne pouuoit aborder à la beauté de vostre

REMERCIEMENT

estat beaucoup plus petit en quantité,
mais plus noble en sa qualité.

C'est l'obligation, SIRE, c'est
l'hypothèque que Dieu a sur vous, &
dont vous sçaurez biẽ vn iour luy satis-
faire. Car vous ayant donné tant de glo-
rieux titres, vous sçaurez bien luy en
rendre le proufit qu'il en attend. Et à la
verité il est vn marchand fort exacte, il
veut que son denier luy proufite à nota-
bles interets, & qu'il ne demeure en
oysiueré. Il ressemble aux laboureurs,
il sème pour recueillir, il cultiue pour
vendanger. Aussi les bons Rois doiuent
faire ce que font les bons miroirs; car si
on leur présente vne belle face, ils la
rendent belle, & par reflexion, ils ren-
uoient la beauté à son auteur.

Ce qui nous est proposé és lettres
sainctes, en ces vingt quatre Rois vicil-
lards, qui se prosternent deuant Dieu,
seant glorieux en son throsne, & qui
courbās les chefs deuant la face, lui pre-
sentent leurs couronnes: C'est à dire,
qu'ils luy rendēt l'honneur de la Royau-
té, dont il les auoit gratifiez. Car cela est
l'argument d'un esprit bien nay, & qui

retient de la nature des Graces. Pour ce qu'on dict que les trois Graces se tiennent par la main : la premiere donne le plaisir, la seconde le reçoit, & la tierce le rend. De sorte que le bien qu'elles ont receu d'une main, elles le rendēt de l'autre. Sainct Bernard ce religieux moine François, dont Dieu fut le seul precepteur, & ceste grande lumiere de la France, nous enseigne de n'estre coquilles, mais canaux. Qui est proprement vn mot digne de l'escolle de Pithagore : Car il nous exhorte de n'estre reserrez & ingrats, ains larges & recognoissans enuers la Maiesté de Dieu. Parce que la coquille ne rend iamais que quand elle regorge : le canal au contraire rend par vn bout ce qu'il reçoit de l'autre. Entre les Princes anciens, à qui Dieu a donné d'honorables tiltres, ç'a esté à Agripine, car elle estoit fille d'Empereur, sœur d'Empereur, femme d'Empereur, & mere d'Empereur. C'estoit en vn seul sujet beaucoup de rares qualitez : l'une d'elles estoit suffisante, pour beaucoup honorer vne Princeesse. Elle toutesfois ingrate & mal recognoissante, souilla sa

R E M E R C I M E N T

vie de tant de vices & monstrositez,
 que les auteurs qui ont parlé d'elle l'ont
 autant diffamee, que les tiltres glorieux
 l'auoient honoree. Et comme Dieu l'a-
 uoit fait naistre pour vn soleil, qui pou-
 uoit beaucoup rendre de splendeur & de
 plaisir; les broüillas de ses vices, lui en-
 gendrerent tant de tenebres, qu'elle de-
 uint vne noire & espoisse nuée, pleine
 d'orage & d'obscurité, qui fist mourir
 beaucoup de nobles citoyens à Rome.
 Aussi estoit elle si haye, que les au-
 theurs qui parlent d'elle, & qui la veu-
 lent distinguer de sa mere qui auoit mes-
 me nom, mais vn autre renom: disent
 que c'est Agrippine, qui engendra Ne-
 ron, l'aconit & le venin du genre hu-
 main. Et certes elle estoit si detestee,
 mesme de son premier mary, qui fut
 Domitius, qu'il disoit ordinairement,
 que de luy & d'elle il ne pouuoit
 venir qu'vn horrible monstre. La
 Royauté, SIRE, est comme vn grand
 flambeau haut & esleué, & suspendu au
 plancher d'vne belle salle: lequel estant
 allumé en toutes ses diuerses branches,
 rend vne belle & agreable clairté.

Mais si uu lieu d'esclairer, il fume, non seulement il obscurcit toute la salle, mais il empuantit tout le logis, & tire les larmes des yeux d'un chacun, & fait que tous les meilleurs seruiteurs, & amis de la maison, abandonnent la maison. Quand on voudra comparer l'inhumanité d'Agrippine avec vostre douceur, & de bonnairété, SIRE, on verra de quels vices & de quelles vertus est capable la Royauté. Laquelle à la verité est de soy beaucoup aimable, & grandement respectable, mais elle fait diuers effects, selon le sujet où elle se trouue. Car si elle tombe en un bon naturel comme le vostre, elle fait des actions de douceur esmerueillables, si elle en rencontre un mauvais, elle en fait de funestes, voire espouuentables. Les eaux sont telles qu'est le terroir d'où elles viennent, & tels les fruiets que l'arbre qui les a portez. C'est donc un grand honneur que Dieu vous a fait, de vous qualifier si hautement, & de vous faire naistre si roialement. Et volontiers les branches de la Royauté, peuplent l'arbre de la Royauté, & sont comme la fraize, qui fait racine de ses

R E M E R C I M E N T

fueilles. Et certes, la France ne peut experimenter de meilleurs Rois, que ceux qui sont sortis de la tige de ses Rois.

Mais le supreme degré de faueur & de felicité mondaine que Dieu vous a faite. C'est d'auoir esté Roy, non d'un seulémēt, mais de deux Royaumes. Car on peut dire de vous, ce qu'un Poëte dit d'un grand Empereur.

*D'un & d'autre costé la fortune luy donne,
Qu'il porte sur son chef vne double couronne.*

Ceux qui aux ieux Olympiques, pouuoient meriter yne couronne d'oliue, pensoient auoir acquis honneur, & reputation pour toute leur vie. Mais si cest honneur redoubloit, & qu'ils r'emportassent la couronne pour la seconde, c'est lors qu'ils pensoient auoir acquis vne immortalité. Iugez, SIRE, s'il vous plaist, combien vos couronnes sont plus honorables quand vous ne les auez de la main des hommes, mais de la main de Dieu: & qu'elles ne sont de laurier ou d'oliue, ou de quelques fueilles mortes, qui n'ont qu'un soir, ou vn matin, mais deux couronnes de pur or, d'or

la matiere est autant excellente sur tout le reste des metaux, que vostre couronne, a d'excellence sur tout le reste des couronnes.

On dict que Ptolomee, Roy d'Ægypte, apres auoir vaincu, & deffait son gendre, faisant son entree dedans Antioche, print deux couronnes sur son chef, & se fit proclamer Roy d'Ægypte, & d'Asie. Dieu vous en a donné deux, comme à luy: mais il vous a donné plus qu'à luy, que vous auez au chef la couronne des couronnes. Car la seule couronne de France, dont Dieu vous a honoré, a quelque chose de plus haut, que n'eurent onques, ni les couronnes d'Asie, ni celle d'Ægypte. Et comme il n'y a qu'une couronne au ciel entre les astres, aussi n'y a-il qu'une couronne en terre, qui est la couronne que vous portez. J'ay souuenance d'auoir leüs dans Froissart, qu'apres la bataille de Calais, le Roy d'Angleterre Edoüard, troiziesme tira vn chapelet de perles, qui serroit ses cheueux, & apres le soupper, & les tables leües, en la présence de tous les Princes, Barons, & Cheualiers, il le

R É M E R C I M E N T

mit sur la teste d'un Cheualier François, Messire Eustache de Ribault, avec honneur. Car il luy dit, *Messire Eustache, ie vous donne ce chapelet, pour le mieux combattant de la iournee, de dedans & de dehors, & vous prie que vous le portiez ceste annee pour l'amour de moy. Je sçay bien que vous estes gay, & amoureux, & que volontiers vous trouuez entre Dames & Damoiselles. Si dictes par tout où vous irez, que ie le vous ay donné. Si vous quitte vostre prison, & vous en pouuez partir demain, s'il vous plaist. C'estoit à la verité beaucoup d'honneur, d'estre proposé à tant de grands Princes & Cheualiers, qui auoient ce iour-là faict preuue de leur vertu. Mais c'est encor d'auantage, que ceste loüange, vint d'un Prince ennemy, & à l'endroit d'un François: & de la part, d'un Roy estrangier, voire d'un Anglois, & d'un Roy si grand si hardy, & si renommé, qu'on le tenoit pour l'un des plus nobles Princes, qui fut oncques.* Aussi print il en bataille deux des plus grands Roys de l'Europe. Mais (Sire) tous ceux qui vous voyent en ce haut degré de Majesté, où vous estes, pensent voir la fortune, (i) se

de ce mot selon le vulgaire) qui faiët vn festin à tous les Roys de la terre, & qui en leur presence, & à leur veüe, desliant deux couronnes qu'elle auoit sur la teste, les impose sur la vostre, & declare hautement, qu'elle les vous donne, comme ayant esté le plus magnanime Prince, qui ait combattu contre elle, en la campagne du temps present. Dequoy toute la France s'esioiit. Et certes elle en a subiect, & occasion, voire plus de subiect qu'elle voit ceste fortune, qui vous tient non seulement pour son amy, mais pour son mary. Car d'un amy les femmes quelquesfois se deffont, mais d'un mary, la souldure en est plus forte. Elle qui ayme la nouveauté, & qui est legere, & inconstante, n'a eu iamais aucun arrest en ses actions. Mais en vostre personne, il semble qu'elle s'y est arrestee pour y demeurer. Vous auez esté non le puiot, où elle a tourné, mais le bois où elle a fiché, & arreste le cloud de son inconstance.

Aussi croit-on qu'elle vous aime, pour espouser, & vous a espousé pour vous garder, & vous a gardé pour vous hon-

R E M E R C I M E N T

norer d'amitié perpetuelle. Car si elle vo⁹ a chery en ieunesse, elle vo⁹ carresse hors de ieunesse, & si vostre Printēps luy a pleu, vostre Automne luy est tres-aggreable. En verd, ou en gris, elle est tousiours à vous, bien que cest humeur luy soit chose inaccoustumee. Et certes le monde croit que pour vous seul, elle a contrainct son naturel. Ouy SIRE, on le croit, & dit-on qu'elle se violente soy-mesme pour vous estre aggreable. Aussi vous a elle honoré de deux couronnes. Enquoy Sire, vous considererez s'il vous plaist, quel plaisir a eu vostre peuple de voir reioindre à la couronne de France la couronne de Nauarre. Car c'est cōme deux sœurs, bien vnies d'amitié, qui sorties de mesme sãg, & de mesme vërre, sont quelquefois par mariage bien esloignes l'vne de l'autre. Que si par cas fortuit elles viennent à se reuoir: O bõ Dieu combien de baisers, combien d'embrasemens, combien de carresses! Je pense voir ceste Laconienne, qui reuoiant desesperément son enfant vis, qu'elle pensoit perdu, se pãme de ioye, & tombe morte de plaisir entre ses bras. C'est vo⁹

Sire, qui auez moyéné ceste entreueüe. C'est vous qui auez causé ceste reünion par vostre bonne fortune. C'est vostre prosperité qui a fait ce coup. C'est vous qui auez comblé ce Royaume, de cest aduantage à vostre ioyeux aduenement. Enquoy vous auez ressemblé ces honnestes maris, qui espousans quelque belle & honneste Dame, luy font present de quelque anneau de prix, pour luy donner du lustre d'auantage. Et certes nous croyons tous, que ces heureux Comtes de Champagne, qui ont tenu la couronne de Nauarre auparauât vous, & nos Philippes, & nos Louys, qui l'ont ioincte autresfois par mariage, & par succession, aux odorants boutons de la couronne de France, s'en sont infiniment resiouïs. Car ceste couronne est comme vne belle Dame, qui a ie ne sçay quoy d'agreable en sa beauté, qui rait tout le mode. C'est ceste Venus de Lisippe, que personne ne voit qui ne l'aime. Aussi est-ce la couronne la plus noble, & la plus precieuse de toutes les couronnes d'icy bas. C'est la roze des diademes, la Royne & l'Emperiere de tou-

R E M E R C I M E N T

tes les couronnes clausés, que les hommes ont iamais portées dessus leur chef. Quand ie parle de la Courōne de Frāce, i'entends de ceste France, qui a chez soy son Inde & son Perou, & tout ce dont tous les autres Royaumes se vantēt trop ambitieusement. Car elle les a, sans frais d'armees, sans fatigue de nauigation, sans hazard, sans tēpeste, & tousiours asseurees dedās son sein, & au milieu de sa trāquilité. Entre la merueilleuse abondance de toutes choses necessaires à l'hōme, rien ne luy defaut. Elle a le Ciel serain & temperé, elle a le sol fœcond, le bled, le vin, les toilles, les laines, les eaux, les bois, le bestail en tres-grande facilité, & tres-facile fecondité, & tres-seconde felicité.

Solin estrangier, & partant iuge sans passion, parlant de la fertilité de la France, s'escrie. *Heureuses Gaulles, pour le grand reuenu de leur bestail, voire tres-riches, de toute sorte de choses necessaires à l'usage des hommes.* Qu'eust-il dit s'il les eust veuës de nostre temps, & peuplées de toutes choses si abondamment, & sous le regne heureux de vostre Majesté?

esté? Certainement ils les eut louées comme vn miracle de la terre. Aussi est-ce chose certaine que nos voisins, à qui la Nature manque, sont contrains de recourir aux François, pour auoir les subsides de la vie.

On dira que ce n'est qu'un Royaume: mais c'est vn Royaume qui en vaut cent, & qui a d'estenduë plus de deux cens soixante & dix grandes lieues de long, & plus de deux cens lieues de large. C'est vn Royaume, composé d'une infinité de belles Prouinces. Vn Royaume tout rempli & tant peuplé: Ce ne sont point les solitudes de Lybie, ni les deserts d'Ægypte, ni les glaces de la Sarmatie: tout y est fecond, tout y est plein de biens, & comblé d'hommes. Le vuide ne se trouue point en ceste Nature de Royaume. La Regnarde d'Æsope qui faisoit tât de petits, reprochoit à la Lionne qu'elle n'en faisoit qu'un. Non dit-elle, mais c'est vn Lion. Aussi la France ne consiste qu'en vn Royaume, mais c'est le Roy & le Monarque de tous les Royaumes, Royaume tant aymé de Dieu, que l'on peut dire de luy ce que le Poëte Latin

REMERCIEMENT

disoit de sa Carthage:

On conte que Iunon d'une amitié profonde,

D'aimoit plus que Samos, & plus que tout le monde:

Là, ses armes estoient, là son char triomphant,

Gisoit de son Palais les portes estoffant.

C'est ce Roiaume que S. Denys grand Senateur du Parlemēt d'Arcopage, dresse au modelle de la religiō & iustice Chrestienne. Roiaume, qui composé de parties dissemblables cōme de voix inegales, toutes accordantes, faict vne Musique diuine, & vne harmonie d'estat admirable à ceux qui ont aureilles pour la bien entendre. Roiaume, qui a duré douze cens ans sous ses Rois tres-Chrestiens, sans aucune alteration en sa religion Catholique: & deuant ses Rois Chrestiens, près de trois cens ans, sans perdre vn petit fil de sa premiere pieté. Ce qui est certes sans exemple. C'est ce Roiaume que saint Hierosme disoit auoir esté tousiours exempt de monstres, & que saint Bernard descriuoit n'auoir peu souffrir en son sol, tous ceux de qui l'im-

pureté de doctrine, & la souilleure de la vie, les separoit du giro de l'Eglise. C'est ce Royaume auquel il y a tât de si belles Eglises basties: où il y a pl^r d'Abbayes & de Prieurez, plus d'Hospitaux & de lieux saints, qu'il n'y a en Royaume de la Chrétienté. C'est ce Royaume Chrétien, où le Clergé a esté tousiours si honorable, & où les Canons de l'Eglise ont esté si bien sceus, & si bien observez. Royaume où iusques aux plus petits du vulgaire, la pieté & la Religion a esté si ardemment & si frequemment exercée, qu'on ne peut voir vn peuple plus deuot, on n'en peut voir vn plus religieux. C'est ce Royaume où ont fleuri tant de nobles Euesques: les Guilloumes à Paris, les Yues à Chartres, les Ionas à Orleans, les saints Ignaces à Lion, les Saluans à Marseille, les Saints Spires à Tholoze, les Saints Hylaires à Poitiers, les Saints Morilles à Angers, & sur tous ce grand saint Martin Pair & Apostre de France: & tant d'autres insignes personnages, qui de leurs escripts Catholiques ont illustré l'Eglise, & l'ont maintenue en sa pureté, par leur

REMERCIEMENT

prieres & honorables actions & predica-
tiōs. C'est ce Royaume de qui l'estat n'a
iamais changé, & de qui les Loix fonda-
mentales sont encores en vigueur, & en
honneur, cōme elles estoient dès sa nais-
sance. C'est ce Royaume qui a eū desia
soixante trois Rois tous d'une tige, &
tous Chrestiens & Catholiques: la troi-
siesme race reprenant la tige en la pre-
miere & seconde.

Et en quelle part de ce monde cet
honneur s'est-il rencōtré? C'est ce Royau-
me dont Dieu luy mēme a dressé le
plan, & prins les mesures, l'ayant bor-
né des Alpes, & des Pyrenees, ensen-
ble du Rhin, & de l'Océan. C'est ce
Royaume qui grouille de Noblesse, &
qui en a tant, quē battant du pied la ter-
re, on en fait sortir des buissons, &
fourmiller par les campagnes. C'est ce
Royaume de qui la iustice a esté si récō-
mandee, que les Empereurs, les Rois &
les Princes estrangers, y ont rapporté la
vuidange de leurs plus grandes querel-
les & differents. Royaume, où les gens
de lettres ont esté, & sont encor en tel-
le abondance, & avec telle doctrine &

subtilité d'esprit, que la merueille en reste par toute l'Europe. C'est ce Royaume, où les artisans sont si ingenieux & si subtils, qu'en nulle part les mechaniques n'ont plus d'honneur. Royaume, où les hommes ne sont legers cōme leur reprochent les peuples les plus legers d'esprit, & lourds de corps, qui soiēt au monde. Royaume qui par vne constante gravité & meureré de iugement, n'a iamais varié ni es loix de sa religion, ni en l'obeyssance de ses Princes, ni aux constitutions de son estat iusques à present. Ce que n'ont faiēt les autres Royaumes. Nos troubles ont encor monstré le desir qu'on auoit de les conseruer. Royaume qui ne remet au lendemain ses affaires les plus graues, mais qui proposees, les penetre subitement & subtilement, les sonde meurement, & les resould soudainement & sur le champ. C'est vn Royaume non intemperé de chaleurs, comme l'Affrique, non transi de glaces comme la Scythie, mais qui en toutes ses parties a sa temperature esgalle, peuplé de villes & places frequentes, & de tout ce qu'a besoin la Nature. Et bref.

R E M E R C I M E N T

Royaume qui est la plaifante Tempé de nostre monde , & où Iupiter, comme dict le Poëte, voudroit habiter, s'il quittoit le ciel, pour venir en terre. C'est ce Royaume où les Rois commādent aux hommes, & non aux bestes, pour estre les François pleins d'humanité, de gracieuseté & courtoisie, par dessus tous les humains. Royaume que Dieu par singuliere bien-vueillance a gardé desia douze cens ans & plus, sans alteration aucune de son estat Royal. Royaume, quil a preserué de grāds & perilleux accidens : Et singulierement en ces derniers troubles ; que l'estat cassé de vieillesse, estoit plus difficile à guerir : & que les mēbres armez les vns contre les autres ; & obstinez à leur ruine, ne cherchoient que la dissolutiō entiere de tout le corps. C'est ce Royaume, SIRE, que Dieu vous a donné, & où à present vous commandez en honneur & en Maiesté : ayant esté le Neptune qui a appaisé nos tourmentes, serené nostre ciel, & qui auez si bien calfeutré nostre nauire, quil est encore pour faire vne lōgue & heureuse nauigation. C'est pourquoy ie chante-

ray ces Vers à vostre louange, & diray
ce que dict le Poëte.

*S'il y a dans le ciel quelque diuinité,
Qui des hommes deuots voyent la pieté,
S'il est en quelque part, quelque brin de ius-
tice,*

*S'il est rien qui des bons la droicteure cheris-
se,*

*Ie supplie au grand Dieu qu'il vueil le guer-
donner,*

*Le bien que vostre main nous a voulu don-
ner.*

Mais ce n'est rien SIRE, de vous
voir Monarque des François, & pour-
ueu de tant d'autorité & de puissance,
si l'on ne sçait par quels moyens vous y
estes paruenü. Car c'est où se voyent les
merueilles de Dieu. C'est où les traiçts
de son pinceau sont admirables. C'est là
où la prudēce de sa Maieſté est plus louä-
ble & recommandable. C'est la couſtu-
me de Dieu immortel, en ses diuines
actions, d'operer par les contraires, &
non par les semblables. Car il faict ses
operations de medecine, comme faict
Hipocrate, & non Paracelle. S'il veut
guerir, & curer vne cecité naturelle, il

REMERCIEMENT

faict du crachat & de la boüe, dont il les charge & les embrouille, & semble plustost les vouloir obscurcir, que les esclaircir. S'il veut esleuer du grain, & en faire fruißt, il le faict pourrir & consumer dedans la terre. S'il a enuie de faire verdier vn beau Printemps, il enuoye vn fort Hyuer, qui couure tout de glaces, qui mange tout le verd, qui ne laisse que les branches des arbres, & les plantes en leur nudité. Sil veut faire fleurir vn bel arbre, & le charger de forces fruißts, il le faict esmonder, il faict couper son bois, & semble qu'il ait plustost enuie de tout ruyner que d'edifier, plustost d'exterminer que de dōner naissance. Il a appris cest art aux excellents Architectes : car pour faire vn bastiment de haute esleuation, ils creusent les fondemens d'extreme profondeur & de mission : tesmoin vostre bastiment du Louure, qui s'esleue aussi haut, sur les belles maisons du reste de la Chrestienté, que vostre clemence, & de bonnaiteté Royale, s'esleue sur les vertus des Princes de la terre. Ainsi a-il basti la grandeur d'Auguste, & la fortune d'A-

lexandre. Car le dernier, n'a iamais rien eu du ciel qu'avec peine : & a fallu que de force il ait arraché son bon-heur de ses mains. L'autre battu & rebattu, voire ennuyé de tant de trauerses, pria mesme l'un de ses amis de le tuer. Permettez moy ; SIRB, s'il vous plaist, que ie descende au plus creux de vostre basse fortune, pour faire cognoistre sa subleuation. Car la fortune pour vous faire sentir son sucre plus doux, vous a faict boire quelquefois vn doigt d'absynthe. Permettez-moy, dis-je, qu'opposant le petit pied à la grande toise, ie puisse par ceste opposition faire cognoistre vostre sublimité. Car par l'opposition de deux contraires, ils s'esclaircissent merueilleusement, & le blanc ne se voit point si blanc, que quand on l'oppose au noir, ni le grand, que quand on l'approche d'une chose petite. Aussi dit-on qu'Hercule ne se trouua iamais si grand, que quand il fut assiegé des Pigmées. Et ce grand Colosse de Rhodus, ne se monstra iamais plus haut, que lors qu'estant abattu l'on pouuoit de son petit doigt, faire de grandes & admirables statues.

REMERCEMENT

Souuenez vous donc SIRE, en quel estat vous estiez, apres la mort du Roy Monseigneur vostre pere. Pensez à qui vous auiez affaire, en l'an 1568. quelle puissance vous auiez à cōbarre, & avec qui vous estiez. Iugez l'estat de vostre maison, la tēdressē de vostre ieunesse, & les grādes affaires que vous auiez sur les bras. Quand ie vous ramentoy cecy, ce n'est pas pour vous deprimer. C'est pour exprimer d'auantage, cōbien Dieu a basti vostre grandeur, sur vne basse, & perilleuse descēte. Et croy que lisant ceci, vous en songerez d'auantage, que ie n'en sçauois escrire. Aussi que ie ne veux remuer ce qui gist bien, & qui est heureusement enseveli. Mais approchons plus pres de vostre grandeur, qui est la Royauté. Car ces troubles ont esté cause de vostre fortune. La France pendant nos desordres, s'est veuë à la verité en de grāds & perilleux destroiets, voire aux derniers abois de sa vie. Elle a senti des accez de fievre bien chauds, & bien violēs. Toutesfois s'il n'y auoit autre moyen que par nos intemperies de vous voir à la Royauté, nous aimons

nos fautes, & nos troubles nous plaisēt, puis que c'est vous qui auez establi l'ordre, & faict rayer dessus nous le soleil de la trāquilité. On ne iouyt point de la myrrhe qui ne l'incise, & l'encens ne se peut auoir sans fraction. Le me represente en vostre Royauté, la composition d'un insigne médicament, où il entre tant de drogues naturellement contraires les vnes aux autres, & qui mise en un pot ensemble, apres qu'elles ont bien bouilli & escumé, & qu'elles ont ietté l'une contre l'autre, tout ce qu'elles auoient de force, & de vertu naturelle : finalement s'accoisent, & se meslans ensemble, conuertissent leur suc, leur force, & toute leur substance, en la consistance d'un bon & salubre médicament. Car les deux partis, ont ietté l'un cōtre l'autre tout ce qu'ils auoient de roideur, & de puissance. Et apres auoir bien bouilli & escumé de cholere, apres qu'ils se sont bien brouillez en rencontres, & en batailles : à la fin, le tout s'est composé & conuertý à vostre recognoissance, & vous a on receu à la Royauté. Enquoy vos ennemis ont apporté tout ce qu'ils

REMERCEMENT

auoient de roideur en l'esprit, & en l'ame: & croi que s'ils eussent peu faire d'auantage, ils l'eussent faict. Et certes vostre fortune me faict souuenir d'un nauire bié armé, & bien enuillaillé, qui faisant voyage sur la mer, se trouue à la fin cruellement assaillé, & inuesti de la tempeste. Les vents contraires l'affligent, ils le battent & rebattét de toutes parts, ils excitent & enflent les ondes, qui escument, qui ronflent, & qui bruyent à l'entour pour l'engloutir. Et comme ils luctent de part & d'autre contre le mast, les voiles & les autemnes: voicy vn vent qui de toute sa force pensant le renuer-
 ser, le faict eschapper des autres, & le porte à pleines voiles, & de toute roideur en vn port tres-assuré, où il ne pẽ-
 soit iamais surgir. Car le port honorable de la Royauté, a receu vostre vaisseau, battu & rebattu de vents contraires: & le party plus grand qui le pensoit abyss-
 mer l'a ietté finalement contre son espe-
 rance, au lieu où toute la France l'a re-
 cueilly, non sans vne allegresse singulie-
 re. De moy, quand ie viens à considerer
 par quels moyès vous y estes entré, c'est

où ie fōds en merueilles, & plus i'y trou-
ue de contradictions, plus ie reuerce les
hautes conditions où vostre bon-heur
vous a porté. Car vos ennemis ont faict
ce que fit celuy qui pensant oster la vie
à vn homme, qu'il hayssoit, la luy dōna:
& qui au lieu de luy planter le poignard
dans le cœur, & le trauerser de part en
part, luy creua & trauersa vne apostume
qui le faisoit mourir: & contre son in-
tention, il sauua la vie à celuy dont il
vouloit la mort. Ce qui ne s'est fait sans
vne grande prudence de Dieu, & sans
faire esmeruëiller tout l'Vniuers specta-
teur de nos tragedies: car ce coup a esté
le plus nompareil coup qui ait esté tiré,
ie ne diray point de nostre temps, mais
de fort long temps auparauant. Ie vous
diray, SIRE, vne verité qui vous est
grandement honorable.

C'est que les loix, les Rois, les Prin-
ces, les Prouinces, les Estats, les villes,
les grands & les petits, les riches & les
pauures, les ieunes & les vieux, sembloiēt
tous vous abandonner, & neantmoins
ayant cōgneu vostre valeur, vostre con-
stance & magnanimité, tous ils ont esté

REMERCIEMENT

trainés de vous rechercher & se prosterner deuant vostre Roïalle Majesté? Croiez-moy, Sire, qu'il sembloit que le Ciel se jouïst des hōmes, & qui les eüst auuglez pour se rire de leur cecité. Car ils se degoustoient pour vous aimer, ils vous laissoient pour vous rechercher, ils vous fuyoient pour vous approcher, voire pour vous voir au plus haut degré d'honneur, où Prince entra iamais de nostre temps. Ceux qui pensoient vous voir aux pieds, vous recognoissent pour leur chef; & ceux à qui vous n'estiez riē, vous honorent au iourd'huy & vous aiment comme leur Roy. Merueilleuse action de la prouidence de Dieu, qui dedans son estroict secret, vous tenoit caché, pour un iour, vous publier & proposer au genre humain; & contre l'opinion de tant de François, vous faire Roy des François. C'est tout ainsi qu'à la naissance des grandes ames, l'on voit force contraires dispositions de Saturne, & de Mars; & force mauvais aspects qui menacent de mille, & mille rencontres d'infelicité. Mais apres qu'ils ont effectué, & delasché leurs mauvais re-

gards, finalement ils s'esuanouissent, & laissent Iupiter dominer tout à son aise.

*Qui parauant estoit de l'unon ennemy,
Est à present son gendre, & son meilleur
amy.*

C'est ce que le Poëte diët d'Hercule, apres qu'il eut espouzé Hebé comme vous auez espouzé vostre Couronne. Voyla donc de grandes, & merueilleuses prosperitez en vostre Royauté: mais voila vne Majesté esclose, avec vne grande contention & variation, voire avec vne estrange conciliation de Fortune. Ce qui n'aduiant qu'aux plus grâds Princes que la Fortune bourrasque pour par apres les esleuer. Aussi le Clergé qui auparauât vous redoutoit, vous a demandé, la Noblesse qui vous laissoit, vous a choisi: la Iustice qui vous abandonnoit vous a voulu: le peuple qui vous fuyoit, vous a recherché, & peut on dire que vous auez esté les vœux, le desir, & le souhait vniuersel, de tout le Roiaume de Frâce. C'est ainsi que le tēps deffaict, & refait toutes choses. Car il est cōme la Crocute d'Egypte, de la dēt il rôpt tout, de l'estomach il digere tout. Est-il pas vray que

R E M E R C I M E N T

l'on vous a plustost porté à la Royauté,
 qu'on n'y auoit pensé, que les villes &
 les Prouinces, vous ont plustost receu
 que demandé, plustost honoré que re-
 gardé, afin de couper tout à coup, les
 nœuds ambigus & enuelopez de nos
 fascheuses controuerses? Vous auez cō-
 me le figuier d'Inde, plustost receu le
 fruit que les fueilles. Certainemēt, SIR, E,
 j'ay esté esbahi de voir tout à coup, tant
 de peuples à vos pieds, qui parauāt s'op-
 posoient, mais vainemēt, au roide cours
 de vos prosperitez. Et moy entre autre,
 SIR, E, qui ay faict quelque part de nos
 troubles, & qui me voy heureusement
 abbatu de vostre dextre souueraine. Je
 n'ay point de honte de publier ce que
 j'ay esté, quand chacun voit à présent
 qui ie suis, & ce que ie suis. Et vous con-
 fesseray que si vous ne m'eussiez preue-
 nu par vostre bonté, i'estois entieremēt
 perdu. Quantes fois m'auuez vous donné
 la main, pour me faire recognoistre, quā-
 tes fois m'auuez vous faict aduertir, de
 penser à moy? Et toutes fois mes yeux
 ne pouuoient voir, ni mes oreilles ouyr,
 ce que mon esprit depuis a admiré, &
que

que ma langue a loué comme vne mer-
ueille. SIRE, ie passeray ce petit mot
sous la bonne grace de vostre Maiesté,
que le seul amour de la chose qui me
touchoit le plus au cœur, me faisoit tenir
aux resolutions de mon parti : car enco-
re que ie fusse vn arbre ayant le pied en
terre, si falloit-il auoir le chef au ciel. Et
pour ce q̄ Dieu qui manioit vostre volō-
té, & qui vous conduisoit par la main au
feste de toute prosperité, a fait q̄ toutes
choses se sont si heureusement portees :
c'est pourquoy rempli d'affection & de
reuerence enuers vous, dedans moy ie
me resiouys, & me resiouyssant ie vous
benis, & vous benissant, ie le prie que la
rosee du ciel mouille abondamment vo-
stre chef, & que vostre cœur germant de
mille nobles vertus, soit plantureusement
& continuellement humecté de la douce
frescheur de ses graces. Car s'il y eut ia-
mais Prince modeste en sa haute fortu-
ne, ç'a esté vostre Majesté, à laquelle riē
n'est eschapé que moderé, & par laquelle
rien n'a esté fait que temperé. C'est cho-
se vulgaire, que quelquefois les hommes
plus bas s'oublient en la faueur de leurs

R E M E R C I M E N T

prosperitez, bien que ce ne soient que punctilles de bon heur, & quelque vmbre de fortune mortelle. Mais vo⁹, SIRE, à qui le vent de toute grandeur enflloit si heureusement la voile, qui la sentiez en poupe si fauorablement prospere, ne vous en esmouuiez nullement, ne vous en esleuiez aucunement. Quelle grace, ou plüstost quel Ange modérateur vous conduisoit, alors qu'en vne partie si sensible comme celle de l'honneur, vous ne sentissiez vn brin de vostre bon-heur, & qu'on vous vist en vostre humanité rempli d'vne si rare diuinité? Ceux qui auoient l'œil dessus vous, & qui pensoient profondémēt vos actiōs, ne pouuoient assez s'esbahir, & ce qu'ils voyoiēt, ils le pensoiēt vn songe, ce qu'ils apperceuoient, ils le tenoient estre vne illusion: Car qui est l'or humain si espuré qui ne se trouue enuelpé d'vn peu de gloire? Je me represente ces rochers plâtes au milieu de la mer, qui fraptez de toutes sortes de vents, iamais neantmoins ne se mouuent, iamais ils ne bougent. Si l'Aquillon les heurte ils le laissent romber. Si vn Zephir leur dōne ils le laissent

passer. Ils sont tous vns, autant en beau Soleil qu'en temps couuert, autant en calme comme en tempeste. Il n'en est pas ainsi de ces natures defectueuses, qui enflées du vêt de vanité qu'elles ont en teste bondissent superbement dessus le genre humain, & ressemblent aux balles, qui pleines de vent, apres qu'elles se sont esleuees orgueilleusement en l'air, tombēt impetueusement sur la terre & y font mille bons tesmoins irreprochables de leur vanité. Ce n'est pas sans raison qu'on les compare à l'éle bore, qui vne fois entré au corps humain, fait vn remuement des bōnes & mauuaises humeurs, & iette l'homme en peril par la rigueur de ses deportements estranges. Tel fut Cinna, tel fut Silla, & Marius, vraye bourasques du peuple Romain, & le deshonneur perpetuel de leur République. Paris sera tesmoin irreprochable de vostre moderation, quand lors de la reddition l'on vist toutes choses si modestement conduites, qu'au milieu des armes tout y estoit en repos, & entre tant de soldats tout estoit en tranquillité. Et qui s'esbahira si ce peuple spectateur de vos vert⁹, est

R E M E R C I M E N T

si amoureux de vostre personne, **SIRE**,
 quād vous n'aurez qu'un Paris qui vous
 aime, vous auez tousiours vn Mōde dans
 le Mōde qui vous aime. Et si iamais il a
 aimé ses Rois, c'est en vous qu'il a redou-
 blé cet amour; cōme au plus agreable de
 ses Rois. I'escris cecy en faueur de la vil-
 le qui ma porté, qui m'a alimenté, & qui
 m'a donné naissance. Ville, que j'ay ay-
 mée, que j'ay honoree, & qui est l'un des
 precieux boutons de la Chrestienté. C'est
 ceste ville où est le siege de vostre Empi-
 re, le domicile honorable de vostre Ma-
 jesté, le sejour agreable de vostre royalle
 serenité. Ville où gist vostre liēt de Iusti-
 ce, tant chanté & tant vanté non de vos
 peuples seulement, mais de tous les estrā-
 gers generalemēt. Liēt de Iustice où quel-
 quefois les Rois voisins ont comme en
 vne fontaine gracieuse puisé iusques aux
 viues sources de la Iustice François les
 eaux immortelles de l'equité & de la
 droicture. Et desquelles me ressouuenāt,
 O **SIRE**, j'ai vn plaisir dedans l'ame qui
 ne se dit point, j'ay vn souuenir qui ne se
 termine point.

C'est dōques ceste ville, qui vous reue-

re pour vostre moderatiõ & qui vous aime d'un amour parfait, pour vostre royale perfection. Elle a veu les rayõs de vostre puissance, & a esmerueillé en vous la bõté qui vous faisoit perpetuelle assistance. Rome a veu quelquefois ses Cæsars portez au coupeau de toute sublimité: Mais souuent elle les a veus souillez de sanguinaire temerité. Ils entroiët en leur ville, cõme les vainqueurs d'olimpe, par la rupture des murailles, & bien souuent se faisoient iour par dessus les corps des meilleurs citoyens. Vos deportemẽs **SIR**, ont esté autres, estant accompagnez plus de modestie, que d'arrogance, plus d'amour que de haine, plus de douceur que de vengeance. Ce ne sera jamais que la memoire de Silla ne soit des-agreable aux viuants, mẽme à ceux ausquels il ne fit iamais tort, & qui ne l'õt veu que par memoires. Car qui ne le blasmera iustement depuis la tour de Preneste, iusqu'à la port Coline il soit entré dedans sa ville, foulant aux pieds les corps de ses compatriotes, & marchãs baigné iusques aux genoulx dãs le sang de ses Citoiens vaincus? Qui ne le detestera d'auoir assiegé

R E M E R C I M E N T

Rome plus à l'estroit que Persenna, & auoir fait mourir en elle deux valeureuses legions encore après sa victoire, ce qui est detestable, & de sang froid, qui est abhominable & contre son traicté qui est insupportable? Mais Silla estoit Silla, c'est à dire, la mer rouge de l'Italie, le boucher du peuple Romain, & l'opprobe eternal de la Noblesse issuë de Romulus. Ou vous, S I R E, ferez à jamais l'honneur de la couronne Françoisse, le bouton odorant de son humanité, le baume suau & bien-fleurant de sa benignité.

O que i'eus de plaisir à la nouvelle de vos gracieux & amiables deportemens. Croyez, S I R E, que ce fut lors que ie minuté mon retour, que j'arresté mon depart, pour m'en retourner en France. Car comme les abeilles s'approchèt ordinairement de leur Roy, & ne peuvent viure sans Roy, aussi dès lors ie fis estat d'aller chercher mon Roy. Et bien que ie fusse en pais estrange, si est-ce que mon esprit vous recognoissoit pour mō Roy souuerain, ie vous tenois pour mon Prince. Ouy ie vous recognoissois pour

mon Roy, & sans faire tort à ceux qui
m'auoient receu, ie confessois qu'à vous
estoit le commandement, & à moi lo-
beyssance. Mon ame vous disoit basse-
ment, ce que hautement Abigail, ceste
sage & belle Israélite, disoit à Dauid,
qu'elle espousa depuis. *Recenez moy,*
SIRE, s'il vous plaist, en vos bonnes
graces, & que vous soyez devant les yeux de
Dieu mis au paquet des viuans. C'est lors
que ie ressemble le feu, lequel si tost
qu'il voit la Naphte, qui est la fleur du
Bitume, de tout loyn il y vole & s'y
vaprendre. Car mon amour vola sou-
dain à vous, pour vous donner, après
Dieu, tout ce que i'auois, & le cœur sur-
tout, que i'apendis aux pieds de vostre
Maiesté. Que pensez vous, *SIRE,* l'ai-
se que ie u, de me voir abbatu par le
torrent de vostre prosperité, & mis aux
pieds de vostre bonne fortune? Car mō
deshonneur, a esté mon honneur, mon
malheur, a esté mon bon heur, ma hon-
te a esté ma gloire, ma perte, mon gain,
& ma desroute, le laurier de ma victoi-
re, & la palme immortelle de ma bataille.
Ie me resiouïs de me voir sous vos pieds

REMERCIEMENT

& de m'y voir avec tant de despoüilles ennemies, tant d'enseignes, tant de guidons, tant d'escus, & tant d'espees, qu'on voit entre vos trophees. J'ai cōtētemēt de voir blotti le petit tuïau de ma plume abbattuë, sous le cours de vostre biē heureuse magnanimité. J'ai profit de me voir auili par vostre sublimité, & de me voir deprimé par vostre hauteſſe. Car qui meurt d'vne belle espee à son soulagemēt, & qui tombe sous vne dextre puissante, a quelque recōfort en son mal-heur. C'est cē que disoit le Poëte:

Du moins à ton malheur ceste gloire est donnee,

Que tu meurs abbattu de la dextre d'Aenee.

Et quand ie songe à mon infelicité, il m'est aduis, SIRE, (si i'ose me comparer à lui,) que ie voy le pauvre Messala aux pieds de la clemence d'Auguste, lequel non seulement le remit en sa grace, mais qui le receūt en estroite amitiē, & pour l'amour de luy, pardonna à Speusipus le Philosophe, compāgnon de Brutus. Il m'est aduis dis-je, vous voiant, que ie voy Alexandre, qui de la main dont il abbattit Darius, relçua vn

pauvre soldat qui mouroit de froid, & le meit en vne chaire pres du feu. L'on dira, & l'on dira verité, que vos triumphes ne peuuent estre beaucoup enflés de mes petites despoüilles, & qu'il n'a que les grandes eaux qui facent les grandes mers, & les grands amas de terre qui facent les grands monts. Et certes ie sçay bien dont ie suis, & qui ie suis: ie sçay vostre grandeur, & sçay ma petitesse: ie sçay vostre puissance, & n'ignore point mon imbecillité. Mais les plus petits ont dequoy seruir, & honorer les plus grands: voire de bon cœur & vtilement. La teste au corps humain, se sert des plus basses parties. Le chef ne depri-me pas les pieds, qui l'ont aucunes fois mal porté. La nature nous enseigne, que les plus petits animaux peuuent faire beaucoup de bien, aux plus grands. Le Lyon d'Æsöpe, qui est le Roy des bestes remercie le rat d'auoir rompu & rongé ses liens, lors que les chasseurs l'auoient prins au piege. Ceste petitesse ayda fort à sa grandeur. Vn grand Roy, remercia fort vn pauvre païsän, de l'auoir serui d'un verre d'eauë, en sa plus gran-

R E M E R C I M E N T

de necessité, ainsi sommes nous conciliez les vns aux autres. C'est le ciment des grands & des petits, des foibles, & des forts, des riches & des pauvres, & la chaux qui joint les parties dissemblables de la nature. Et qui le mesprise, il tombe en des proplexitez estranges. Le monde ne voit rien plus fort que le tau-reau, & toutefois le petit taon, ne laisse pas de le fascher, & quelquefois il l'espoit tellement, qu'il le porte en fureur, par monts & par valees, par fleuves & torrents, & le faict escumer de rage & de cholere. La Nature n'a rien si sublim que l'Aigle, qui fouure le secret de l'air, & se faict chemin par les campagnes du Ciel inaccessibles: & toutesfois le petit escarbott le guerroye, & luy fait mille desplaisirs. Qui a-il plus grand, & plus cauteleux que le Crocodile? Neantmoins le petit Igneumõ, qui est vne espece de guespe, trouue moyen de penetrer en son corps pour luy ronger le poulmon, & se repaistre de ses entrailles. Il en est ainsi des choses inanimees, car on diët de la petite Isle d'Egine, qu'elle estoit vne paille en l'œil, de la

ville d'Athenes, dont elle receuoit beaucoup d'incommoditez, & de desplaisir. Voyez l'Isle d'Angleterre (que la nature a plantee aupres de ce grand Royaume, comme vne petite motte de terre dedans les eaux) combien d'incommoditez, combien de fatigues a-elle autrefois donné à vostre Estat, qui est si grand & si admirable? Autant certes que l'Isle de Sicile en a donné autresfois à toute l'Italie. Entre les hommes, Vlysse auoit vn petit corps, & toutes fois il trouua moyen de creuer l'œil à ce grand Polipheme, & aucugla ceste grande masse de chair, qui effroyoit tout de sa grandeur. Mais combien de bons offices fit il (si petit qu'il estoit) à ce grand Roy Agamemnon, voire à la Grece vniuerselle, & à tout le camp des Grecs, en la ruine de la ville de Troyes.

Vous SIRE, qui estes vn si grand chef de guerre, auez assez enseigné, & practiqué qu'entre les gens d'espee, on tient ceste maxime qu'il ne faut iamais negliger son ennemi, si petit qu'il soit: & que des petits on tire quelquesfois de grâds & signalez proufits. Aussi Iules Cæsar

REMERCEMENT

duquel vous auez de grandes & singulieres marques, ayât trouué Catulle qui auoit escrit contre luy, comme autres fois i'ay faiët contre vostre Maiefté, apres vn peu de satis faction, non seulement oubliä sa faute, mais le prenant par la main, le mena en sa maison, & le festoya.

Et à la verité, la satis-faction appaise la douleur. Car à la poincture d'ortie, vn peu d'huile est le souuerain remede. Mais vous auez plus faiët que luy, d'autant que sans satisfaction aucune, sans me voir, sans m'ouyr, vous m'auetz non seulement remis ce que i'auois faiët, mais vous m'auetz donné vostre grace, reuouqué en ma maison, remis en ma patrie, & receu au nombre de vos sujets. Aussi estes vous le Cesar des Chrestiens, & luy se contentera d'estre le Cesar des Payens.

Voila donc la puissance que Dieu vous a donnée, faisant l'acquisition de vostre estat. Voila comment vous auez attiré vos ennemis, qui se vouloient opposer à vostre Maiefté. Qui est vne des graces plus signalees que Dieu vous ait

departies, & vn preciput & aduantage, qu'il vous a fait comme au fils aîné de son Eglise. Voyons maintenant l'esprit qu'il vous a departi en la manutention de ceste puissance. Car ce n'est rien de la vous auoir donnee, ce n'est rien de l'auoir receuë, si l'on ne sçait comme vous l'auiez sagement maintenuë. Certainement la bonté de Dieu est comme vne source viue, qui donne des eaux de grace en merueilleuse abondance. C'est d'elle que plusieurs ruisseaux s'espandēt diuersement sur la terre. Aussi les hommes y puisent tout ce qu'ils ont de bon. Aux vns il dōne l'agilité de pieds, cōme à Iphiclus, aux autres la subtilité de l'oreille comme à Melampus, aux autres la viuacité de l'œil comme à Marius, aux autres la force du corps, & puissance des mains comme à Milon: Mais aux grāds Rois, il leur donne volontiers vn cerueau bien timbré, & vne sagesse en leurs testes. C'est pourquoy l'Empereur Seuerus ayant la goutte aux pieds, & voyant qu'on se mocquoit de luy. Je vous feray sentir, dit-il, que c'est la teste, & non les pieds qui commandent. Et certes vous

REMERCEMENT

avez monst^ré qu'en vostre entendement estoit le don que Dieu vous auoit fait, & par lequel vous presidiez iustement à la France. Car sçachant que la guerre est la mere de cōfusion, la meurtriere des loix, & l'ennemie de toute vertu: le premier poinct où vous avez donné, c'est de la chasser par delà les mers, & couper les racines à toutes ses reliques. Et pour y paruenir, vous avez r'allié vos subiects par honnestes traictéz, vous les avez conciliez & adoucis par vostre exemple, & où l'amitié n'a prouffité, vous y estes venu de viue force, combien que fort tardiement & rarement.

On dict que l'amour & la force sont les deux machines, par lesquelles les hōmes sont attirez à leur deuoir. Celle de l'amour, n'est pas tendue si roidement, mais elle opere merueilleusement. Elle est ainsi que l'arbaleste, où les mains les plus roides, quand elles seroiēt d'un Hector, ne pourroiet pas faire venir la corde à la noir: mais si on y applique le martinet, luy qui est plus ingenieux que fort, & qui a plus d'amour que de vio-

lence, se ioinct & s'incorpore à elle, & bādant petit à petit, l'approche par vne douce cōtraincte, & finalement la ioinct, voire l'arreste au lieu destiné. C'est ce que disoit Theopompe Roy de Lacedemone, que les resnes de sa Royauté, n'estoient si fort tendues, afin qu'elles peussent durer plus longuement. Quād à la force, pource que sa machine est violente & impetueuse, vous n'en auez que peu vsé. Aussi n'est-elle bonne, que quand le Conseil est negligé. Et ordinairement où l'homme doué de raison, ne veut entendre à la raison, c'est lors que l'on la met en œuvre. De ces deux vous auez maintenu vostre puissance: mais plus de la premiere que de la seconde: & auez ainsi rendu net vostre estat, de quelques petits restes, que nos troubles y auoient laissé. C'est la calamité dont vous auez attiré nostre paille, c'est l'aimāt dont vous auez amené nostre fer. Ce que vous auez executé à l'exemple d'Auguste, plus par prudence, & par conseil, qu'avec la lance, & le gantelet. Et c'est lors que par toutes vos places, vous auez establi de sages Gouver-

REMERCEMENT

neurs & que la guerre assouppie, vous auez ouuert le temple de iustice, & auez desiré qu'elle regnast, imperieusement par tout. De là sont venus vos edicts contre les gés de guerre, de là ceux des Preuosts des Mareschaux, de là, la police des villes, l'introduction des manufactures, de là, la reformatiō des habits, & la supression de tāt d'abus, & la barre posée aux licences, que le temps & la guerre auoient introduictes en vostre estat.

MAIS vostre puissance a grādemēt paru en la guerre de dehors, & singulieremēt quand ces deux les plus grands mōts de l'Europe voulurēt s'entrechoquer. Car tout ainsi qu'en la collisiō des nuees, on voit jallir des esclairs, qui font paroistre de grandes & soudaines lumieres: ainsi en ceste declaration de guerre, on a veu les poinctes & brillantes clartez de vostre esprit, en l'ordre & dispositiō de vos affaires. Car on a veu, cōme vous scauiez fortifier vos villes, garnir vos frontieres, redoubler vos garnisons, mettre par tout de sages & fideles Capitaines. On a veu, comme vous pouuiez à coup mettre sus pieds, non seulement

de grandes armées : mais les bien conduire, auancer, ou reposer, sans auoir indigence d'aucune chose. On pensoit voir vn Alexandre entre les bandes Macedoniennes, vn Cesar entre les Romaines, & vn Epaminondas entre les Grecques. Cela fit grandement iuger de vostre prudence & entendement. Et certes, vostre bon ordre mit en l'autre camp de grands desordres. Car on s'esmerueilloit que tout ce qu'on auoit pris sur vous par le moyē des troubles, estoit par vous incontinent recōquis : & qu'il n'y auoit placé qui ne vous fut réduë, ou de force, ou de volonté. De sorte que si Scipion Æmilian estoit tenu entre les Romains pour bon Sénateur, bon Orateur, & grand Empereur : vous estiez tenu pour vn grand chef de guerre en vostre cāp, pour vn sage Sénateur en vostre cōseil, pour vn disert Orateur en vos harangues militaires. On vous donnoit à bon droit les tiltres, *de tres-vaillant, tres-veillant, & travaillant*, qui sont les trois Vertus, ou plustost les trois couronnes immortelles, dont les plus grands vainqueurs ont esté iamais honorez. Et

REMERCIEMENT

ceux qui regardoiēt de près vos actions, disoient de vous, ce que l'on disoit des Israélites : que vous aviez l'espee en vne main, & la truelle en l'autre. Pource que vous repariez d'une part les ruines de vostre Estat, & les des-ordres de nos troubles, & par les armes, vous l'accroissiez & augmentiez de l'autre. Somme que d'un Royaume gâté, vous en avez fait vn tout neuf, & l'avez remis sus pieds, contre l'expectation de tout le monde.

MAIS, ce n'estoit assez de l'asseurer dedans par bonnes loix, & bonne police, & l'affermir avec vne bonne obeys-sance, & correspondance de membres au chef, & des subjects à vostre Majesté Royale, si vous ne l'eussiez cimenté par dehors avec l'amitié, & confederation de tant de Rois, Princes, & Potentats. En quoy vous avez ressemblé les Architectes, qui non contents d'avoir sur de bons pilliers, bonnes arcades, & bons fondemens, basti le haut ouvrage de quelque grande Eglise, l'assurent encor par dehors, l'appuyent & l'estançonnet de bons arcs-boutans, & de grands & nobles pilastres. Mesmes vous

estes allié en la maison de Medici. Maison qui a esté, & est si belle en Italie, qu'elle commande à la Toscane, avec autant de valeur que de sagesse. Je ne diray point seulement pour les armes, mais pour le conseil, & pour les ornemens de la paix. Aussi l'Eglise a senty les fruits de ceste famille, principalement en deux Papes, Leon dixiesme, & Clement septiesme. Et depuis, en la personne de plusieurs grands & graues Cardinaux, & Capitaines de ceste lignee. La France mesme en a receu du plaisir, en ses plus vrgentes affaires & necessitez. C'est la maison, SIRE, où vous auez choisi vostre alliance, où vous auez esleu la Royne vostre compagne, afin de donner des enfans à vous, & à la France, & à tout le genre humain.

On dit que les Rois de Parthes, ne beuvoient pas de toutes eaux indifferement: mais qu'il y auoit vn fleuve nommé Elæus, affecté au boire de leurs Majestés. Et les Cæsars, ne portoient pas en leurs triumphes, des couronnes de tous lauriers: mais seulement de ce laurier, dont la touffe estoit dans leurs iardins,

REMERCEMENT

Aussi nos Rois ne prennent pas indifféremment femmes en toutes maisons: mais celle de Medici, allée de maisons Royales & Impériales, a esté digne de leur en fournir depuis quelques années, & à vous en particulier. Car comme on a escrit, qu'un grand aigle laissa tomber au sein de Liuia, vne poulle blanche, tenant vn laurier en son bec: Dieu qui est l'aigle de toute sublimité, a mis en vostre sein ceste Princeesse; pleine de chasteté, & de candeur, avec le laurier, témoin de ses victoires, sur les vices. **SIRE**, vous avez esté l'astre qui a esleué par vostre chaleur, ceste noble & gracieuse vapeur, de la riue d'Arne, & de Florence, pour la porter heureusement iusques au giron de vostre Maiesté. Vous avez esté le Soleil, qui amoureusement regardant ceste Lune, en la plénitude de sa vertu, estes entré en conionction de vostre lumière, avec elle, & en avez produit des rayons, qui seront vn iour tres agréables à la France, & qui illustreront le reste de la Chrestienté. Car tout ainsi que les Alcyons esclôs, font la mer calme, & qu'ils la rendent commode pour

nauiger. Ainsi la Royne ayant escloué Monseigneur le Dauphin, a rendu la France paisible, & si a calmé les troubles, que plusieurs craignoient en cet Estat. Elle est accouchée de la Concorde du Royaume, aussi tost comme de son premier fils: & s'est veüe comme Latone, mere en vn seul part, de deux grandes diuinitez.

Monseigneur le Dauphin, qui maintenant est vn Titus, l'amour de tout le peuple, & la bien-vueillance du genre humain, sçaura bien asseurer par le dedans ceste heureuse concorde: & dehors, Madame sa sœur la sçaura bien concilier, par vn haut & celebre mariage. C'est la nature des Dauphins, d'aimer la musique, & les bons accords, & ce sera l'action de Monseigneur le Dauphin, de nourrir & entretenir cet Estat en vne politique vnion, & harmonique consonance. A meilleur ton ne le peut il mettre, qu'à celuy de vos predecesseurs, & de soixante & trois Rois Chrestiens & Catholiques, qui l'ont auparauant gouverné. Et tout ainsi qu'un Dauphin sauua du naufrage le pauvre & mi-

REMERCIEMENT

serable Arion: ainsi sauuera-il de la tempeste, ce pauvre Royaume affligé, & ancrera sa nef en quelque bon port.

Or vivez tous en heureuse prosperité, le pere, la mere, & les enfans: vivez, & que vos ans soient éternels, & à iamais durables. Souuent la France, avec vn œil ioyeux, a veu la naissance de ses Princes: mais iamais avec plus d'occasion. Car les autres naissoient pour continuer vne succession, ceux-cy sont nez pour l'vnion de cet Estat, voire pour sa conseruation.

Voyla, **SIRE**, ce que i'auois à dire de la puissance que Dieu vous a donnée, non seulement pour paruenir à la qualité de Roy: mais aussi pour vous y maintenir. Qui est certes, vn des lineaments, par lequel grandement vous ressemblez à Dieu. Maintenant ie veux toucher l'autre, qui est la Clemence & de bonnairté: laquelle vous avez autant glorieusement emprainte sur le visage, que la hautesse & magnanimité sont empreintes sur vostre cœur. Ie n'en parle point cōme apprentif, i'en parle par science, & par experience. Et si ie l'ay apprise, nōtant

peril, ie la loüeray hors de peril, & tant que i'auray en moy vn point de vie. Car c'est entre ces deux Deesses que vous estes assis. C'est entre ceste Puissance & debonnaireté, qu'est posé le throsne de vostre Majesté Royale. Homere fait son Iupiter grauement assis entre deux Vases, l'vn de bien, & l'autre de mal. Mais il faut que ie sois son Censeur en ceste part, & qu'il ait vn coup de mabaguette. Car c'est à luy mal recogneu, mal formé, & mal figuré la Diuinité. Vn petit broyeur de couleurs eust mieux disposé ceste peinture. Fait-il donc Iupiter assis auprès du mal, & le fait-il distributeur les miseres qui esgorgent les hōmes? L'amertume ne sort point du ciel, & la mauuaïse odeur ne naist de la rose? le mal ne vient iamais de la main de Dieu, pour ce qu'il n'est que douceur & bonté. Il falloit plüstoit qu'il le plaçast entre le Soleil & la Lune, c'est à dire, entre le Soleil de la puissance, & la Lune de la clemence & debonnaireté. Car c'est où iustement se parque la iuste Majesté de Dieu, & apres Dieu, la majesté des Rois, & principalement des Rois de France.

REMERCEMENT

Le Roy Charles sixiesme vostre predecesseur, le monstra bien, quand prié par le Duc de Brabant, & le Comte de Haynaut, de ne proceder rigoureusement contre le Duc de Bourgongne, meurtrier du Duc d'Orleans, frere du Roy. Il dict ainsi : *S'il veut venir, ie le receuray, s'il veut seureté, ie la luy bailleray, s'il veut iustice, ie la luy feray, s'il veut misericorde, ie la luy donneray* : Et certes, on voit bien souuent les Rois assis entre le frere & la sœur, comme est Dieu entre la Puissance & la Clemence. Car ce sont les deux grands chandeliers qui luy sent eternellement deuant sa Maiesté. De ces deux, il gouuerne & tempere le monde. Et tout ainsi qu'en certaine regiõ d'Afrique, les iours sont infiniment chauds, & les nuicts merueilleusement fraisches, afin de moderer l'ardeur du iour, & luy donner quelque douce temperature : ainsi ce que l'ardeur de la Puissance a bruslé, est rafraichy par la clemence, comme on voit ordinairement vne grande rosee, suiure les chaleurs des plus grands iours d'Esté. I'ay prins, SIRE, ceste comparaison du Soleil, & de la Lu-

ne, comme du frere, & de la sœur, puis-
 que on tient que Phœbus, & Diane, sont
 enfans de Latonne, ainsi que les Poëtes
 ont chanté. La Lune d'oc, est sœur du So-
 leil, comme est la Clemence, sœur de
 la puissance, & Dieu est le pere immor-
 tel de tous les deux. L'un qui est le Soleil
 est vn astre masle & fort, qui dissipe, &
 qui escatte les brouillats, & qui esleue les
 vapeurs, comme fait la Puissance. La Lu-
 ne est vn astre femelle, qui est mol &
 doux, & qui par sa frigidité tempere les
 ardeurs du Soleil, qui sont les propres
 actions de la Clemence. La Lune prend
 sa lumiere du Soleil, & la Clemence préd
 sa force, & son lustre de la Puissance. Car
 on ne peut estre clement pour sauuer,
 qui n'a pouuoir de perdre & de ruiner.
 La lune regarde le globe terrestre de
 plus pres, ou le Soleil y iette les yeux de
 plus loing. Car la Puissance ne considere
 que la faute, & la Clemence regarde
 l'homme, & l'humeur dont il est com-
 posé. La lune eclypse du Soleil, par in-
 terposition de la terre. Aussi la Clemen-
 ce s'eclipse du chemin ordinaire de la
 Puissance, & de la Iustice, par interposi-

REMERCIEMENT

tion de la fragilité & condition humaine. La lune quelques-fois se ioinct, & quelquesfois se separe du Soleil : aussy quelquesfois sa clemence se doit approcher : & quelquesfois s'esloigner de la puissance de Iustice.

SIR, ie loüe aujourd'huy ceste Puissance, comme vostre propre vertu, & celle que pour l'amour de vostre maiesté, ie dois auoir en reuerence. Que tous Princes iertent l'œil sur elle, ce leur sera vn liure non escrit, où ils pourront beaucoup apprendre. Et certes Saluste dit vn beau mot des Princes clements, *Que ceux qui ont temperé leur commandement avec la douceur, ont esprouué en leur estat toutes choses belles & plaisantes.* Car le Plaisir & la Beauté sont les enfans de ceste Clemence. Et tout ainsi que ceux qui boient le vin pur, sentent vne ardeur vehemente en tout le corps, qui leur eschauffe le sang, qui leur monte à la teste, & qui les precipite bien souuent en des choleres, & passions extraordinaires: & qu'au contraire ceux qui le boient temperé avec de l'eau, sentent en eux les gracieuses fraischeurs de la tempe-

rance : ainsi les Roys qui boient le hanap de la puissance tout pur, se transportent bien souuent hors d'eux-mêmes, & ceux qui le boient mixtionné & rafraischy de l'eau de clemence, y reçoient plaisir, nourriture & temperamment, qui est le gracieux bien de leur santé.

On diét qu'à Sulmo en Italie, les vigneronns ont accoustumé de baigner, & arrouser les vignes d'eau, pour adoucir l'aigreur du vin : & que ceste eau faict mourir les herbes, meurir, & grossir le raisin au profit du pere de famille. L'eau de clemence en est ainsi, qui tempere & adoucit les esprits plus aigres, & plus rebelles, & qui suffoque au terroier humain, & fait mourir les herbes de contumace & ferocité, pour y faire grossir la grappe de douceur & d'obeissance, & en faire du vin d'excellence. Et certes Cleomenes auoit raison, qui disoit que le vray office des Rois, estoit non seulement de bien faire à leurs amis, mais aussi des ennemis en faire de bons amis. Ce qui se fait par la Clemence, & par ce breuuage sagement temperé. Car tout

REMERCIEMENT

ainsi que le faulconnier qui dresse & af-
 faitte son oyseau, non avec rudesse, mais
 avec douceur & debonnaiteté : & que sa
 douce main appriuoise ce qui estoit fa-
 rouche, & sauuage auparauant : Ainsi en
 est-il des Princes, qui par douceur gai-
 gnent les cœurs des hommes, lesquels
 par la rigueur prendroient le vent, & ne
 voudroient jamais s'assubiettir, & venir
 sur le poing. Aussi tiēt-on que les estats
 cruels ont beaucoup de terreur, mais
 qu'ils ont fort peu de duree. Ils sont cō-
 mie est le chaud es pais froids, car il est
 plein d'ardeur, mais de peu de longueur.
 D'autant que qui conduit vn estat, par
 la puissance absolue sans la retenir par
 la douceur, c'est tout ainsi qu'un cocher
 qui en vne roide descente lairroit aller
 ses cheuaux a galop, ou qui les chasser-
 roit à toute bride au lieu de les mode-
 rer, & avec l'enrayoit les engarder de se
 precipiter. Certainement cestuy là ren-
 controit bien, qui disoit que la crainte
 est vn mauuais estançon d'un estat. Car
 il n'y a plus grande reuerence que celle
 de l'amour & qui traicte l'homme par la
 douceur, il sçait par quelle oreille il le

faut prendre. Le cœur de l'homme est l'anse, où il faut mettre la main pour le bien manier; l'estrier, pour le bien picquer, la bride pour le bien virer & conduire. Et comme l'esparuier mettant la caille au pied, se saisit du cœur premierement auecq la ferre: ainsi le Prince qui est vainqueur, doit soudain s'emparer du cœur, afin que le tout luy demeure. Car c'est la plus noble partie de l'homme, & celuy qui se la peut donner, se peut vanter d'estre maistré de tout le reste.

Nous auons subiect, SIRE, de dire de la France, ce que Valere disoit de Syracuse rendue à Marcellus. O France que tu t'es sauuee doucement, ayant trouué vn si doux Prince. Et certes Philippes Roy de Macedoine, & pere du grand Alexádre, vray pourtrait d'un grand Prince, a donné l'exemple. Car il se concilia Nicanor & Arcadion, non pas par la rigueur, mais par la douceur & bien-vueillance. C'est luy, qui ordinairement disoit, qu'il falloit guerir les vlcères des hommes, par medicaments lenitifs, plustost que par les aigres & fas-

REMERCIEMENT

cheux remedes. Car souuent ces poudres mordicantes, & ces cauterres & adustions empirent la maladie, & au lieu de la guarir, ils l'aigrissent, & quelques-fois ils y apportent la gangrene. Seneque qui se plaist à discourir de la douceur où son esprit estoit enclin, rapporte de l'Empereur Auguste vne chose singuliere; c'est qu'il pardonna à tous ceux qui auoient porté les armes contre luy. Dequoy il le loüe fort, & le recommande. Car, diët-il, s'il ne leur eust pardonné, à qui eust-il commandé? Certes s'estoit fort bien enquis. D'autant qu'il n'eust commandé à personne, puis-que il n'y auoit personne qui ne se fust bandé contre luy. Il se concilia donc par la douceur, toutes les plus nobles familles de Rome, lesquelles il eust perduës par la rigueur. Et ceste benignité fut cause de l'esleuer au souuerain degré de l'Empire, & luy faire porter le nom d'Auguste fort longuement. Aussi fit-il experience de l'amour, & de la loyauté de ceux qui s'estoient reconciliez. Car il n'y en eut pas vn qui ne luy fut autant amy,

qu' auparauant il luy auoit esté ennemy .
Et à la verité les membres renouez tien
nent ordinairement plus fort que les au
tres. Pource que la nature desirant repa
rer vne rupture, y apporte tant de se
cours, qu' ordinairement il s'y fait vn
gros cal, dont la partie se rend plus forte
qu'elle n'estoit auparauant. Les orfeures
font tousiours leur soudure meilleure
& plus ferme que n'est pas la besongne
premiere. Iules Cesar qui scauoit ce se
cret eut grand regret de n'auoir peu sau
uer Caton, qui luy faisoit si fort la guer
re : & disoit ordinairement qu'il luy
auoit enuié cest honneur. Et à la verité,
ie croy qu'il estimoit plus de garder vn
Caton, que de conquerir vn monde en
tier. Car Caton ne se broüilla aux trou
bles, que pour le salut du public, & ne se
roidit contre Cesar, que pour voir Ce
sar, aimer plus Cesar, que la Republique.
Mais tous Princes ne sont capables de
telle victoire. Car il y a des terres, où les
colombes ne nichent iamais, où les
fruits ne meurissent iamais, voire où les
arbres ne fleurissent iamais, & où il ne
croist que des chardōs au lieu de roses. Et

R E M E R C I M E N T

comme les soldats qui auoient fuiui aux Indes les enseignes d'Alexandre, disoient qu'il y auoit des herbes dans la mer, qui dedans l'eau paroissoient verdes, mais hors de l'eau n'estoient que sel : ainsi il y en a qui se resoluent tout en amertume. Il faut bien estre remply de diuinité, pour remarquer les nobles parties de la Clemence. Lesquelles sont d'autant plus signalees, quand elles se font de Roy, enuers son subiect, ou de citoyen à vn autre citoyen.

I'oseray prendre la hardiesse, SIRE, puis que vous me donnez la liberté de parler, d'ëfoncer vn peu ce poinct, pour ce qu'il importe à vostre Majesté, & que la Clemence est vn des plus nobles fleurons de vostre couronne, voire vne des excellentes vertus de vostre personne. La Clemence donc à ses circonstances sur lesquelles elle doit estre iugee, & appliquee : car les vns en sont plus dignes, & les autres moins. Et y a difference de la donner à vn estranger, difference à vn subiect, difference à vn citoyen. Quât à l'estranger, la clemence n'est tant requise en son endroit, comme enuers les
deux

deux autres, combien que iamais on ne luy a desniée, s'il s'en est trouué digne. Segeste, Prince Alleman, du temps de Tibere, ayant enuoyé vers l'Empereur, pour luy donner secours, & pour receuoir son fils en grâce, qui apres la desfaiëte de Varus, s'estoit insolemment porté, experimenta, diët Tacite, que valloit la clemence Romaine. Car on luy oëtroya ce qu'il requist, qui estoit le secours des Romains pour luy, & la bõne grâce pour son fils. Et du temps de Claude l'Empereur, Mythridates Roi du Bosphore, se voyant deffaiët & vaincu, pria Eumenes de rescrire à l'Empereur : de le receuoir en sa grace, ce qui fut faiët. La responce fut courte, mais digne d'une Maiesté Romaine, *Qu'il y auoit à Rome autant de clemence contre les vaincus, que de courage contre les ennemis armez.* Toutesfois, ceste grace n'a tousiours esté faiëte : car Partlamasiris la demandât à Trajan, ne l'eut pas, nori plus que Baston, & plusieurs autres Princes vaincus par les armes. Et les raisons en sont belles & remarquables : C'est que l'estranger a ses Dieux à part, disoient les Payens, & le

R E M E R C I M E N T

subiect, & le citoyen, les a cōmuns avec nous. L'estranger n'a lieu quelconque d'amitié qui nous touché, le citoyen & le subiect nous sont comme freres de sang. L'estranger a le ciel & le sol, séparé de nous, & le citoyen & le subiect, l'a commun avec nous. Vn mesme air le rafraischit, mesme ciel le regarde, mesme sol le soustient. Mais quand au Seigneur, il a aussi ses considerations à part, ses mesures & ses bornes, esquelles il se doit contenir. Car la puissance d'un Prince Chrestien, n'est pas vne puissance effreneée, & telle qu'un maistre l'a sur des esclaves. Elle doit estre tēperée de douceur & de benignité. Car quand le Soleil de la religion Chrestienne fut en son midi, l'esclavitude se disparut, pource que pauvres & riches, grands & petits, Seigneurs & vassaux, sont freres en IESVS CHRIST. Ils sont membres d'un mesme corps, subiets d'un mesme chef, qui nous a reCOMMANDÉ la douceur à son exemple: Ce qui a esté pratiqué par tous les Princes Chrestiens & Catholiques, & par tous ceux qui au dessous de la dignité de Prince, ont eu quelque

gouuernement. De faict, Odo Abbé de Clugny, & preposé sur tant de bons religieux, disoit que s'il auoit à estre damné, il aimoit mieux que ce fust pour auoir aimé la douceur, que l'inclemence. Entre les Chrestiens, vn vray Seigneur, n'est pas Seigneur, mais il est pere. Le nom de Seigneur, est vn nō de puissance: mais le nom de pere est vn nom de pieté & de clemēce. Aussi dit-on plustost vn Pere de famille, qu'un Seigneur de famille. Et ce nom de Pere de famille, regarde aussi bien les seruiteurs & les esclaves, que les enfans. Ce que les Payens nous ont monsté, mesme au milieu de leurs tenebres. Car Auguste par plusieurs fois fut salué Seigneur par les Romains: mais iamais il ne receut ce nom, nō plus que Iules Cesar son oncle. Et cōme au Theatre, on eut en iouant faict mention d'un honneste & gracieux Seigneur, & que chacun eut ietté sa veue dessus lui, il tourna la teste, declarant que ce nom ne lui estoit agreable. Autant en fit Tibere, son successeur. Mais Auguste print au lieu de Seigneur, le nom de Pere de la patrie. Il y a en l'antiquité

R E M E R C I M E N T

deux exēples de Seigneurs enuers leurs subiects, qui sont fort contraires. L'un a esté grandement loüé comme clement, l'autre grandemēt blasmé comme cruel & plein de tyrannie. Celui-là de la clemence fut tel . L'Empereur Auguste sceut que Cinna, son subiect, & ieune homme de bonne maison, auoit conuéré cōtre lui, auquel desia il auoit pardonné, à cause qu'il estoit de noble race.

Comme il l'eut enuoyé querir, & qu'il fut entré dans sa chambre, il le fit soir, & le pria de ne l'interrompre quand il parleroit. Puis il lui dict. *Vous ayant trouué entre mes ennemis, non comme ennemy faict d'adventure, mais de propos deliberé, & par nature : si vous ay-ie pardonné, & vous ay laissé iouyr de vos biens tout à vostre aise. Au iourd'huy vous estes si riche, que les vainqueurs portent enuie au vaincu. Vous m'auex demandé vn Sacerdoce, & ie le vous ay donné, le refusant à plusieurs, dont les peres m'auoient assisté en mes armées. Ayant tant merité de vous, au iourd'huy vous me voulez ruer. A ce mot, il s'exclame & le nie. Vo^o ne me gardez pas lui dit Auguste. ce que vous m'auex promis, qui est de ne m'interropper. Je dis que vous me*

voulez tuer, & dis vray: Lors il lui dict le iour, l'ordre, & les compagnons qui le deuoient assister, & qui deuoient faire le coup, & adiousta. Or ie vous donne encor vn coup la vie, & vous, dis-ie, qui auez esté mō ennemy, & qui encor à present me guettez pour m'assissiner, & pour commettre vn parricide. Faisons vn accord ensemble, sçauoir si à meilleur ti'tre ie la v' auray dōnée, ou si à meilleur droit vous l'aurez receue de moy. Et lors il le fit Consul, sans qu'il l'en requist, & se plaignit fort, qu'il ne l'auoit osé demander. Depuis ce iour, il l'eut tellemēt ami & fidele seruiteur, qu'il institua Auguste pour son heritier. Qui est certes, vn bel exemple de douceur, & digne des mœurs, digne de la grandeur d'Auguste. Car ceste clemence fut auguste, & augustement pratiquée par Auguste. Il y en a vn de rigueur, que fit Cræsus, lequel apparié à la douceur d'Auguste, se trouuera autant plein de turpitude, qu'il estoit indigne d'vn grand Roy. Cræsus donc, eut vn debat cōtre son frere, touchant l'Estat. Ce sont querelles ordinaires entre les Princes. Or estant paruenū à la Royauté, il vit fortuitement vn

REMERCEMENT

Gentil-homme qui auoit tenu le parti de son frere. Luy qui luy vouloit mal pour ce subiect, trouua moyen de le faire entrer dedans vne boutique de carder, où il le fit tant & si cruellement carder avec des pignes du mestier, que ce pauvre Gentil-homme en mourut. Cela acquit à Crœsus vne souveraine disgrâce de son peuple, & fut autāt blasmé, qu'Auguste depuis fut loué de sa bonté. Aussi ceste douceur assura sa vie & son Estat. Et certes il est fort mal seant à vn Prince, d'estre cruel, comme il luy est tres-honorable d'estre clement. Entre les oyseaux, il n'y a que la chauue-souris sale & vilaine, qui ait des dents. Entre les insectes, il n'y a que le Culice qui vid d'aigreur. Le Roy des mouches à miel, n'a point d'esguillon. Les ames diuines, ne doiuent point auoir de fiel. Aussi les arbres plantez près la mer rouge, n'apportent iamais de fruit. Les lys n'ont que douceur, soit en leurs fleurs, soit en leurs fueilles. Et que doit auoir le Roy des fleurs de Lys? Voyla SIRE, ce qui est de l'estranger, & du sujet.

Quant aux citoyens, sa clemence en

leur endroit a tousiours esté grâdement
louée & vſitee. De faict, les Romains vi-
ctorieux aux batailles ciuiles, n'ẽ ont ia-
mais triõphẽ. Car elles auoiẽt pl⁹ de ver-
gõgne, que de triomphe, plus de larmes,
que de plaisir. Ce n'estoit pas vne victoi-
re, c'estoit vne cruauté. Aussi la victoire
obtenue, les espees ne brilloient point.
On les faisoit cacher pour n'estre veuës,
& les destournoit-on des yeux des regar-
dãs. Et certes, l'honneur n'a pas esté petit
de l'orateur Hortẽse, qui se loüoit de n'a-
uoir iamais esté soüillé du sang de ses ci-
toyẽs. Mais Catõ cõtre sa volõtẽ, & pour
ne defaillir au public, defaillit à ses reso-
lutiõs du repos, & entra ẽs guerres ciui-
les. Car cõme le vray naturel des abeilles
est de faire le miel, & de haïr le tẽps nebu-
leux & les tẽpestes, ainsi la vraye humeur
d'un bõ citoiẽ est d'abhorrer les guerres
ciuiles, & suader & cõseiller le repos & la
paix de l'estat. Que si la tẽpeste le raut &
le iette en haute mer, c'est de s'y cõpor-
ter sagemẽt & modestemẽt, pour le bien
du pays. Les sages Grecs en ont fait ainsi.
Car quelqu'un d'eux passât par les sepul-
chres où gisoïẽt les reliques des vaincus,

R E M E R C I M E N T

& voiât aux inscriptiōs *Brasidas* & les *Achemeniēs*, des despoüilles des *Atheniēs*, & les *Atheniēs*, des despoüilles des *Corinthiēs*, les *Phociēs* des *Thessaliēs*, les reprenoit à bō droit: & disoit que ces despoüilles estoient les dépoüilles de leur humanité. C'est pourquoy César en la bataille de *Pharsalle*, se ressouuenant de sa bonté accoustumee, enioignit à ses soldats de pardonner aux citoyēs, mais de ne pardonner aux estrangers. Et certes, Brutus dit en ses *Epistres*, vne belle & memorable parole, *Qu'il est bien plus honnesté, & plus expedient, d'ēpescher le cours des guerres ciuiles, que d'exercer sa colere sur des citoyens vaincus.* Ce qu'il disoit pour les chefs des armées, qui auoient perdu toute modération. Vous en auez monstré les vrais exemples, SIRE, quād vous auez souuēt admonesté vostre noblesse, d'vser moderémēt de la prosperité de vos victoires, & modestemēt se cōporter avec le parti vaincu. Vous auez fait mesmes remōstrāces à plusieurs particuliers sur ce sujet, sc̄achant assez que peut operer la douceur à la reünion de vos sujets. Et certes, les animaux nous en donnēt de beaux exēples. Car on dit

que les oyseaux de Diomedes, assailloient
seulément les Barbares qui arriuoient en la
Poüille, & qu'ils ne disoient rien aux Grecs,
pource qu'ils estoient de leurs pays. Au-
tant en escrit on des serpens, qui sont es
riues de l'Euphrate. Les chiens en nos
maisons, n'abbaient point aux domesti-
ques, mais à ceux de dehors. Et dedans
les forests, les bestes noires ne courent
que les estrangeres. *Combien y en a-il (di-
soit Ciceron) qui se sont iettez aux troubles
plus par vne iuste crainte, que pour gayeté de
cœur? Cōbien aussi qui se sont enuolopez dans
les torrens des guerres ciuiles sans y pēser? Je dis
vne iuste crainte, cōme est celle de la re-
ligiō. Croiez, SIR, que si ceste crainte
n'eust esté, mon debandement n'eust ja-
mais esté. Car s'il y a rien qui ait puissan-
ce sur nos esprits, s'il y a pointe qui nous
perce de part en part, c'est ceste-là.*

• Mais on dira peut-estre, que ce dis-
cours est de Payens, & qu'il ne merite
authorité. C'est pourquoy ie le confir-
meray par l'escriture sainte, & luy don-
nerai vn Seau, dont la marque ne se peut
effacer. Abner estoit vn grand homme
de guerre, Connestable du Roy Saül,

R E M E R C I M E N T

comme Ioab estoit Connestable de Dauid. Après la mort de Saül : combien que Isboset son fils regnast pour luy, il vint vers Dauid, & luy dit que s'il vouloit il reüniroit tout le parti d'Isboset, avec le sien : de sorte que les autres lignees d'Israël seroient rejoinctes à la maison de Iuda, c'estoit certes, vn bon & salubre conseil. Ioab en fut si fâché, que lui qui craignoit qu'abner ne le surmarchast en l'amitié du Roy, & ne le suplantast de sa Conestablie, feit en sorte qu'en le baisant, il lui donna vn coup de poignard par derriere, & le tua mort sur la place. Dauid fâché de ceste meschanceté, & de la rancune detestable de Ioab, cōtre vn si hōneste Seigneur : enjoignit mourāt, à Salomon son fils, qu'à quelque prix que ce fust, il le fist mourir. De faict, il fut tiré hors de l'autel, & massacré sur le champ. Il y a encore vn autre exemple en l'Escripture sainte, sur ce subiect, & qui est digne de remarque, c'est que la lignee de Benjamin pour vn detestable adultere, (car l'adultere est vn vilain serpent qui rampe sur la terrē) ayant esté separee des autres lignees, ils

iurerēt tous de la ruiner par le cousteau,
& ne lui donner iamais en mariage au-
cune de leurs filles. De faict les armes ci-
uiles, & les mains furent si viuemēt de-
menees, & tant de batailles furent don-
nees qu'il ne resta que six cens de ceste
lignee, retirez en vn desert pour y mou-
rir. Et afin qu'elle faillist, ils ne vouloiēt
s'allier avec eux. Mais depuis la cōsequē-
ce de ce sermēt, pesee & cōsideree, ils le
rōpirent obliquemēt, & reünirēt par al-
liance & amitié leurs freres separez par
les guerres. C'estoit bien vne chose grā-
de & de grand poix, que l'obligation du
vœu, mais pour reünir leurs citoiens, ils
estimoient qu'il y auoit lieu de le rōpre.
Aussi la teste d'vn citoien tousiours doit
estre chere aux citoyens. Et certes l'on
tenoit à Rome, qu'il estoit plus profi-
table à la republique, de garder vn ci-
toyen, que de tuer cent ennemis. Et
ne se trouue tant, ni de si grandes, &
honorables recōpenses, que celles qui se
donnoient pour vn citoyen gardé. Car
outre la couronne, qui portoit avec elle
les fleurs d'vn renom immortel, celui
qui auoit gardé vn citoyen, venant au

REMER CIMENT

Senat, il y auoit seance , s'il venoit au theatre, il y auoit lieu, & chacun se leuoit deuant luy pour luy faire honneur, & si estoit exempt de routes tailles & contributions , & pour l'amour de luy son pere , & son ayeul paternel : & si les priuileges qu'il auoit , ne lui pouuoient estre ostez durant sa vie. C'est l'honneur que l'on faisoit à celui qui conseruoit ses citoyens. Que s'il falloit, SIRE, vous couronner d'autant de couronnes que vous auez gardé de bons citoyens, quels chesnes ne seroient esbranchez pour vous ombrager la teste, & qui sont les forests qui pourroient y suffire? Ce sont autant de seruiteurs que vostre clemence vous a faiçts , ce sont autant d'amis assurez & asserez à vostre Majesté , ce sont, entre les grands, autant de colonnes pour le soustien de vostre couronne.

C'est ce que j'ay bien voulu vous discourir, touchant les exemples de bonté & moderation, SIRE, les opposant à la rigueur, afin qu'ils eussent plus de lustre, & principalement en vostre personne. Si ieme suis estendu sur ce subiect, c'a

esté pource que vous auiez estendu vostre debonnaireté sur moi, & que ie me plais de la publier, & représenter à tout le monde. Car vous avez esté comme Aglaonice, qui tiroit comme on dict, la Lune du Ciel, & s'en faisoit suiure. D'autant que vous avez tiré du Ciel la Clemence qui sied au dextre costé de Dieu, pour estre vostre compagne en ceste vie, & lui avez faict esprendre ses plus douces benedictions dessus moy. Qui est vn bien receu de vostre Maiesté qui n'est point petit. Aussi ne sort-il rien de vous, qui ne soit grád : mais i'estime tresgrand, ce que vous m'avez donné par vostre singuliere magnificence. I'en ay eu le plaisir, & le profit, mais vous en avez reçu l'honneur, qui en est la plus belle partie. Et certes, ie vous puis dire S I R, que mille & mille gens de bien vous en ont loué, tant dedans que dehors le Roiaume. Non pour autre subject, sinon qu'ils ont iugé auoir esté digne de vous, digne de la douceur de vostre esprit, digne de la Maiesté d'un grand Roy, voite d'un Roy de France, de secourir quelque peu

REMERCEMENT

de probité qu'ils estimoient estre en moy. Je ne me vente de rien, aussi ne suis ie rien, mais ie sçay bien qu'au nid d'une petite arôdelle, il s'y trouue comme au nid de l'Aigle, quelques-fois des pierres precieuses. Vous avez imité la diuinité en cest endroiçt, qui donne estre & conseruation autant aux petites choses, comme aux grandes. Car la Nature s'employe aussi curicusemēt a composer & conseruer vn petit ciron, qu'elle faiçt à engendrer le plus grand geant qui soit au monde. I'adiouste que le ciron si petit qu'il soit a tous ses organes, plus ingenieusement bastis, plus artiste-
mēt elabourez, plus nettement vuidez, plus miraculeusement disposez, que les plus vastes & prodigieux animaux de la terre. Et qui ne sçait que le Ciel distille son humeur, & les doulces humiditez de ses pluyes, autant sur vne plante de thīm, comme sur les plus hauts sapins qui soyent aux Alpes? Le Soleil regarde d'aussi bon œil vn petit fourmi, cōme les plus grands Elephants qui soiēt es Indes. La mer ne nourrit elle pas & conserue aussi bien les petites sardi-

nes, comme les plus grandes baleines qui se iouient dedans les eaux? Les Vallons sont aussi chers à la terre, comme les Montagnes, & la graisse de ses entrailles leur est aussi tost departie, qu'aux autres lieux. Si vous auez eslargi vostre humanité dessus moy, c'est comme la Lune qui donne la rosee autant sur les plus humbles plantes, que sur les plus grandes Forests. Et comme en recompense de ce plaisir receu, on les voit le matin sur la pointe du iour, qui ouurent leurs fleurs, qui les tirent, qui les parent, qui les estallent & en font des tapis varieez qu'ils estendent pour en remercier le Ciel : Ainsi SIRE, en recognoissance des dons que vous m'auez faiets, & dont ie vous suis tant obligé, voyant leuer vos vertus au monde, comme vn Soleil d'Orient, i'espanis ces petites fleurs sur mon papier, que ie peins de diuerfes couleurs, & m'efforce pour n'estre ingrat enuers vostre Majesté, d'en honorer vous & vostre couronne. Couronne, que j'ai tant aimée, que mesme entre les estrangers, & au plus fort des guerres, ie n'ay rien

REMERCIEMENT

voulu faire contre son honneur, & à son prejudice, iusques à encourir le risque de ma liberté & peut-estre le peril de ma vie.

Mais ie laisse cela pour me porter ailleurs, & pour faire cognoistre plus amplement les deux poincts de vostre bonnairté en mon endroiect, dont le premier est de m'auoir reuoqué en mon pays, & rendu au nombre de vos subiects. Le second de m'auoir restitué en ma liberté, & retiré d'une longue & ennuyeuse prison. Quant au premier, **SIRE**, ie vous confesseray que mon exil a esté volontaire, & non forcé, car ie m'en suis allé de franche volonté, & non par contrainte. Car ie puis dire que ie ne receus iamais aucune violéce: dequoy ie dois rendre graces à Dieu, & apres Dieu à vostre Maisté. Aussi auez vo^r mis vntel ordre aux choses, qu'il n'y auoit differéce que de l'habit. Car au lieu de voir à Paris des gens de robe longue, c'estoient tous soldats & gens de guerre, mais si tranquilles que l'on voyoit la paix en pleine guerre. Ie m'en allé donc volontairement. Aussi n'auois-

ie

ie rien que redouter, me tenant en la ville, en laquelle i'auois tellement vescu public & priué, qu'il n'y auoit homme qui me peust accuser d'auoir faict tort à personne. Et quant à vostre Maiesté, SIRE, contre laquelle i'auois escrit, outre la iustification prise de mes mœurs, & du temps, & sur tout de vostre bonté. Vous sçauiez que par la composition faite à Senlis, nul n'en deuoit estre recherché. I'auois dōc Dieu, & vostre Maiesté, pour garād: & ceste Maiesté de laquelle la foy inuiolable m'estoit, apres Dieu, plus que toutes les assurances du monde. Je vous confesserai, toutesfois, que ie prins resolution de m'en aller: nō crainte de ma consciēce, mais crainte de quelque violence. Car la mer estant en furie, il n'y a si sage Pilote qui s'adventure sur les flots, & qui ne desire de se garrer en quelque port de tranquillité, & d'assurance. Et qui ne sçait les bouillons que dōne vne victoire à ceux qui ont les armes aux mains? Aux grādes poinctes de l'Esté, il n'est pas seur de se trouuer aux deserts de Lybie, car les lions sont en chaleur. La force de la canicule est si

R E M E R C I M E N T

grande, qu'elle va chercher les poissons plus tranquilles, iusques au profond de la mer. Je n'ignorois point ma cōdition, ie sçauois quel estoit le temps, & sa passion. Je cognoissois les personnes, & sçauois quelque peu de choses. C'est pourquoy ie deslié mō petit exquis & cotoiāt la France, ie mē sauuy, non loin de là, dedans vn havre voisin, & prins terre, en vne terre, où i'estois du tout incognu.

Je ne passeray sous silence vn traitt remarquable de vostre bonté, & qui est digne de vostre Majesté Roiale. C'est que vous me donnastes vn passeport pour m'en aller, puis que i'estois resolu de ne point demeurer. Vne Princeesse le vous demanda, & l'impetra, & me l'enuoia, dont ie la louëray & seruiray toute ma vie. Et en quelque endroit qu'elle sejourne, vueille le ciel espandre toute la rousée de ses benedictions sur sa teste. Car ie ne l'auois point seruié, & toutes-fois elle l'impetra pour moy, sās l'ē prier, & sans le meriter, & en vne saison fort petilleuse. I'esprouuay en elle vne affection de cœur, & nō vne action de Cour.

Or en ce passeport, S I R B, ie me repre-

sente en vous la bonté & de bonnairété d'un bon pere, qui ne pouuãt retenir son enfant en la maison, bien qu'il s'en aille cõtre son vouloit; si est-ce qu'il lui baille argent à son depart, le charge de lettres de chãge, pour en trouuer estãt failli, recrit à ses amis de lui assister, & lui mōstre ce qu'il doit suyure, & ce qu'il doit euer par les chemins. Ce fut lors que ie vis paroistre vn rayon de ce grand Soleil, que j'ay depuis veu reluyre en son plein Midi, & qui a esperdu mes yeux de sa lumiere. L'apperceus en verd, ce que depuis j'ai veu en espic, & qui m'a faict esbahir de son abondance. Je vis petit ce grand Cedre, qui a depuis touché les cieux de sa sommité, & qui m'a rauí de sa hauteur incomparable. Car vous estiez nouveau dedans Paris, l'heur vous enuironnoit de toutes parts, la fortune poussoit la nef de vostre prosperité, à toutes voiles: vous estiez en possession de ce que vous n'auiez peut-estre, iamais esperé. Au milieu, toutesfois, de tãt de plaisirs, dont le moindre eust enyuré vn esprit fort & bien timbré, vous estiez sobre & debonnaire, remis, & non insolent, & dō-

R E M E R C I M E N T

niez passeport à qui vous pouuiez oster
 la vie, vous donniez assurance à qui se
 defioit du tēps, vous donniez assistāce à
 qui vous delaissoit. Le iugé lors ce que
 vous feriez, establi, quant à vos cōmen-
 cemens, assisté de tant de puissance, & les
 troubles si freschement esteints, vous di-
 stilliez tant de douceur. Encor n'estoit ce
 assez de me congedier si gracieusemēt, si
 à mon retour vous ne m'eussiez receu
 fort humainement, & selon vostre natu-
 rel, tousiours benin & debonnaire. Là ie
 cognu les grādes difficultez qu'il y auoit
 à rōpre les loix de Nature. D'autant que
 elle a son bastiment si bien dressé, vni &
 cimenté, qu'il ne se peut aucunement
 dissoudre. Je vous diray librement, *SIRE*,
 & sous la bonne grace de vostre Majesté,
 que si i'eusse pensé, (mais qui l'eust pen-
 sé en la prosperité où vous estiez?) que
 vous eussiez esté si temperé vainqueur,
 si signalé modérateur de vos affectations
 humaines, si maistre de vos victoires, &
 que la France vous deust approuuer,
 voire vous esprouuer pour vn si noble
 Prince, pour vn si prudent Roy, voi-
 re pour vn si digne & modeste pasteur

en la bergerie: iamais ie n'eusse abādōné le pays, iamais ie n'eusse esloigné vostre Maieſté, pour m'absēter hors du Royaume. mais vo' estes mōſtré en cēt endroit, plus esmerueillable q̄ la merueille mesme. D'autant que nul ne se persuadoit ce qu'il a veu depuis, nul ne pensoit ce que depuis vous auez prudēmēt executé. Et moy le premier, SIRE, qui en ce desespoir, ressemblé le berger, qui accueilli d'une soudaine tēpeſte, & n'esperant recevoir le temps serain, gaigne de grande course vne grotte prochaine où il se tapit, & s'eschappe tāt qu'il peut de l'orage, voire se garre contre le mauuais temps.

Car ie m'en allay, quittant mon petit bercail, & quatre ou cinq petites oüailles, faisant le total de mon troupeau: dont la moitié & les plus tendres, sont peries sous les aspretez de mon desastre: & le reste gemit à present, battu & rebattu estrangement, sous les iniustes coups de ma fortune. Ie quitte donc la France, mon pays tant cheri, & la quittant, ie quittay tout le plaisir que Dieu m'auoit donné entre les hommes. Ie vins en vne terre où le sol & le ciel, &

R E M E R C I M E N T

tous les habitans m'estoient incognus. Mais comme il n'y auoit coin au monde, dict le Poëte, qui n'eust ouy parler d'Ænee, & de la ville de Troye, ainsi n'y eut il personne si barbare, qui ne nous regardast en pitié, & qui ne nous donnast l'arene & le riuage. Là i'ay esté neuf ans entiers, & presques autant que les Grecs furent deuant Troye. Et certes, nō sans souffrir plusieurs fatigues & tres-griefues incommoditez. Car ie vous promets, **S I R**, que bien que les maux soient frequents & diuers, voire tres-grands au monde, si est ce qu'il n'y a mal comparable au mal de l'exil. C'est pourquoy Brutus disoit, que les exilez, s'ils auoient de la vertu en leur maison, ils ne la deuoient laisser derriere, ains en faire bonne prouision, cōme de biscuit, d'autant qu'ils en auroient affaire par les chemins. Car osté le plaisir que i'auois d'auoir bien vescu, ie n'auois vn seul brin de plaisir, & mon seul plaisir gisoit en ma conscience. Et certes, le Poëte Grec a fort bien rencontré, quand il a dict ainsi :

L'homme estrange en quelque part qu'il

aille,

Aux citoyens est plus vil que l'apaille.

Le mespris, la solitude, & la pauvreté des exilez, sôt trois fascheuses & iniques Deesses, dont ils sont coustumierement poursuyuis & tourmentez. Voire ce sont trois brigands, trois procustes, & autant de scirons, qui le poignard au poing, les saisissent au collet, & leur tentent l'estomac & la gorge. Et à la verité, nul n'a sceu que valloit l'exil, si non celui qui l'a experimenté, puis qu'en l'experience gist le parfaict de la science. Si sçay-je bien que quelques vns, & des plus grâds de l'escolle, ont tenu que l'exil n'estoit qu'un nom de calamité. De quoi ie veux tomber d'accord avec eux, puis que tous les maux ne sont que calamitez. Mais ie dis, que c'est vne calamité si grande & poignante, qu'elle surpasse toutes les calamitez. Je dis que c'est un tourmēt qui excède tous les tourments. C'est pourquoy ie relegué aux dernieres terres, ceux qui nous ont escrit ces vers pour nous abuser.

Maints exilez, pauvres, & solitaires,

Loin de leur sol, ont bien faict leurs affaires.

REMERCIEMENT

Car outre que cet heur se trouue fort rare, & rarement, voire fortuitemēt rencōtré, & qu'il varie selon la diuersité des temps: si ne croy-ie pas, que iamais cela ait esté dict de nos esprits François, mais plustot de ceux, qui nourris en quelques lieux aspres & solitaires, comme aux deserts de la Thebaide, & dans les chaudes arenes de l'Afrique, où dans les roches d'Itaque, où dās les frimats de la Scytie, se feroient venus habiter en des pays bien temperez. Car tout ainsi que les sauuageons nourris en vne terre douce, s'ils sont transplantez en vn sol froid & rude, meurent incontinent & sans repit, Ainsi les esprits esleuez entre les amenez de la France, esprits subtils & delicats, ne peuuent viure s'ils ne sont en vn sol, & sous vn ciel qui soit clement & temperé.

Si puis-ie dire, SIRE, que quelque incommodité qu'il y eust en ceste terre hospitaliere, i'auois, toutesfois, si bien faict ma fortune, que ie pouuois habiter par delà, & cōmodement & honnestement: voire me passer de mon pays, comme disoit vn Romain en son exil, & m'habi-

tuer où les habitations ne sont sans incommodité de ceux qui les habitent. Car d'une amende amere, on en fait quelquesfois vne douce: & d'une eau vicieuse, on en peut faire vne plaisante, & delicieuse en goust. Je n'ay estois concilié les amitez des plus grands, & des meilleurs, & des plus vertueux du pays. Et par l'acquisition de quelques liures, ie pouuois adoucir les rigueurs de mon infelicité, & tenir tousiours mon esprit en exercice. Car les liures sont les medicamēts de l'ame. Avec eux comme avec mes bons amis, ie deuisois familierement, & me plaisois d'entretenir les Muses, & m'esgaier avecques elles, cōme on se resiouyt avec vne bande de belles & honestes Damoiselles. Ainsi Marcellus, ainsi Flaminius, ainsi Rutilius, auoient adouci l'aigreur de leur exil. D'une chose ie loue Dieu, SIRE, & le louieray tant que ie viue, c'est que iamais en mon exil, ie n'ay commis chose deshoneste, & indigne des mœurs, où i'auois esté nourri, indigne de la France, qui m'auoit porté, indigne du lieu, où i'auois esté employé. Car ie voulois ressembler ces

REMERCIEMENT

Vestales Romaines, qui sur le poinct de
 leur supplice, pour monſtrer leur chaſte-
 té, & l'iniquité de leur condamnation,
 auoient encore ſoin de tomber & s'en-
 ſeuclir honneſtement. Si n'ai- ie pas eſté
 exempt de calomnies. Mais ie louë Dieu
 d'auoir accompagné les Catons en tel-
 les bleſſures, & que les langues enuieu-
 ſes m'aient mis au fourneau, où ſe recuit
 la probité des gens de bien. Ils auoient
 vn beau champ, puis qu'ils me calom-
 nioient enuers les eſtrangers, qui ne ſça-
 uoient comme i'auois veü, & qui ſça-
 ra la vie qu'ils ont menée, tant dedans
 que dehors le Royaume, il ne s'eſtonne-
 ra iamais, que i'aye ſenti la dent de tels
 calomniateurs. La diſcorde eſt naturelle
 des aigles, & des Dragons; des abeilles, &
 des gueſpes, des aſnes, & des chardōne-
 rets. Mais il n'appartiēt qu'à vn Fimbria,
 de calomnier Sceuola, à vn Galba Ruti-
 lius, à vn Coſſutianus Thraſea. Ie puis di-
 re toutesfois, ſans iactāce, que les eſtran-
 gers ont loué deux choſes en moy, ma
 vie & ma conſtance contre la fortune.
 Car elle m'a bourré comme elle a peu,
 mais ie luy ay monſtré plus de cœur,

qu'elle n'a voulu. Si elle m'a donné de l'estoc, ie luy ay donné de la taille. Ie l'ay faict suer & escumer souuent sous mes reuers. Du moins i'ay eu ce bien, qu'elle n'a rien emporté sur mon honneur, & que ses trauerses, n'ont rien gaigné sur la frontiere de ma vertu, que i'auois trop biẽ munie. Elle m'a trouuee le pied ferme, & le cœur bon, & n'a pas esté sans pallir, voyant mes desmarches. Brutus escrit en son liure de la Vertu, qu'ayant veu Marcellus en exil, & l'ayant recogneu plein de constance & magnanimité, il pensoit que luy mesme fut exilé. Et Caius Cesar, ayant passé sans le voir, *Je n'eusse peu, dict il, regarder qu'à regret vn homme tant affligé, pour auoir si bien faict pour la republique.* On en dit autant d'Hermodorus Ephesien, qui fist les loix des douze tables. Car ceux qui le voyoient exilé, le reputoiẽt glorieux, & les Ephesiens qui l'auoient chassé, ils les tenoient pour miserables.

Vous donc, SIR, duquel l'esprit vif & penetrant, scauoit mon infortune, & qui comme vn bon pere, pesiez & plaigniez mon mal-heur, m'avez tiré de ce

R E M E R C I M E N T

destroit pour m'amplifier , & me donner à ma patrie. Vous m'avez fait ce que Octavius fist à Q. Lucretius, Vespasian à Sextilius , & le grand Seuerè aux Oppians pere & fils : dont le dernier nous a laissé cet excellent ouurage de la Pesche & Venerie. Vous m'avez rendu à ma patrie , moy qui auois tant aimé ma patrie : & m'y avez rendu, comme à la chose la plus desirable, qui me peust entrer en l'entendement. Vous m'avez donné entre mes bras ceste Campaspe, dont i'estois amoureux , comme Alexandre fist à Apelles. Et ce fut lors, que ie me souuins de ce que i'auois leu, que l'arc en ciel courbé sur l'espine blanche, la remplit d'une odeur & suauité incomparable. Car vostre arc de douceur, & de benignité, courbé sur moi, me remplit, & me parfuma d'un souuerain plaisir, & d'un aise incroyable de me voir rendre à ma patrie. Et certes, comme les enfans naturellement aiment & desirent, le premier lait qui les alimente : aussi les hommes naturellement aiment le premier air dont la nature les rafraichit, sur les douces entrees de ceste vie.

La nourriture premiere a vne grande force dessus nous. Ce qui se voit mesmes és choses les plus lourdes, & insensibles de la nature. Car il y a des plantes, qui ne peuuent souffrir qu'on les tire, hors de leur pays. Le baulme ne peut naistre qu'en Iudee. La pomme Assirienne transplantee, ne peut porter de fruit. La palme ne peut estre hors de son terroir naturel, & si elle y est, elle ne rapporte aucune chose; sa sterilité monstre le regret qu'elle a d'en estre hors. Le cinamome & la lauande Indienne, ne veulent sortir hors de leur sol. Ce que le Roy Seleucus esprouua, & le trouua vray en ayant fait l'experience. On a veu quelquefois du poivre en Italie, & de la casse en Septentrion. On a veu mesme de l'encens en la Lycie: mais quel Soleil, quelle chaleur secrettement maligne, leur substraict en ces lieux, le meilleur de leur substance, & tarit l'humour qui coule de leur tige? Je ne croy point que la melancholie ne les seiche, se voiant loin de leur seiour naturel, comme elle fait mourir les hommes, qui se voient longuement esloignez de leur maison. Pli-

REMER CIMENT

ne disoit de son temps , que les chastaignes difficilement prouenoient au terroir de Rome , tout ainsi que les Persiques & la noix Grecque , au Tusculan : combien qu'en la Terracinte, il y en eut des forests toutes entieres. I'escriis cecy, **S E R E**, pour monstrier que si les parties insipides, & les plus mortes de la nature, ont toutesfois quelque ressentiment de leur patrie, à plus forte raison les hommes pourueus de raison , & les François entre les hommes, que la terre a nourris d'une mammelle si douce & si delicate. Je vous cōfesserai que neuf ans entiers, que i'ay esté dehors, soit que i'allasse par eau, ou que ie fusse par terre , tousiours vn regret me rongenoit, & me suiuoit d'estre esloigné de ma chere patrie. Je le disois à mes amis ; ie le tesmoignoïs à mes ennemis : & comme ce Poëte Toscan publioit qu'il estoit Toscan, & qu'il mouroit Toscan, ainsi ie disois ordinairement ces vers.

*Je suis François, la France est ma patrie,
D'elle i'ay pris & l'honneur & la vie.*

Et à la verité d'autant que i'estois François, & nourri en l'air delicieux de la

France, d'autant enduroy. ie de me voir priué de ceste nourriture, pour demeurer en vn air, du tout contraire à mon premier & coustumier aliment. Nô que ie vueille violer, cōme l'on dit, les droits de Iupiter hospitalier, qui me sont tousiours venerables, & me mescōtenter de ceux qui m'ont si amiablemēt, & si honorablement receu. Cela est trop aliené de mon esprit, & trop esloigné de la gracieuse & naturelle recognoissance d'un François. Plustost ie m'exclame, leuant les yeux au ciel, & dis ce que dit le Poëte,

*Ce qu'ils m'ont fait de biens, les Dieux leur
veillent rendre,*

*Sur eux & leurs enfans, qu'ils le daignent
espandre.*

Mais ie puis dire, qu'encor que la solitude m'eust acquis vn autre naturel, & que i'eusse faiët cal, & endurcissement au mal: si est-ce que mon corps, voire mon esprit en cet aspreté de ciel, lui-estoit iournellement, & contestoit contre moy. Et sans mon Christianisme, qui me fournissoit de patience, toute ma Philosophie estoit par terre. Je voyois

R E M E R C I M E N T

en defroute tous les beaux secrets que j'auois appris és porticques des Stoïciens, & dans les allees des bois de l'Academie. l'estois comme ces arbres de la mer rouge, qui toutes rongees de fel, gisent steriles sur le riuage, & couchees entre les arenes, les racines toutes nuës, ne tiennent qu'à vn petit fil, & resistent à peine, aux incurfions de la nouvelle maree. Et certes le long temps germoit desia en mon cœur, quelque petite semence d'impatience. Ouy ceste longueur me minoit, & me menoit en vne langueur. Et comme les fiebures lētes & longues, nous trauaillent mollement, & toutes-fois nous ruinent violemment: ainsi ie m'ennuiois de la longueur, & entrois en vne espeece de mal, qui lentement me trainoit, & me trainant qui me ruinoit.

Ce fut lors, S I R E, que fort à propos ie receus vos lettres, lesquelles veuës, ie louë Dieu de vous auoir donné vn esprit intelligent & perceptible de mon mal, & d'y auoir apporté le remede. Plusieurs grands Rois ont inuenté de grandes medecines, comme Myrrhides,

thridat; en son pont Euxin, Lyfimachus en son Asie, & Gentian en son Esclauonie. Mais vos lettres m'ont esté vn médicament Royal, pour m'oster vn mal Royal, qui me tourmentoit. Et certes, ie les receu nō sans vn singulier plaisir & obligation enuers vostre Majesté. Car comme on dict du Roy Iuba, qu'il trouua l'Eusorbie au mont d'Atlas, dōt le suc est blanc comme lait, & ne se cueille que de loin, & qui proufite grandement à la veüe : ainsi du souuerain feste de vostre Majesté, me vint ce remede plein de candeur, & lequel ie recueilli de loin, estant encor en Brabant, pour m'esclaircir les yeux, & me faire voir la France, dont j'auois perdu de veüe le gracieux, & plaisant séjour. O que ce remede, SIRE, me fut agreable en l'ame, & combien ie loué lors la clemence de vostre Majesté. Je pensois, certes, voir l'esclat d'une pierre precieuse, enchassée en vostre cœur, qui m'auoit donné dedans les yeux. Je dis notamment enchassée en vostre cœur. Car ce n'est pas assez qu'une esmeraude soit belle, ou vn diamant fort brillant & de belle eauë.

R E M E R C I M E N T

il lui faut encore vne enchasseure digne de luy, & qui rende sa clarté plus gracieuse. La clemence de soy, est vne pierre precieuse qui a beaucoup de grace & de beauté : i'adiousteray encor beaucoup de singularité. Mais quand elle est enchassée au cœur d'un Roy, & que son or lui sert de chaton, c'est lors qu'elle brille & esclatte en mille sortes. Les bons Rois sont l'or du monde : & comme l'or est beau, & qu'il se dilatte facilement, aussi leur clemence facilement s'estend & s'espend sur le chef de leurs subiects : Voire sur toutes les parties de leur Estat. Les orfevres ne firent iamais estat d'un or rude, iamais les subiects ne firent compte d'un Roy cruel. Car comme les Mathematiciens tiennent, que la ligne droicte est la plus courte : aussi moins de rigueur est la voye la plus droicte, par laquelle les Rois cheminent au comble de toute prosperité. C'est par la clemence que les Rois approchent le plus près de Dieu. Mais par la mesme clemence, ils approchent le plus près du cœur des hommes. Ce qui a esté cognu, & mesmes esprouvé au

fonds de la Scythie, au cœur des nations plus barbares & inhumaines. Car on dit de Menander, qu'ayant par sa douceur fort bien gouverné les Bactriens, les villes, apres sa mort, se debattirent à qui luy donneroit sepulture. On dict pareillement qu'en l'Isle de Samatra, qui est la Taprobane tant chantée par les anciës, bien que ce soit vn sol esloigné du corps de la terre, & au milieu de la mer Indique, & sous vn dernier climat du monde: si est-ce qu'en l'election de leurs Rois, ce poinct y deuoit estre, qu'il fust pourueu de clemence. Et certes, c'est vne vertu par laquelle, non seulement nous surmontons autrui, gaignant le cœur, qui est le principal dongeon du chasteau de l'homme, mais par lequel nous surmontons encor nous mesmes. Aussi n'y a-il victoire si honorable, ny trophée si beau, ny si riche couronne, que celle-là. Et Claudian instruisant vn Empereur, luy recommande ceste vertu dessus toutes, quand il l'admoneste de dompter sa cholere, & d'estre clement, & qu'il parle à luy en ceste sorte:

REMERCIEMENT

*Quand vous seriez Seigneur des extremes
Indois,*

*Que le Sere & l'Arabe, & le peuple Me-
dois*

*Courberoit deffous vous, si vous tremblez
de craintes,*

*Si de meschancerez vous auez l'ame at-
tainte,*

*Si l'ire vous assaut, & trouble à tout ob-
ject,*

*Vous n'estes plus vn Roy, vous estes vn sub-
ject.*

*Vous sentez dans le cœur vn mal qui vous
tourmente,*

*Qui vous deschire l'ame, & qui vous vio-
lente,*

*Mais à vos passions, si vous donnez la
loy,*

*Lors vous n'estes plus serf, vous estes vn
grand Roy.*

Cela me fait souuenir d'Homere, qui
sous la personne d'Vlysses, voulant for-
mer vn sage Prince, le faiët doux & cle-
ment, domtant son ire & ses passions.
Car il diët, qu'il n'y auoit partie en luy,
qui ne fust ioug, & ne fust subiecte à son
esprit. Et cet esprit, estoit si fort attaché

à la sapiëce, qu'il ne s'en esloignoit aucunement. Aussi lors de la mutinerie excitée contre Agamemnon, il en intimida plusieurs de la parole : (car c'estoient ses compatriottes) mais il ne frappa personne de la main, que Tersites. C'estoit à la façon des tonnerres, qui en espouuentent plusieurs, & n'en frappent qu'un. Je n'ay, certes, rien tant esmerueillé jamais, que l'Empereur Auguste, pour estre infiniment clemēt & doux. Et croy que pour ce sujet, il estoit iustemēt dit Auguste. Macrobe deuissant de luy escrit, qu'il ne sçauoit lequel estoit plus admirable en luy, ou les bōs mots qu'il enduroit, ou ceux qu'il proferoit. Je ne diray pas seulement qu'il enduroit des grāds, mais des plus petits. Car les plumes & les langues, les escrits & les paroles, l'ont piqué librement, & ne s'en est fait que rire. Encore estoit-ce en paix, & non en guerre. Aussi de son temps, les actions, & non les paroles, venoient en disquisition, ce dict Seneque. C'est vn grand heur en vn Estat, d'auoir vn Prince doux & moderé, & non adonné à la cruauté. Mais c'est vn bien incomparable, quand

R E M E R C I M E N T

la malice du tēps ne le contraint de faulser son bon naturel & sa clemence. Car quand la douceur du cœur d'un Roy est perduë, le Soleil du monde est eclipsé, & le genre humain priuë de feu & d'eau, qui sont les elements au monde plus nécessaires. Vn sage Sénateur disoit en opinant au Senat Romain. *I'ay ouy souuēt le Prince se plaindre qu'on ne donoit aucun lieu à sa clemence.* Et c'est pourquoy Tibere disoit yn iour dedans le mesme Senat, ces paroles, qui sont certes, & belles & veritables. *Faisons place aux bruits, & leur donnons loisir de vieillir: Car si nous en faschons, on les croira veritables, si nous les negligons, on les estimera mensongeres.* Et à la verité, ce qui se dict, & qui s'escriit, ressemble proprement à la fumee. Car si vous leur donnez air, ils s'esuaporent & s'esuanouissent, & on n'en parle plus: si vous les enfermez, ils vous prennent au nez, & font plover les yeux, & quelquefois ils chassent tout le monde de la maison. On en dict autant des fleues. Car si vous les laissez courir & galopper, ils se vont precipiter dedans la mer, où ils perdent leur nom & leur impetuositë. Si vous pensez les arrester, ils s'enflent, ils bouil-

lent & escument, & quelques-fois brisent tout ce qui leur resiste. Combien y a-il de choses au monde qu'il faut laisser passer sans s'y arrester ? Car comme le temps les faiët naistre, c'est aussi le temps qui les destruit. Nous voyons quelques-fois des matinees si pleines de broüillats qu'on n'y voit goutte. De s'y opposer, c'est chose du tout impossible à l'homme, quand le mal excède son pouuoir, & qu'il vient d'en haut. Mais si tant soit peu on attend & quel'on temporise, le Soleil venant à se leuer, il escarte toutes ces obscuritez, il dissipe cestenebres, & ne voit-on plus de nuïët, mais vn plein iour. Toutes choses ont vne autre face qu'elles n'auoient auparauant. Aussi durant nos guerres, **SIRB**, que le broüillats estoit si espais sur la terre, nous ne pouuions voir la clarté de vostre esprit. Mais la paix faiëte, & le Soleil de tranquillité monté en son Midi, apres que ce nuage est tombé, nous auons admiré ce qui nous estoit caché, & l'auons recerché comme chose miraculeuse. Que si l'on a dit ou escrit quelque chose de ce quel'on ne cognoissoit,

REMERCIEMENT

cela s'est esuanouy avec nos tenebres, & n'en a on plus de souuenance. Il me souuient à ce propos, du Roy Louys douziesme qui estoit si clement, qu'il rioit de ce qu'on l'auoit ioué à la Bazoche. Je n'approuue pas ce qu'on dit de luy, mais j'admire la bonté qui estoit en lui. C'estoit ceste bonté Royale, qui auoit ioint ensemble l'Empire & la liberté. C'est ce mesme Prince qui disoit, qu'il n'appartenoit au Roy de France, de venger l'injure du Duc d'Orleans. Qui est vn mot plus beau que son Sceptre, plus grâd que n'estoit grand son Empire. I'en eusse peu dire autant de vostre Maiesté, SIRE, & couvrir ma nudité de parçille fucille, mais ie ne me veux seruir de ceste vaine subtilité. Et qui est sans art & sans fard, comme ie suis, aime mieux estre blasmé d'estre trop naïf que de se mōstrer trop vainement subtil. Ie suis François & franc de cœur & de bouche: i'appelle les choses par leur nom, comme les Macedoniens, ie deuise en simplicité comme les Beotiens. De la mesme rondeur, voicy ce que ie dy pour ma defence. Que ie ne veux jamais contester ni contre Dieu, ni

contre les Rois : car Dieu a tousiours pour soy la raison , il a tousiours pour soy la puissance. Les Princes ont la mesme faueur & priuilege. Par la raison, ils gaignent tout, par la puissance, ils vainquent tout. Il ne faut iamais s'opposer, disoit vn Ancien, à celui qui a trente legions. C'estoit pour monstrier la puissance de l'Empereur, laquelle accompagnee de la iustice, pouuoit faire de grâds esclats en la terre. Ainsi Laberius cheualier Romain, prié de Iules Cesar, d'entrer sus le theatre, se contenta de luy dire ces vers, pour tesmoignage de son obeyssance.

Si ie vous refusois ie serois accusé,

Quand les Dieux ne vous ont rien iamais refusé.

Ces mesmes vers, SIRE, ie les vous dis, & parle à vostre Maiesté en ceste sorte. SIRE, c'est la terre qui vous a fait, mais c'est le ciel qui vous a parfaict, & qui vous a accompli de ses graces : Vous estiez nay au rang des hommes ; mais il a voulu vous esleuer par dessus les hommes. Comme il preside sur ce monde, ainsi vous a. il mis sur vos sujets.

REMERCIEMENT

Et pour les gouverner, il vous a donné & la prudence & la puissance. Avec ces deux, vous estes concilié des amis, avec ces deux vous avez assubiecti vos ennemis. De plus grand Prince, il ne s'en trouue point. De meilleur Roy, il ne s'en voit point. Aussi tout vous obeyt, tout vous reuere. Et qui voudroit ne sujurer la raison, & s'assubiectionner à la puissance? c'est où ie ne veux vous cōtre dire. Avec ces deux, moy mesme ie me condamne. Ie me confesse auoir perdu, afin de vous donner gaigné. Et puis que tout vous est subiect, ie veux m'assubiectionner avec le reste. En cela ie me mescprends. Car ie suy le ciel qui m'est garand, & qui seul vous a donné tant d'heur, que les hommes ont tous ployé sous vos victoires. Ainsi Rome s'assubiectionna à Iules Cesar, ainsi le monde ploya le chef sous la bonté & puissance d'Auguste. Et à la verité, bon vous recognoist, & à bon droit pour le Cesar & l'Auguste de la France. Voila où ie finis, sinon que i'adiouste, que i'ay esté comme le pauvre Ozan, car pensant voir l'arche tomber, i'ay mis la

main pour la redresser, & ie suis mort.

Ie receu donc les lettres de vostre Majesté, dont les paroles ne sont que douceur & benignité, & telle benignité; qu'il n'y a rien de plus bening. Ie pensay lors aux fueilles des arbres, qui se trouuent les matins toutes couuertes de miel tombé du Ciel. Car ie m'esmerueille de la fueille de ma vie, sur laquelle estoit degoutée la liqueur immortelle de vostre douceur. Ie pensay lors apres vn long hyuer, voir le retour de mon Printemps, & creu que l'heure estoit venuë, où la Cigoigne deuoit retourner en son nid. C'estoit la violette blanche, dont la fleur ouuerte me presageoit la venuë de mon Soleil de Mars. C'estoit l'arrondelle messagere de la coulee de mon hyuer. On dict que l'arbre de la Lotte, a tant de suauité, que les compagnons d'Vlyse qui en mangerent, oublierent leur pays, pour estre tousiours repeus de si douce viande. Vos lettres SIRE, sont tout au contraire, par-ce qu'elles rameinent au païs ceux qui s'en estoient separez. Et le ramènent pour manger vn fruit plus

R E M E R C I M E N T

doux que la Lotte, vn fruit plus amoureux, & sauoureux que n'est le miel : qui est la iouissance de la patrie. Ceux qui nauigent le sein Persique, sentent de loing les odeurs del'Arabie, dont ils s'ont tous parfumez: ainsi de loing le vent me fit sentir les diuines odeurs de mon pays. Je di le vent de vos lettres, qui m'estoit comme vn cinname odorant, ou comme vn mastich battu des raïons du Soleil, qui exale des senteurs incomparables. Les anciens ordinairement railloient l'image de Mercure, avec celle de Venus, & les ioignoient ensemble: pour monstrier que les parolles gracieuses estoient deux diuinitez qui auoient grande puissance sur les hommes. Mais cela s'espreuve & se treuve en vos lettres, où les paroles puissantes, & pleines de Majesté, sont accompagnées de douceur, & d'amœnité. Car quand vous parlez, vous ne parlez pas en paroles arrogantes, comme vn Roy tragicque monté sus ses hauts souliers, ou quelque Tamberlan de Scythie plein de presumption. Vous ne dictes pas que vo⁹ mayez d'õné abolitiõ, & n'vsez de termes mal plaisãts

& fascheux. Vous me remettez en vos bonnes graces & au nombre de vos subjets, & aux droicts que i'auois auparauant. Vous parlez en Prince, nō transporté de passion, mais en Prince sage, en Prince remply de douceur & d'affection. Aussi iugiez vous assez que mon crime n'estoit pas crime, que ce n'estoit qu'amour & iuste amour enuers ma religion. Vos lettres, parlent selon le hieroglipse imprimé dans vostre grand seel. Car au lieu que les autres Princes en leur seau sont armez de pied en cap, & qu'ils sont l'espee au poing, montez sur leurs grāds courriers, & ne faisans parade que de leurs armes. Vous SIRE, y estes assis pacifique, en vne chaire royale, vestu d'un long habit semé de fleurs de lys, & la couronne royale en teste pour monstrier que la Noblesse d'un Roy de Frāce paroist plustost par la raison, que par les armes: plustost par la douceur que par la force. Combien que vos armes ayent esté assez senties, & esprouuées, tant dedans, que dehors le Royaume. Or il n'y a chose que l'on poise tant que les paroles d'un Roy, qui par tant iamaïs ne tō-

REMERCEMENT

bent à terre, ains se recueillent par tous
 & de tous, & curieusement & diligemment.
 Mais vne des choses qui leur sied le
 mieux, & qui leur est le plus à loüange,
 c'est de les auoir non pleines d'aigreur,
 & d'amertume, mais remplies de mode-
 stie & de suauité. Aussi l'on aime l'oliuier
 pour la douceur qui coule de son huile,
 comme on hayt les vnedons pour leur
 aigreur. Et n'est-ce pas pourquoy les ar-
 bres esleurent l'oliue pour leur Roy?
 On ayme les bons Roys pour la beni-
 gnité de leurs paroles, comme on hayt
 les tyrans pour la rudesse de leurs on-
 gles. Aussi ne faut-il pas cueillir le baul-
 me avecque le couteau: il le faut rompre
 doucement avec la main. Les hommes
 se doiuent auoir par la douceur, & dou-
 cement tirer le suc, & le laiët de leur a-
 mitié, non par la force. Le Noyer se gau-
 le, mais l'oliue se cueille avec les doigts.
 L'œil ne s'essuye avecq' le drap, mais a-
 uecq' l'agreable & fraische douceur du
 linge. C'est pourquoy Homere parlant
 de son Nestor diët, qu'il estoit vn grand
 Prince, dont les paroles estoient plus
 douces que le miel. Et à la verité le miel

est doux, & desirable, mais il ne veut que on en mange beaucoup. La parole d'un Roy doit estre remplie de douceur, mais courte & sobre, & qui ne charge pas en quantité, mais qui soit delectable en sa qualité. Car un Prince qui donneroit des lettres de grace, avec paroles d'aigreur, & de reproche, feroit perdre le goust de son benefice, & souffleroit d'une mesme bouche le chaud & le froid, l'aigre & le doux, le plaisir & l'ennui tout ensemble. C'est ce que l'on reprochoit à Tibere, qui prié par le Præteur Marcus Allius de le desgager de ses debtes. Il ordonna qu'on luy bailleroit par Estat, le nombre des creanciers, & pourquoy les debtes estoient créées.

Ce n'estoit pas, dict Seneque, luy aider, c'estoit faire un ordre de Creanciers, comme un Commissaire. C'estoit luy faire honte. Aussi Fabius le Verreux appelloit tel benefice un pain de pierre. Car il est si dur, que l'on n'en peut manger. Il a bien apparence de pain, mais en effet c'est un caillou. Et à la verité qui veut faire du bien, ne le doit trop cher vendre. Il y a une histoire d'as Tite Liue, qui dit,

REMERCEMENT

que le Senat Romain ordonna, sans en estre requis, que les soldats Romains seroient souldoyez du public. Car auparavant ils n'auoient point de solde. Le peuple courut au Palais pour le remercier baisant les mains des Senateurs, ils disoient, *qu'à bon droict ils estoient leurs peres, de leur octroyer ce à quoy ils n'auoient iamais pensé; & que leurs Tribuns ne leur auoiēt iamais demandé.* Et certes, dict vn ancien Philosophe, il n'y a chose qui consiste plus que celle qui est demandee. Les presens gratuits sont tousiours mieux receus de la main des hōmes, que ceux qui sont si cher vendus. C'est pourquoy les vieux Romains disoient, qu'il n'y a point de plaisir quand le champ lucte contre son maistre, & qu'il rapporte ses fruiets à regret. Car si apres tant de peines de le labourer, & le harser, & l'espier, il ne paye liberalement son laboureur, tout ce qu'il apporte n'a point de plaisir & n'est pas liberalité, c'est contraincte.

Je ne puis passer sous silence vne clause inferée & dans les lettres qu'il vous a pleu m'octroyer, que plusieurs de vos
bons,

bons, & fidelles seruiteurs vous auoient
 supplié de mon retour. Ainsi Caton &
 Pompee moyennerent que Cicéron re-
 tournast à Rome. Et comme l'un d'eux
 estoit grandement puissant, ainsi l'autre
 estoit fort homme de bien. De sorte
 que la probité joincte à la puissance, fu-
 rēt les operateurs de ce retour. Les bons
 Iardiniers sçauēt le moyē de faire reue-
 nir les abeilles en la ruche, & les bōs Pa-
 steurs les oüailles au troupeau. O que ie
 dois, SIRE, à Monseigneur le Chancel-
 her, apres vostre Majesté, qui sçachant
 vostre intention a seellé mes lettres, &
 combien à tant de grands & honnestes
 Seigneurs, qui les ont conseilles & pro-
 curees. Ce m'est certes vn grand hon-
 neur, SIRE, que pour moy qui ne suis
 rien qu'un ver de terre, vne fucille bat-
 tuë de tant de vêts, vne poudre pirouet-
 tée de tant de tēpestes, se soiēt emploiez
 tant de gens d'honneur, encor enuers
 vostre Majesté, qui est si haute & si plei-
 ne de reuerence. Ie pensois que mon
 exil de neuf ans, m'eust fait perdre tou-
 te cognoissance. Car comme vn Soleil
 absconcé ne fait plus de iour; la prospe-

R E M E R C I M E N T

rité d'un hōme perdue, ne fait plus d'amis. L'absence les fait perdre, & la présence les dōne & les concilie. Aussi que l'homme infortuné se trouue ordinairement en solitude, & celui qui est bien fortuné, en bonne cōpagnie. Mais ie remercie Dieu de ne m'auoir tāt destitué, qu'il ne me restast encores des personnes, & proches de vostre Majesté, pour tesmoigner de moy & de mes mœurs. Ie dis des personnes nō petites de qualité, mais grandes en autorité: personnes recommandees pour leurs vertus, & nō detestees pour leurs vices. C'estoit vn reste de mon premier honneur, lequel, ou ma triste fortune n'auoit encor veu pour me l'oster, ou qu'elle n'auoit peu si tost le dissoudre.

O bon D I E U ! est-il possible qu'apres vn si long temps, tant de gens de bien se souuinssent de moy, pour en rafraischir la memoire à vostre Maieité? Cela me fait souuenir des Lampes où il y a eu de l'huile de senteurs, & qui sentent bon long temps apres qu'elles sont esteintes. Quand Vlyse reuint chez luy, il fut plustost recognu de son chien, que

de la femme, plustost d'une beste brute que de ses enfans & seruiteurs. Qui estoit certes vne estrange malheur: que les bestes irraisonnables, monstraissent auoir plus de souuenance des hommes, que les hommes pourueuz de raison, Mais il m'est aduenu tout au contraire. Car les hommes, & non les animaux irraisonnables, les gens de bien, & non les vicieux, m'ont recognu apres si long temps, & ont porté tesmoignage à vostre Majesté, de mes mœurs & de ma vie. D i b v me face cest heur qu'ils me ayent desiré pour estre vtile; comme les habitans du mont Cautase desirent le retour des oyseaux Salmacides, pour le profit de leurs païs. Si Agamemnon, a souhaitté dix Nestors, pour l'assister aux affaires de son estat, ie vous souhaite, S i r e, cent de ceux-cy pour vous conduire au vostre, & les vous souhaite avec autant de deuotion, que la Vertu est digne d'une Royale affection.

Voila donc le premier trait de vostre clemence, par laquelle vous vous estes monstré enfant de Dieu. Clemence peculièrè à vous, & dont vous auez hono-

R E M E R C I M E N T

ré vne infinité d'hōnestes hōmes. Je l'ay
 experimenté en partie, me retirāt d'exil,
 & me rendant à mon païs. Maintenant
 ie la veux toucher en autre espee, qui
 est de m'auoir rendu en ma liberté, & re-
 tiré d'vne longue prison. Car, SIRE,
 vous auez fait de vostre debonnaireté,
 ce que Dieu veut qu'ō face du sel aux sa-
 crifices. Il commande qu'on le mes-
 le par tout. Et comme les Sabees ne se
 chafoient que de feu d'encens, pource
 qu'ils viuoient au milieu de l'encēs, ain-
 si vostre ame qui n'est que clemence,
 espond par tout l'odeur de sa clemence.
 Je scay bien qu'à ce seul mot de prison,
 on s'esmerueillera que nonobstant vos
 lettres, on m'ait neātmoins emprisonné.
 Mais, SIRE, pour esleuer le grain, il
 faut qu'auparauant il tombe à terre. On
 n'en verroit iamais ny le tuyau verdir,
 ny l'espig se grener, si parauant il n'estoit
 cheut & deprimé. Il a fallu que vostre
 bien fait me soit mort ignominieuse-
 mēt, pour me ressusciter plus glorieuse-
 ment. C'est vn fil de vinaigre qui a serui
 pour donner pointe à vostre benignité.
 Je ne me veux souuenir de ma prison, si-

non en tant que cela a d'auantage faict
reluire vostre clemence. Les animaux
du pont Euxin, qui se repaissent d'ab-
synthe, n'ont point de fiel. Et ie suis si
repeu des mauuais repas de la Fortune,
que ie n'ay point de ressentimēt de dou-
leur. Je ne me ressouuiens que de vostre
bonté. Aussi que le feu & l'alun purgent
l'or, & la calamité esprouue la vertu. Je
dis que ie ne veux me ressouuenir que
de vostre douceur. Car tout ainsi que le
blanc d'œuf opposé sur vn tableau, dont
les couleurs sont obscures, les fait paroi-
stre & reuenir, & qu'ils mōstrent l'indu-
strie de l'ouurier, & la grace de la peintu-
re. Ainsi la candeur, dont vous auez ver-
ni l'obscurité de mon mal-heur, a d'auā-
tage rehaussé la couleur vive de vostre
Royalle debonnaireté enuers moy. Car
on a veu que nonobstant toutes choses,
vous auez perseueré en vostre douceur,
& estes demeuré inuiolable en la foi que
vous m'auiez donnée. Je ne vous nieray
pas, que les estrangers ont esté fort esba-
his de ce qui s'estoit passé. Mais le miel
n'est que meilleur, qui a eu le vent de la
marine: & la myrthe, comme la rose, ne

REMERCIEMENT

croist point sans espine. Je fais cest esc
 & le publie expressement, afin que pen
 trant iusques à eux, ils croient de vost
 Majesté ce qu'il en est, & qu'ils ne pēse
 y auoir rien que plein de sincerité, d'i
 tégrité & de bien vucillance. Autrefo
 en ay-je escrit ce qui en estoit, & maint
 fois l'ai-je publié de bouche, cōme ie l'a
 teste encor particulièrement par cet e
 crit. Il sera l'esponge, qui effacera cet a
 cre, tōbee sur la blâcheur de mon papier
 De mescontentement, ie n'en ay poin
 & n'en puis auoir, ie remets tout cōm
 vous me l'auiez remis : Et la debonna
 reté que i'ay receuë de vostre majesté p
 vne main, ie la rends de l'autre : Je sca
 bien, SIRE, que ie pourrois vous esclarc
 de la sincerité de mes actions : Ma
 ie ne veux contester en chose où voi
 auez seul interest. Je vous dōne gaign
 Et puis que la fortune vous a tout fai
 vaincre, & que vous le meritez, ie veu
 estre vaincu de vous, & cōfesse que mo
 & mes raisons ne sommes rien. Au con
 traire, nous nous iettons ensemble
 vos pieds, pour vous seruir de trophée
 Mais ie viens à ceste benignité

qui m'a retiré de prison, comme à vne des plus singulieres faueurs de vostre clemence. Car ie me souuiens du Roy Agis, qui escriuant à Idræus Prince de Carie, en faueur de Nicias, & luy m'adoit ainsi : *Si Nicias n'a point failly deliure le, s'il a failly deliure le pour l'amour de moy : mais comment que ce soit, deliure le.* D'autant qu'à quelque prix que ce fust, vous vouliez qu'on me deliurast. Et certes, SIRE, c'estoit assez d'auoir esté neuf ans en vn lointain exil, sans que mon malheur me donnast vne recharge. Le lyon se contente d'auoir abbatu, & la guespe par pitié, ne picque iamais ceux qui sont frappez des scorpions. Le scorpion de la fortune, qui a ses dents à la queue, m'auoit assez outragé, sans redoubler mes playes. Mais comme la peinture d'un Ajax foudroyé, est proprement l'œuvre d'Apolodorus : aussi mon chef battu & rebattu de tant de maux, est le vray tableau de mon infortune. Qui est à la verité tres dure, cruelle, & implacable. Vn graue autheur recite auoir ouy dire à vne pauvre fême fuitiue en la getulie, q̃cōme dās des bois vne

REMERCIEMENT

lyonne fust preste à la deuorer, s'estant
 mise à genous deuant elle, & luy deman-
 dant misericorde, elle l'auroit flechie à la
 douceur, & par ses larmes luy auroit don-
 né la vie. Mais ma cruelle fortune n'est
 pas ainsi, car plus pay eu de mal, plus elle
 m'en a fait, & son cœur n'a peu s'assou-
 uir que par le total de ma ruine. Toute-
 fois il n'est mal dont Dieu ne tire quel-
 que bien. Il falloit que le mal-heur m'af-
 fligest cruellement, pour me releuer
 plus glorieusement par vostre dextre.
 L'auois vos lettres en la main, comme
 l'abeille à la pierre au pied, pour me sau-
 uer de la tempeste. Mais Dieu a permis
 que ce remede a esté vain, pour faire pa-
 roistre la sincerité de vostre cœur, & la
 parole que vous m'auiez donnée. Orie
 loue Dieu, & vous, de ma deliurance,
 laquelle ie ne puis exalter sans parler
 de ma prison. Je loue la santé selon le
 mal & selon la mesure de la douleur, ie re-
 commande mon remede. Car il y a plus
 d'honneur de guerir vn appopléctique
 qu'un simple febricitant, & plus de gloi-
 re de deliurer de prison, que de descen-
 gager d'une simple debte. Le mal de

la prison n'est point vn petit mal : ains d'autant plus grand, que l'homme aime sa liberté, & qu'elle luy a esté dōnee pour cōpagnie perpetuelle. Ie ne dis pas seulement ceste liberté d'esprit, laquelle toutes les puissances du monde ne peuuent forcer, mais ie dis ceste liberté de corps, si aimable à l'homme, & si desirable, principalement quand on l'a perduë. La prison certes, a de grandes poinctes de douleur, car le corps qui est en captiuité s'y fasche, l'esprit s'y ennuye. On y contracte des humeurs croupies, toutes homicides de la santé. On y voit, on y oyt, cent portes, cent gonds, cent verrouils, cent cadenats, qui font fremir tout le corps, & l'esprit des escoutans. Et le matin, & le soir, le iour & la nuit, il ny a que des horreurs estranges. On n'y parle que de mort, & de maux, & des sauiçes & de supplices, on n'y entēd que des plaintes, & regrets, on n'y voit que choses misérables. Ny le repas ne vous nourrit, ny le repos ne vous contente. Tout s'altère, tout s'agrit, & la nature mesme. Quelles necessitez y a-il que l'on n'endure, & quelles pauuretez se peuuent dire que

R E M E R C I M E N T

Ion ny souffre ? Mais principalemēt aux cachots noirs: où l'ō ne voit que pauvres gens destinez ou condānez à la mort, & perpetuels habitans des tenebres plus que Cymerienniers qui sont logez si à l'estroit, qu'on ne sy peut remuer, & qui pis est, entre les immūdices du lieu, & les excremens de nostre pauvre humanité. C'est de ce lieu S I R E, dont vous m'avez tiré, & dont ie vous rēds graces infinies.

Vous avez esté le Mercure dont la verge m'a guidé pour me rendre à la lumie-
re. Et certes vous en suis infinimēt obligé, & d'avantage obligé, que vostre Majesté s'est abaissée pour me releuer. Je ne vous nieray point que plusieurs des païs estranges me voyans opiniastré à mon retour, me prioient de demeurer, & me prioient que volontairemēt, ie m'allois perdre. Mais ie disois tousiours que cognoissant le cœur de vostre Majesté, iamaïs vous ne souffritiez qu'on me feist rien que fidelité. I'auois autres-fois leu dans l'histoire de Froissard, *quen lettres escrites ne gisent pas tous les vrais pardons,* & sçauois ce qui en estoit arriué. Mais tenant le pied ferme sur la vertu, & reputatiō de vostre Majesté, ie passay le Ru-

bicon & m'ē allé où le peril m'attēdoit,
 & où depuis ie me suis veu, & dont vous
 m'avez retiré par vostre puissance sou-
 ueraine. Enquoy j'ay bien cogneu, ce
 qu'il y auoit de grand en vostre cœur.
 J'ay veu la rectitude de vostre Sphere,
 en l'obliquité du Zodiaque de mō mal-
 heur. Car tout ainsi que les tendres oi-
 seaux ne peuvent sans mourir estre tou-
 chez des orties, mais que les grands &
 courageux, n'en tiennēt compte: ainsi
 par vn grand cœur auez vous passé ce
 que j'auois escrit, scachant que ce n'e-
 stoit que l'escume de nos troubles, & les
 bondissements de nos desordres. Car
 comme le miel en esté boult, & escume,
 aussi les ames plus doulces s'enflent souz
 le chaud des ciuiles esmotions. Quant le
 Soleil est en la canicule, la mer commen-
 ce à bouillir quelque froide qu'elle soit,
 les estangs se meuuēt, quelques engour-
 dis qu'ils soiēt, & toute la nature se resset
 des ardeurs de cet astre. Il n'y a naturel si
 bien cōposé qui n'ētre en chaleur extra-
 ordinaire. On dit mesmes qu'en *Æthio-*
pie, il ard des forests toutes étieres. C'est
 lors qu'il ne se faut estonner des fieures
 ardentes, & si durāt les fieures les ma-

R E M E R C I M E N T

lades causent à plaisir: l'en ay esté saisi, & en ay dict ma ratelee comme les autres, mais cela ne vous a touché, ayât le cœur trop grand & trop magnanime pour vous arrester à telles poinctes,

Or Dieu soit loué **SIRE**, & vostre Majesté aussi, que l'enclume de vostre cœur, battue & rebattue, n'a peu s'eschauffer contre moy. Cela m'a faict cognoistre que le cœur des Rois estoit en la main de Dieu, & que la part où il veut il l'incline. Quand l'oyseau est sur la branche, nul ne sçait où il doit voler, & tel desire à la fenestre qu'il le voit tourner à la dextre. Mais vostre cœur s'est tourné sur le costé droit, & a embrassé la foy qu'il m'auoit promise. Et comme le feu qui depeuple vne forest, s'il trouue vn grand fleuve, s'arreste-là, & y attētit son courroux: ainsi le despit de ma mauuaise fortunē, s'est accoisé, au fleuve de vostre benignité. Dequoy **SIRE**, vous en auez esté infiniment loué. Car cōbien de bouches, pēsez-vous, qui vous ayent donné de benedictiōs? Combien de cœurs en ont fait de vœux pour vostre prosperité? Autant certes, qu'il y a

d'honneur, & d'excellence, de conseruer au lieu de perdre, autant qu'il y a d'interualle, entre la souueraine douceur, & la rigueur. Le baulme des vergers des Roys de Iudee, estoit merueilleusemēt loué en l'antiquité, non seulement pour son odeur, mais pour les cures qu'il faisoit, & pour la santé qu'il dōnoit. Quelle odeur pensez vous, qu'ait donné vostre douceur par la Frāce, nō seulemēt, mais par tout le mōde? & quelle santé, quel allegemēt aux plaies que i'auois en bamer? SIRE, pour l'estroictē prison, dont vous m'auēz tiré, dieu vueille dilater & amplifier vostre Empire, autant & aussi glorieusement que fut amplifiée ceste vigne presagée de l'Empire des Perles, que songea Astiages estre sortie du ventre de sa fille. Ou bien que cest arbre du songe de Nabuchodonosor, soubs lequel se reposoient tous les oiseaux de la terre. Il n'y a figure de Mathematique, qui remplisse le triangle, que le triangle: aussi ny a-il chose au monde, qui puisse payer l'amour que l'amour. C'est ce que ie vous offre avec le vœu de mon humble seruice, pour eternelle obligatiō que

REMERCIEMENT

i'ay à vostre Majesté.

De laquelle certes, ie ne puis que ie ne me souuienne, & souuent, voire quāsi continuellemēt. Car i'ay ce iour en mémoire, ou sorti de prison, & vous trouuant en vostre iardin des Tuilleries, avec la Royne vostre compagne, ie vous remerciay de m'auoir tiré d'exil, & de prison, & de m'auoir rendu à ma maison, & à ma patrie. Ce fut vn iour bien heureux, voire glorieux pour moy. Iout où retiré de l'obscurité des prisons, ie vis lors, & à l'instāt le Soleil tout à plain, voire deux Soleils tout ensemble. Car ie veis le Soleil de la terre, le Roy de ce monde sensible, & vous SIRE, qui estes le Soleil des François, & le Roy de ceste Monarchie. Soleil non seulement qui me recreoit, mais qui dissipoit mes tenebres. Soleil qui m'animoit & me remettoit en vigueur. Soleil qui me faisoit florir & fructifier à mesme instant. Soleil mon Orient, & mon Midy, & duquel ie prie à Dieu, que ie ne voye iamais l'Occident. Ie dy ce Soleil, sous lequel ie me tremoussois de plaisir, comme fait le poussin, qui se pouldre sous

les rayons d'un Soleil de la Primeuere.

Ce fut lors SIRE, qu'ouurant vostre bouche, vous me distes en la presence de la Royne & de plusieurs Princes, & Seigneurs, & Gentils hommes qui vous assistoient, *QUE I'AVOIS TOVSIOURS ESTE HOMME DE BIEN, ET QUE IE LE FVSSE ENCORE D'AVANTAGE.* Que pensez-vous SIRE, que me consolent ces parolles, & combien elles me furent aduantageuses & honorables? Le uiuois lors par les aureilles comme on escrit qu'aux Indes, il y en a qui ne viuent que d'odeurs, qu'ils tirēt par le nez. Le me resouins lors, de cest Orme de Nocera, qui couppé par le feste, & courbé cōme mort, sous vn vent prospere, soudain se releua, & espanit des fleurs, argumēts certains de sa secōde vie. C'en'estoiēt point simples parolles, que ce que i'entendois, mais arrests hautemēt & honorablemēt pronōcez par vostre bouche sur la contestation de mes actiōs. C'estoiēt arrests pronōcés de la viue voix d'un Prince, & d'un Prince aussi grād entre les Princes, & les Rois, qu'est vn Soleil, entre les estoilles. Les Poētes qui font parler Me-

REMERGIMENT

nelaus lui donnēt des mots courts, mais
 pleins de pointes. Les vostres SIRE, sont
 briefts mais pleins de sens & de vigueur,
 comme estant instruiēt à parler court,
 mais à longuement combattre. O que
 i'ay de regret de ne les pouuoir escri-
 re en lettre d'or, pour les enchasser se-
 lon leur merite. Mais si ce papier peut
 deuenir vne bronze, ie desire, voire ie
 le coniure, qu'il les tesmoigne à la po-
 sterité. Du moins, mon cœur sera l'ai-
 rin qui les conseruera tant que ie viue.
 Je iure à vostre Majesté, SIRE, que
 tout ce que i'auois souffert ne m'estoit
 plus rien, quand ieus ouy vne parole si
 honorable, & si veritable. Je pensois
 voir ces gracieuses pluyes d'esté, qui a-
 pres vne grande ardeur tombent sur le
 soir, & donnent vn amoureux refraî-
 chissement à la terre. Car mon desplaisir
 se tourna en plaisir, & mon ennuy en
 liesse, quād vostre bouche de verité, me
 pronōça vne si honorable déclaratiō de
 mes mœurs & de ma vie. Ce qui me fait
 ressouuenir d'un Arrest semblable que le
 Roy Charles V I. vostre predecesseur,
 prononça en faueur de Messire Iuuenal

des

des Vrsins, lors Preuoſt des Marchands, & depuis Aduocat du Roy, & Chancelier de France. Car il declara haut & clair de ſa bouche, *que ſon Preuoſt eſtoit prend'hōme*. C'a eſté autres-fois vn honorable arreſt à Scipion Naſica, d'eſtre iugé par le Senat Romain, le plus homme de bien de ſon temps : comme Phodius fut iugé le plus heureux, & Socrates le plus ſage, par la voix de l'oracle. Mais ces oracles eſtoient fallacieux. Oracles, non tant oracles que menſonges. Ceſtoient oracles, plus pleins de vanité, que d'honorable verité. Ou le voſtre, ne porte rien que iuſte & veritable. Je vous diray SIRE, que la choſe qui faiēt grandement eſtimer voſtre arreſt, c'eſt le grand & ſingulier iugement dont vous eſtes pourueu, & dont entre vos peuples vous eſtes grandemēt eſtimé. Paſſienus ce grād orateur Romain, diſoit qu'il aymoit le iugemēt d'Auguſte, & les preſens de Claude: mais qu'il preferoit le iugemēt d'Auguſte, pource que ſon iugement portoit vn preſent avec ſoy: & la reputation de ſon iugemēt, eſtoit auſſi grande que ſon tiltre. Car il n'eſtoit pas plus Empereur

REMERCIEMENT

que Prince iudicieux. Aussi le bon iugement de vostre Majesté, n'est pas reputé moins grand que vostre Empire. Et ce qu'une fois vous avez approuvé & prononcé, est tenu & reputé pour bien iugé. Vne chose luy a donné fort grand poix & autorité : c'est que s'il y auoit personne qui eust interest à ma condamnation, c'estoit vous: d'autant qu'il n'ya uoit que vo⁹ d'interessé, il n'y auoit que vous de partie. Et toutesfois victorieux de vous, victorieux du tēps, victorieux de vostre heureuse fortune, qui ne fut onques vaincuë que de vous, vous m'auiez absous au lieu de me condamner, vous m'avez loué au lieu de me blâmer, vous m'avez aymé au lieu de me hayr.

Voilà certes bien des merueilles qui se rencontrent en vous. Voilà comme vn effein de vertus qui sortent de vous. Je me souuiens d'auoir leu quelquesfois que regnant l'Empereur Tibere, avec du blanc d'œuf, & de la chaux viue, on refaisoit les pieces de cristal, & les verres rompus. Et ie voy que sous vostre Empire, & par vostre main, ma pauvre

fragilité que ie voiois par pieces, a esté refaict & heureusement & resoudue avec le blanc de vostre candeur, & de la viue chaux de vostre bonté. Car vous m'avez esté vn vrây Agatocles. Et comme ce grand Prince s'addonnoit quelques-fois aux mechaniques, & à tourner vn pot ou faire quelque chose de singulier: ainsi vostre Majesté mettant la main sur mon argille, a tourné voire retourné ma fortune, & d'un prisonnier, elle en a fait vn homme libre, d'un exilé, vn citoyen, & d'un homme accusé elle l'a iustifié par sa bouche. Mais c'est trop dict il faut que ie finisse. Le simulachre d'Angeronia à Rome, qui estoit la Deesse d'angoisse, auoit la bouche close pour ne dire mot.

Voila donc la Puissance, SIRE, voila la Clemence que Dieu vous a dōnee, cōme il les donne en appennage aux bons Roys, qui sont les nourrissons & chers enfans de sa diuinité. Je les ay experimentees toutes deux, pource que par la puissance, vo⁹ m'avez atterré & par la clemence vous m'avez releué. En cela vous avez monsté l'action d'une ame

REMERCIEMENT

benigne, voire d'une ame diuine. Car la main qui m'auoit blessé m'a guarý, la hache qui m'auoit nauré, a consolidé ma plaie. Maintenant que ie n'ay que les vœux qui sont mon sacrifice du matin & du vespere, ie les emploie tresardemment, & tresvolontairement pour vostre Majesté. Et si la vapeur de cet encens peut penetrer iusques au thronne de Dieu, & qu'elle luy soit agreable: ie prie & supplie sa diuinité, qu'il vueille conseruer en vous ceste puissance, & ceste clemence tout ensemble. Ie le prie qu'il les vueille augmenter & amplifier au double, d'autant que l'augmentation de la Puissance, fera l'accroissement de vostre Estat, & celle de la Clemence, sera le bien de vos subjects. Et pour ce que les Princes sont mortels, (comme disoit vn Payen) & leurs Couronnes immortelles; ie prie Dieu qu'il allonge si long, le fil de vostre vie, accompagné tousiours des graces de la Royne vostre compagne fidelle, que vostre mortalité soit vne espeece d'immortalité. Que vostre vie tire à cét cinquante ans, eomme celle d'Arganto-

nius Roy des Tartesses, ou bien à trois cens ans, comme celle des Rois Arcades, ou plustost à six cens ans, comme celle de ses Monarques dont parle Xenophon. Que vous ne sortiez point de ceste vie comme Apelles, que vostre œuvre ne soit acheuë, & que le riche tableau de vostre Estat ne soit parfaict & accõpli en toutes ses parties. Autresfois l'auõs nous prié pour vos predecesseurs, aujourd'hui nous le prions & repions pour vous. Nous ne luy demandons ni paix, ni richesses, ni hõneurs, ni assurance, mais ce qui contient tout cela, qui est vostre salut. nous ne le chargeõs de nouveau soin, quand il y a si long tẽps qu'il a soin de vous, & que vos prosperitez sõt les tesmoignages de ses graces. Nous le prions que vous ayiez toufiours vn esprit capable du droit diuin & humain : vn esprit suffisant à porter le faix de ce grand Royaume, prouide de l'vtilité de vos subjects, constant en aduersité, & toufiours moderé en vostre prosperité. Bref, que vous soyiez vn Prince digne de la Couronne de France, digne de la maison de Bourbon, digne de tant de grãds

REMERCIEMENT

Rois vos deuanciers : digne du sang de monseigneur saint Louys, qui a esté viuant, vn exemplaire à tous Princes, de bien gouverner vn Estat Chrestien. Et quand apres vn long terme il plaira à Dieu d'ordonner de vous, que vostre Royaume passe à vne longue & glorieuse posterité. Que Monseigneur le Dauphin vous succede, & vous succedant, qu'il regne long temps, reluisant en vertus, excellent en puissance, & heureux en obeyssance. Et quand vous serez passé à vne meilleure vie, que les esprits de vos subiects soient les temples de vostre eternité : & qu'avec loüanges & loueuances perpetuelles, ils honorent vostre heureuse memoire, & celebrent les choses dont la Couronne de France vous est infiniment obligée.

603801





Extrait du Priuilege du Roy.

PAr grace & priuilege du Roy, il est permis à REGNAULD CHAUDIERE, marchand Libraire en l'Vniuersité de Paris, d'imprimer ou faire imprimer, & exposer en vente ce present liure intitulé REMERCIMENT AV ROY, PAR LOVYS D'ORLEANS. Et sont faictes deffences par ledit Seigneur, à tous Libraires & Imprimeurs, & autres de ce Royaume, en imprimer, vendre ni debiter, sinon de ceux qu'aura imprimez ou faict imprimer ledict Chaudiere, ou de son consentement : & sont faictes pareilles deffences aux estrangers d'en apporter vendre ne debiter en cestuy nostre Royaume, sans le consentement dudit suppliât; ni les contrefaire en aucune maniere que ce soit, iusques apres le temps & terme de dix ans finis & accomplis apres la premiere impressiõ, à peine de vingt liures tournois d'amende pour chacun exemplaire, de laquelle moitié nous appartiendra, & l'autre audit suppliant, & aussi à peine de confiscation desdits exemplaires trouuez imprimez ou vendus au preiudice de ces presêtes, nonobstât oppositiõs ou appellatiõs quelconques, pour lesquelles & sans preiudice d'icelles ne voulons estre differé. Clameur de Haro prise à corps, chartres Normande, & pri-

uilege du pais auquel auõs derogé & derogeõs.
Voulant en outre ledit Seigneur, que ce pre-
sent extraict soit tenu pour deuement signifié à
tous qu'il appartiendra, comme plus ample-
ment est déclaré par les lettres, sur ce donnees
à Paris le 14. iour d'Octobrel'an de grace 1604.
Et de nostre regne le 16.

Par le Roy en son Conseil.

Signé

BRIGARD.